

ADZUMA

Foto Banyane a Tudzuma

I-II Nwaẽ Tiofilo, ne yĩ ovoli otonyade a kame a, ntsELE ntsa letsa nye letsa a kĩ Yesu kena mo fukĩ etsa, kito ne loko a kĩ eyi ye adzuma kayo, kenawo loko a kĩ Baguma boe ye enamena ode. Fomo Baguma boe ye benamena ode a, Yesu tsã Hũhũ Kpalawa kobẽ akũ etsa ye foto banyane a kĩ epau a fotsa.

III Ne ye wuda liti a, enye ye akũ etsa be ne tisi pii akũ ne fuwi tena kame, kĩ atsindze kate lelãa foe kame kĩ edzi nkpã. Elemo bikĩ bemó ye a kodzela ne Baguma legãkanyakõ foletsã a akũ.

IV Loko a kĩ bekpota a, esi be mbla kĩ, “Mitadzakũ ne Yerusalem, mbom midzi midzole Hũhũ Kpalawa a kĩ mbi mi kĩ yĩ Olega le eyi kĩ yaakpa mi a kaya.

V Yohanes kõ ni, mui ekwa ewola bati. LemE ne fuwi lukũ kame ni, Baguma aakwa Hũhũ Kpalawa ewola mi.”

Baguma Bøe Yesu Enamena Ode.

VI Loko a kĩ Yesu mo ye foto banyane a buki bekpota a, bivia ye kĩ, “Boe Olate, mboee finyaakĩ owe kĩ ayaamunikimo Israelfo legãkanyakõ a okpa be?”

VII Ade Yesu bi be kĩ, “Fotãsi kĩ mianyi loko iye fuwi a kĩ yĩ olega le eyi ekpa kĩ litsedi leya a ne ye kobẽ akũ a.

VIII Leme nte Hũhũ Kpalewa a yawo ne mi kame ni, yaado mi kɔbẽ lɔkɔa mile yĩ fɔletsa a ne Yerusalem, mɔ Yudea flee mɔ Samaria, kɛnaawo katinya kame tite kawũnakɔ̃.”

IX Kĩ ɛɛ fukĩ eyua a ne be ane kame naa, Baguma bɔe ye enamena ode, ade eyela ne luflututu kame a.

X Kĩ bedza bekadã koe kĩ yanaa odetɔ kame a, letaleta banyole nviã badi kĩ bideĩ ne fɔtsa ovoe kame nye be akũ betsa be,

XI ade bibi be kĩ, “Galileafɔ, nde sũ midzẽ miadã odetɔ kame lɔmɔ? Yesu a kĩ Baguma bɔe ne mi ɔwẽ ne awĩ enamena ode a, aabuki eya ne mi sekẽ nde ayekĩ mimó kĩ yanaa ode a.”

Matias Yate Yuda Kadzakɔ̃.

XII Ke liti a, fɔtɔ banyane kĩ dzakũ ne Kugua Futse ɔtɔ akũ a benaa Yerusalem ɔmato kame. Kito awã kenawo ɔmato a kame ana nde lisikũ seke.

XIII Kĩ biwo ɔmato a kame a, benaa be kadzikɔ̃ ne abansulu kɔla ode. Bati a kĩ bena ne awã nye Petro, Yohanes, Yakobo, Andrea, Filipino, Toma, Bartolomeo, Mateo, Yakobo kĩ enye Alfeo obi, mɔ Simon kĩ epili ye kade lɔlɔ, mɔ Yuda kĩ enye Yakobo obi.

XIV Bati kĩ flee katsena lɔkɔ nye lɔkɔ mɔ kakɔna mɔa, kabɔa mpae kakpa Baguma. Bati a badi leme nye batsole mɔ Yesu ɔma Maria, mɔ Yesu bawaẽnyole.

XV Ne fuwi a na kame a, bikĩ betɛ bido a tsena, be lidede aawo nde bati ɔha mɔ be tɛya. Ade Petro yidza edza ebi be kĩ,

XVI “Nwaẽ amε, kenε kī letsa a kī betsele ne Katsēle Kpalēwa a kamε, kī Hūhū Kpalēwa a le eyi etsāmena Legā Dawid akū ne Yuda kī ye lenya bati loto bipi Yesu a, foya lomo.

XVII Yuda nya boe kamε omoa kī boe Olate nye ye kī ekena foto banyane adzuma.”

XVIII Leme ekena tokpa kī enate sika kī se bekoa beya tite a kī te akū eku a. Ade awā na kī eto ode eto a, ye lupu tui lebē, ade ke ye fometsa flee ne fuko ne tite a.

XIX Ye wuda a akū foletsa gba ne Yerusalem kī odi nye odi nu foe. Foesū awā kī enaku ewa a bave ke kī Akeldamak, foe kayo nye Baboane Tite.

XX Foesū Petro buki ele kī, “Betsēle ne Dawid Tono Ovoli a kamε kī,

‘Mifō ye toto tewa luto,

odima etabuki edzi ne te kamε.’

Betsēle leme kī,

‘Mifō oti bebā ete ye kadzakō a.’

XXI-XXII Foesū fusī kī oti bebā eyaawo ne boe kamε nde odansini ekpa boe Olate Yesu kayidza kato kanokpa a. Ade fusī leme kī enya oti kī enya boe bati a kī botsā butomena boe Olate Yesu a kamε omoa, kito loko a kī Yohanes de letsā ne mui kawola amaniε akū keyawo loko a kī Baguma boε Yesu ne boe sekē enamena ode a.”

XXIII Foesū benye bati nviā ade be nye Matias mo Yosef kī bave Barsaba kī babuki kave Yusto a.

XXIV-XXV Ade bebōa mpae beve Baguma kī, “Boe Olate, no nyina odi nye odi lolo kamε. Tsa boe bati nviā kī kamε ekī onye kī edza nde foto

onyane ne kadzakõ a kī Yuda fone awe eyi enaa awã kī kefeta ye a.”

^{XXVI} Kī beta bavulibi ne bati nviã kī folo a, foyake ne Matias akū, ade bekõa ye bibumena foto banyane ewua-odi a akū a.

II

Hūhū Kpalēwa a Kaya Ne Pentekoste Luwi a Akū.

^I Kī Pentekoste luwi a wo ɔto a, bate badone a flee natsena ne kako moape.

^{II} Deedimoape, binu litsedi nkã nde ayekī ɔwe kpale avū a ne odetó kame, ade ɔwe kī te tɔto a flee kī te kame bena a kame a.

^{III} Bemó litsedi nde fi fome kī foka fudzi ne odi nye odi akū.

^{IV} Ade Hūhū Kpalēwa te be kame flee, ade bido kɔdzela kale awe ne tide futefute kame, nde ayekī Hūhū a kpa be a.

^V Ade ne loko a na kame a, Yudafɔ kī bavila Baguma kī bito fude kumekume ne katinya kame flee a ya bidei ne Yerusalem.

^{VI} Foesū kī binu ɔwe baū kī nkã a, bati pii boa obū benakpota ne awã. Kī binu kī bate badone kī kale kɔdzela ne be kame odi nye odi tide kame a, fokena be wãwã.

^{VII} Ne fukī sū libe wo be, bekena saa, ade bido akū kavia awe kī, “Midã, mbɔɛɛ nné Galileafɔ bati kī flee anɛ?”

^{VIII} Mo nde foya mo boanu kī belamena kɔdzela kale ne boe tide kame?

^{IX-X} Bonye Partiafɔ mo Mediafɔ mo Elamfɔ ade boe kame badi to Mesopotamia mo Yudea mo Kapadokia mo Ponto mo Asia mo Frigia mo

Pamfilia mɔ Egipte mɔ Libia kako a kī kifuã Kirene. Boe badi buto Roma

^{XI} kī bonye Yudafo ñye bati kī bedani akū bekena Yudafo, boe badi bonye Kretafo mɔ Arabiafo. Ade boe flee boanu kī belamena Baguma awāwā fɔtsa kale ne boe tide kame a.”

^{XII} Ade kī fɔkena be saa mɔ basaa lomɔ a, bekavia be akū kī, “Litsa fɔletsa ne awī a?”

^{XIII} Lemε bikī bedza ne awā badi di be nsekuo bele kī, “Bave lamena be kawugela.”

Petro Bi Yudafo Yesu Akū Fɔletsa.

^{XIV} Ade awā mɔ Petro yidza edza mɔ be ewuaodi a, edzela odo ele kī, “Mi Yudafo mɔ mi a flee kī midzi ne Yerusalem, mawe kī manye fɔletsa kī flee kayɔ ntsa mi, foesū mitse katse wī.

^{XV} Nné bave bati kī wuga nde ayekī mikona a. Midā kī ade owi fomɔ ɔnɔne todɔũ evedi boa a.

^{XVI} Mbom letsa a kī de milamena kamɔ ne awī a nye fukī Baguma Onukpē ɔnyene Yoel le eyi ane kɔkɔe a kī,

^{XVII} ‘Baguma le kī,
 “Ne fuwi nkae a kame ni,
 maado yī Hūhū eyaawo ne bati flee kame,
 lokɔa mi babinyole mɔ babitsole aade letsā ne yī
 kale a akū.

Mi bapopo aamɔ ode fɔtsa kenawa ne hūhū
 kame,
 ade mi banɔkɔẽ lemε aawa fɔda a.
^{XVIII} ɔnɔkɔali, ne fuwi a na kame ni, yī Hūhū
 aate mi basumune batsole mɔ banyole flee
 kame,
 lokɔa baade letsā ne yī fɔletsa akū.

^{XIX} Ade maafɔ awāwā fɔtsa lenε
 ne odeto kame mɔ tite akū.

Míamɔ babɔanɛ, mɔ fi mɔ onyɔ kusuu kī
fɔgba nɛ tite akū.

XX Suwa aake ɔtū,
odeto anɛ aadani ngbã ndɛ babɔanɛ aye,
ade owi fɔmɔ Baguma Luwi kpale
mɔ kukūkpale a aaya a.

XXI Nɛ lɔkɔ a na kame ni, odi nyɛ odi kī yaave
ɔlate a dī
mɔ evia ye kɔnyakamɔ ni, yaana kate.” ‘ ‘

XXII Ade Petro buki ɛɛ kī, “Nwaɛ amɛ Israelfɔ,
mitse fɔletsɔ kī. Yesu Nazaretni nyɛ Oti a kī
Baguma pau, kī ye deī Baguma kɔbɛ. ɛnyɛ kɔbɛ
kī ɛtsa mi nɛ ye awãwã mɔ nsentseleni fɔtsa
kenawa kame, ndɛ ayekī mi mɔawɛ minyina
lemɛ a.

XXIII Lemɛ nɛ Baguma kawɛ mɔ nhihie onukpɛ
ni ɛfɔnɛ ye awɛ ɛkpa mi, ade mitsã tokpa
bakenanɛ akū mikɔ ye, nɛ kī mibɔa ye nɛ
asendua akū a.

XXIV Lemɛ Baguma buki ɛdzɛla ye etomena
banɔkpa kame ade ɛnɛ nɛ wuda awɛ kame a,
kitonekī wuda tãpuli ɛfɔ ɛkaho nɛ kanɔkpa da.

XXV Ade ɛgã Dawid ɛ eyi nɛ ye akū kī,
‘Mamɔ kī yī ɔlate dzɛ nɛ yī anɛ kame lɔkɔ nyɛ
lɔkɔ
Nɛ kī ɛdzɛ nɛ yī sɔmɔna ndɛ yī obumenanɛ
sū maávila.

XXVI Nɛ fukī sū kawɔɛ de yī ade fɔfɔ mamu ye
luwi daa.
Titɔ kī sukɛna pupulidza manɛ malo ni,
maadzi nɛ kɔnɛtɛ kame.

XXVII Kitonekī ɔláafɔnɛ yī ɔkla oyi nɛ kanɔkpade,
ade ɔláafɔ nɔ Obi Kpalewa sukɛna levɔ nɛ
linikɛ kame a.

XXVIII Nɔ letsa yĩ nkpã osi a,
ade nɔ sekẽ kana aafõ mmó kawɔle paa.'

XXIX "Foesũ, nwaẽ amɛ, mabi mi yededeede kĩ
boe ɔwanyɔ Legã Dawid ku, bibila ye, ade ye
kuni waa ne boe kame keyawo nviã kĩ a.

XXX Lemɛ kĩ enya Baguma onukpẽ ɔnyene sũ
ni, enyi letsa a kĩ Baguma le eyi kĩ yaakena ekpa
ye. Baguma lo fubo kĩ yaakena Dawid kasinu a
kame obi mɔa odi eyaadzi enya legã nde Dawid
aye.

XXXI Ne kĩ Dawid nyi fukĩ enyamena loto sũ ni,
ɛle eyi kĩ Kristo aayidza eto banɔkpa kame. ɛle
kĩ, 'Baguma táfone ye awe ekaho ne kanɔkpa,
ade ye sukena leme távõ ne linike kame a.'

XXXII Ade Yesu kĩ Baguma dzela etomena
banɔkpa kame a, ade boe a flee bɔnye foe akũ
adansifo a.

XXXIII Finyaakĩ ni, ɔlega Baguma kpa ye
lonɔkɔẽ kadzikõ ne ye somona, ade ekɔa ye Hũhũ
ekpa ye nde ayekĩ ɛle eyi a. Foesũ ye malo ekɔa
ye Hũhũ a, eko ne boe akũ. Ade foesũ mimó,
minu leme letsa a kĩ lelamena kaya ne awĩ a.

XXXIV-XXXV Nné Dawid liyidza enaa ode, mbom
ye lele kĩ,

'Baguma bi yĩ ɔlate kĩ,
"Dzi ne yĩ somona

kɛnaawo lokɔ a kĩ maakɔa nɔ bakesine nkena
nde nɔ abɔa katekõ." '

XXXVI Foesũ mawe kĩ mi Israelfo flee minyi kĩ Yesu
a kĩ mibɔa ne asendua akũ a, ade ye Baguma
kɛna ɔlate mɔ Kristo Oti a Kĩ Beɔa Tɔdõ a."

XXXVII Kĩ bati kī nu Petro foletsa a, foha be paa. Foesũ bivia ye mo foto banyane bebã a kī, “Nwaẽ ame, litsa kene kī bokena?”

XXXVIII Ade Petro bi be kī, “Fusĩ kī mi kame odi nye odi edani owole kame ete Baguma edo, lokoa ete mui kawola amanie ne Yesu Kristo dī akū ayekĩ Baguma aakoa ye titikpa ete ye, ete Baguma futetsa a kī fonye Hũhũ Kpalewa a lemẽ.

XXXIX Kitonekĩ letsa a kī Baguma le eyi kī a waa fokpa mi, mo mi babi mo bikĩ bito mo lugo, mo bikĩ boe Olate Baguma aave kī beya ne ye sekẽ a.”

XL Ade Petro de be pii ele kī, “Minye mi akū mitomena soto kavele a kī saaya ne nviã katinya bati kpa kī akū a kame.”

XLI Ne fukĩ sũ bati pii ne be kame te Petro foletsa a bido, ade bewola be mui ne Yesu dī akū a. Be lidede aana nde mpim elale kī bekoa bibumena bate badone a akū ne luwi a.

XLII Befone be akū awe bekpa foto banyane a bekatsa be fotsa, ade bekaboa mpaẽ mo kanya kakpota mo omoa kakena a.

Bate Badone a Dzi Mo Onukpẽ Mɔa.

XLIII Ne kī foto banyane a kakena awãwã fotsa mo nsentseleni pii sũ ni, fokena bati pii wãwã.

XLIV Bate badone kī flee katsena luwi daa kakena letsa mɔa, ade bekasẽ be fotsa kakpa akū a.

XLV Nte osa beno be akū fotsa fudi ni, basẽ sika a kakpa akū ne be kame odi nye odi kasĩ onukpẽ.

XLVI Bekanaa Baguma afolie kabokõ a luwi daa, ade bekatsena ne kutsu kutsu kame ne be

toto kame kanya kakpota ne kawole mo akũ kadola kame a.

^{XLVII} Ade bekanye Baguma kole, kamu ye leme a. Bati flee koa obu bekpa be. Luwi daa boe ɔlate akoa bikĩ bete bido a kĩ ete a kayaabumɔ be.

III

Petro Mo Yohanes Tsa Oti Odi Kĩ Eveliveli.

^I Luwi a Petro mo Yohanes naa Asoli Kola kame ne loko a kĩ Yudafɔ aboa mpae a kame. Fɔana nde olobe todɔũ elale kame.

^{II} Kĩ biwo Asoli Kola onyukpẽ a kĩ bave Onyukpẽ Mo Kale a, bemó onyole odi kĩ eveliveli kito ye lemawi, kĩ ewaa ne awã. Ye bati abɔe ye kanaayi ne awã luwi daa ayekĩ yaakawã sika katomena bikĩ batẽ ne awã a sekẽ.

^{III} Kĩ Petro mo Yohanes atẽ a, ewã be sika.

^{IV} Befɔ bedza bedã ye koe ade Petro bi ye kĩ, “Dã boe ane kame!”

^V Ade oti a dzela ane edã be mo kakona kĩ baakpa ye litsedi.

^{VI} Petro bi ye kĩ, “Nla sika sidima kĩ makpa no, leme maakpa no letsa a kĩ ndeĩ a! Ne Yesu Kristo Nazaretni dĩ akũ ni, mabi no kĩ yidza kadza, katsã!”

^{VII} Ade Petro pi oti a ne somona kokpo edzela ye a. Deedimɔape ye aboa mo anya flee de ɔsĩ,

^{VIII} ade evenya edza ne aboa akũ, edo katokatẽ awe a. Etomɔ be biwo ne Asoli Kola a kame ade ekavenya kamu Baguma leme a.

^{IX} Bati a kĩ bena ne awã a mó ye kĩ etsẽ, ade binu ayekĩ ekamu Baguma a.

X Kĩ bεmó biyi ɔsũ kĩ ye lεkadzi ne Onyukpě Mɔ Kale ɔwě kawã fɔtsa a, fonyene be flee akũ ade bekenaa saa ne letsa a kĩ lεya ne ye akũ a.

Petro Le Yesu Kobě Akũ Fɔletsaa Ne Asoli Kɔla a Kame.

XI Bati pii wula atse benaa be sekě ne awã kĩ bave Legã Salomo Mblada ne Asoli kɔla kame a. Beyamɔ oti a kĩ emanemɔ Petro mɔ Yohanes tsemetseme ade ye kasae a kena be saa a.

XII Kĩ Petro mɔ bati kĩ a ebi be kĩ, “Nwaě ame Israelfɔ, litsa koũ liti lakena mi wãwã ne fɔtsa kĩ akũ? Nde sũ miadã boe bãã lomɔ nde bati kpalewa boane? Mitakona kĩ boe awe kobě bokoa bɔtsa oti kĩ!

XIII Baguma a kĩ enye Abraham, Isak mɔ Yakob mɔ boe bawanyɔ Baguma a do ye ɔsumune Yesu obu. Ade ye obi Yesu mikɔa mikpa beko a. Misĩ ye ne Pilato ane kame, tito kĩ minyina ye ne kĩ Pilato we kĩ yafone ye awe kufe.

XIV Misĩ oti kpĩ mɔ oti kpalewa a, ade mituno kĩ efone owudini awe ekpa mi ne ye kadokɔ a.

XV Mifɔ beko oti a kĩ yakpa nkpã a, leme Baguma dzela ye etomena banokpa kame. Boe awe a bɔmɔ ye mɔ ane.

XVI Yesu dĩ kobě akũ futo mɔ oti kĩ miamɔ kĩ, minyina leme a na akũ ɔsĩ. Ne kĩ ete Yesu edo sũ ni, boe ɔlate tsa ye ne mi ane kame.

XVII “Nwaě ame, finyaakĩ inyina kĩ mi mɔ mi banokɔě mikena fukĩ ne Yesu akũ ne katanyi kame.

XVIII Leme Baguma le eyi ane kokɔe etsãmena ye onukpě banyene flee akũ kĩ ye Kristo a aatsã

lubo kamɔ kame. Ade foesũ efɔ̃ fɔya ne foe kame lomɔ a.

XIX-XX Foesũ midani tɔwɔle kame mimuniki miyaatómɔ Baguma ayekĩ yaakɔa mi tɔkpa ete mi. Nte mikena lomɔ ni, fɔafɔ̃ mina hũhũ kame kɔbẽ mitomɛna boe ɔlate sekẽ, ayekĩ yaado Yesu a kĩ ye nye Kristo a ne mi sekẽ.

XXI Kene kĩ Yesu ena ne ode kenawo lokɔ a kĩ Baguma lola letsa nye letsa ne de osi akũ nde ayekĩ ye onukpẽ banyene kpalewa a kĩ bidzi nkpã kɔkɔe a le biyi a.

XXII Kitonekĩ Mose le kĩ, ‘Mi ɔlate Baguma aanye onukpẽ onyene odi nde yĩ aye etomɛna mi kame. Foesũ mitse letsa nye letsa a kĩ yaabi mi.

XXIII Odi nye odi kĩ eláatse ye kale ni, baanye ye ne Baguma bati a kame lokɔa bewola ye mɔ odu mɔ odu.’

XXIV “Baguma onukpẽ banyene flee a, kito Samuel akũ keyawo bikĩ bitomɔ ye a, le biyi benyamɛna lotɔ ne fɔtsa a kĩ folamɛna kaya ne nviã fuwi kĩ kame a akũ.

XXV Baguma apam a kĩ ekɛna mɔ mi bawanyɔ etsãmɛna ye onukpẽ banyene akũ a nye mi fude, ade mi aanya tsefã ne apam kĩ fɔtsa akũ a. Ebi Abraham kĩ fɔatsã ye ɔwa akũ yaakɔa nhila ekpa katinya kame bati flee.

XXVI Foesũ kĩ Baguma pau ye ɔsumune a ni, mi sekẽ enya lotɔ edo ye kĩ ekɔa nhila ekpa mi, lokɔa efɔ̃ mi kame odi nye odi efɔ̃ tɔkpa kakɛna.”

IV

Bipi Petro Mɔ Yohanes.

I Ne loko a ki Petro mo Yohanes dza bekabi bati a foletsa a, Yudafɔ basofɔ badi, Asoli kola a akũ odāmenane onokɔẽ mo Zadukifɔ badi ya ne awā.

II Kĩ binu ki Petro mo Yohanes katsa fɔtsa ne Yesu kayidza foletsa akũ, katsa ki banokpa aayidza bidzi nkpā a, bena kalokpa paa!

III Foesũ bipi be, leme ki kade do sũ ni, bekoa be bido ne kola kame kenawo ki kade nyina.

IV Leme bati pii ki binu be foletsa a badi te kale wĩ a bido. Banyole bate badone a ki bete bido a po biwo nde mpim elo.

V Ade ki kade nyina a, Yudafɔ banokɔẽ mo omaĩ banokɔẽ mo mbla batsane a yakpota ne Yerusalem.

VI Beyatsa folo mo Osɔfonokɔẽ Flee Hana mo Kayafa, Yohanes mo Aleksandro mo Osɔfonokɔẽ Flee a akũ bati badi.

VII Ade benye fɔto banyane a beyadzela ne be ane kame a. Bivia be ki, “Osi owodabe akũ mikena fukĩ? Owei dĩ akũ iye owa kobẽ akũ mikena fɔtsa kĩ?”

VIII Ade Petro ki Hũhũ Kpalewa te ye kame a yidza ele ki, “Boe loto banyane mo omaĩ banokɔẽ,

IX nte miwe foletsa kame kanye ne letsa wĩ a ki bokena bokpa oti ki eveliveli mo ayekĩ betsa ye a akũ ni,

X mitse mbi mi, loko Israelfɔ flee binyi ki, Yesu Kristo Nazaretni a ki miboa ne asendua akũ, leme Baguma dzela ye etomena banokpa kame a, ye dĩ akũ fɔtsā sũ mo oti kĩ na akũ osĩ.

XI Ade Yesu kĩ akũ Katsela Kpalewa le ki,

‘De a ki fola bakene sĩ a,
ade de ledani kola akũ de titiliwu a.’

XII Ye odi nye bati Ɔtenɛ, ade otidziwa odima leláa tite akū kī ye akū bóatsā bɔna nkpā a.”

XIII Kī lotɔ banyanɛ mo ɔmaĩ banɔkɔɛ a mó ayekī Petro mo Yohanes le kodzela mo kɔbɛ, tito kī betánaa sukoo malo ni, fɔkena be saa. Ade bemó biyi ɔsū kī betsā bitomo Yesu a.

XIV Lemɛ kī bemó oti a kī betsā a kī edzɛ ne be ɔwɛ sū ni, betápuli bele kadima.

XV Bibi be kī benɛ ne katsenakɔ a, kite be odi bekapi adzuni.

XVI Badi via kī, “Litsa bɔakena bati kīi? Boláapuli busī kī letsa a kī bekena a lenyé awāwā fɔtsa, kitonekī odi nye odi ne Yerusalem nyina, enu kale kīi lemɛ.

XVII Ne kī fɔletsā kī fotagba sū ni, mifɔ budo be libe kī betabi odima kale ne Yesu dī akū.”

XVIII Ade bibuki beve be benamena katsenakɔ a bisī be mbla kī betabuki bibi odima kale iye betsā fɔtsa ne Yesu dī akū a.

XIX Lemɛ Petro mo Yohanes kpa mbuayɛ kī, “Mi awe mibu fukī fɔfeta ne Baguma anɛ kī bɔkena, mi ɔledo butse, mbɔɛɛ kī Baguma ode?”

XX Letsa a kī de bómó, bunu lemɛ a, boláapuli busua onukpɛ ne de akū budzi kulokulo.”

XXI Ade awā mó banɔkɔɛ a kā be anɛ mo ɔsī mo ɔsī, befɔne be awe a. Ne kī bati a flee kamu Baguma ne letsa a kī leya a akū sū ni, betápuli bɛna osi a kī ye akū baatsā bevele be ɔto.

XXII Oti a kī ye betsā a, te fɔba futeli tena.

Bats Badone a Bɔa Mpaɛ Bekpa Ɔwɔle Kado.

XXIII Kī befɔne Petro mo Yohanes awe bɛnaa be bati sekɛ a, bebɔa be amandie ne letsa a kī basɔfɔnɔkɔɛ mo ɔmaĩ banɔkɔɛ a bi be a akū.

XXIV Ade bate badone a flee kpota beboa mpae beve Baguma bele kī, “O boe ɔlate, no kī okena tite mo ode, mpo mo fotsa a kī fudei ne ye kame,

XXV no letsā Hūhū Kpalewa akū ofo boe owanyo Dawid, no osumune le eyi kī,

‘Nde sū katinya kame bati de adō

mo bati tsa folo ne tokpa akū pupulidza?

XXVI Katinya kame fogā flee kena omoa

ade biyidza bedzē ne boe ɔlate mo ye Kristo akū a.’

XXVII Fonye onokwali kī Herodes mo Pontio Pilato mo Israelfo, mo bikī benyé Israelfo a tsena ne omato kīi kame, ade biyidza bedza ne Yesu no ɔsumune kpalewa a kī oboa todō a akū a.

XXVIII Lemē ne no kobē, mo no kawē, okpa osi bekpota bekena letsa kī ohihie oyi a foya ne foe kame.

XXIX Finyaakī, O boe ɔlate, dā ohau a kī ye kame bido boe, lokoa kado boe no adzuma bakenane a owole, ayekī bóapuli bole no kale wī a ne katavila kame.

XXX Te awe ne no bati akū bena kasae, kafō awāwā fotsa mo nsentseleni pii foya ne no ɔsumune Kpalewa Yesu dī akū.”

XXXI Kī beboa mpae biyua a, kola kī koe kame bena a kuna. Hūhū Kpalewa wo ne be flee kame ade bido Baguma foletsa kale awe mo kobē a.

Bate Badone a Sē Be Akū Fotsa.

XXXII Ne fuwi kīi kame a, bate badone a flee kena omoa ne be fokēnatsa mo adzuni kame. Be kame odima tákona kī ye odi la ye fotsa kī ena a, mbom fotsa kumekume a nya be flee fude.

XXXIII Fɔtɔ banyanɛ kī de letsã mɔ kɔbɛ̃ kī boe ɔlate Yesu kayidza kato banɔkpa kamɛ a nyɛ ɔnɔkɔali, ade Baguma lukudɔ mɔ nhila na nɛ be flee akū a.

XXXIV Odima tánya ohiãni kitonɛkī bikī bɛna fɔla mɔ tite a nɔ foe.

XXXV Bɛkɔa sika a bɛma fɔtɔ banyanɛ a ade bɛsɛ̃ se bɛkpa odi nyɛ odi nɛ ye kasī onukpɛ̃ a.

XXXVI Onyole odi kī bave Yosef na nɛ awã. ɛnyɛ Levini kī bɛma nɛ Kipro tite akū. Fɔtɔ banyanɛ a te ye dī kī Barnaba, dī a kayɔ nyɛ Ekī yado Bati ɔwɔlɛ.

XXXVII Barnaba malo nɔ ye tite ɛkɔa sika a ɛma fɔtɔ banyanɛ a.

V

Anania Mɔ Safira Ma Fɔvã

I Lemɛ onyole odi kī bave Anania mɔ ɔtsɔ Safira na nɛ be kamɛ, be malo bɛnɔ be tite tidi.

II Anania kɔa sika a sidi ɛkɔla ade ɛkɔa se nkaɛ ɛma fɔtɔ banyanɛ a. ɔtsɔ Safira nyina foe akū litsedi ade etunɔ kī bakɛna lomɔ a.

III Ade Petro via ye kī, “Anania, nde sū ɔfɔ Abonsam nya nɔ akū, ɔma fɔvã ɔkpa Hūhū Kpalɛwa, fɔfɔ ɔkɔla tite a kī ɔnɔ a sika a sidi?”

IV Nɔ tide nyɛ tite a fɔmɔ ɔnɔ te, sika a kī ɔtɛ a lemɛ nɔ side sanɛ. Litsa lɛfɔ ɔbɔɛ adzuni kpa kī odu? Nnɛ boe batidziwa ɔkɛ, mbom Baguma ɔkɛ!”

V Kī Anania sila enu fɔletsã kī pɛ, esinya ɛtɔ nɛ tite eku. Libe wo bati flee a kī binu fɔletsã a paa.

VI Bapopo a kī bēna nē be kame a kōa lima bisuli ye bēbōe benabila.

VII Ōtsō yanē eta nē awā nde ndoūhuile elale liti, kī enyīna letsa kī lēya letē a.

VIII Ade Petro via ye kī, “Bi yī. Kī mimō nō onyō minō tite a sika a kī bise mi a ni, se a flee nē awī a?”

Otsolē a kpa mbuayē kī, “Oo, ade se a flee nē awā a.”

IX Foesū Petro bi ye kī, “Nde sū mimō nō onyō mikena onukpē mōa miasō boe Ōlate Hūhū midā? Dā, bapopo a kī bēbōe nō onyō benabila a dzē nē onyukpē finyaakī. Baabōe nō malo bēnaabila.”

X Deedimōape otsolē a ka etō nē tite, eku. Ade kī bapopo a yamō kī eku ewaa a, bēbōe ye malo benabila nē onyō ōwē.

XI Foesū libe paa wo batē badonē a flee mō be flee a kī binu letsa kī lēya nē awā a.

Fōtō Banyanē a Kēna Awāwā Mō Nsentseleni Fōtsa Pii.

XII Nē lōkō kī kame a fōtō banyanē a kakēna awāwā mō nsentseleni fōtsa pii nē bati a kame. Batē badonē a flee katsēna nē Yudafo Asōli kōla kakōa kī bavē Salomo Mblada a kame.

XIII Bikī betána nē batē badonē a kame a tádo ōwōlē kī bafuā be, tito kī bakōa obu kakpa be malo.

XIV Bati pii, batsole mō banyole, dani ōwōlē kame betē boe Ōlate bido.

XV Ade bati pii bōe be basōnē mō tepa mō tekēna benayi nē kōya nē awā kī nte Petro atē mō ye kuyo ako nē be akū ni, lōkōa besaē.

XVI Ade bekɔa basone mo bikĩ hũhũ kpa deĩ ne be kame a bitomena temato a kĩ tisinya Yerusalem a beyamena betsa be flee a.

Yudafɔ Ɔmaĩ Banɔkɔẽ Yidza Bedza Ne Yesu Fɔto Banyane a Akũ.

XVII Ade Yudafɔ Ɔsɔfɔnɔkɔẽ Flee mo bikĩ bideĩ ne ye akũ kĩ bito Zadukifo katsu kame a yɔla ane ne foto banyane a akũ a. Foesũ bike otse kĩ baakena litsedi.

XVIII Ne foesũ bipi be benado ne kola kame.

XIX Leme ke lenye a, boe Ɔlate ode foto onyane odi yabinya opunu a, enye be, ade ebi be kĩ,

XX “Minaa Yudafɔ Asoli kola a kame lokɔa mibi bati fɔletsa a flee ne nkpa vɔẽ kũ akũ!”

XXI Foesũ kĩ kade nyina a benawo ne Asoli kola a kame ade biyi fɔtsa katsa kayo ne awã a.

Lokɔa na kame, Ɔsɔfɔnɔkɔẽ Flee a mo bikĩ bitomo ye a, mo Yudafɔ ɔmaĩ banɔkɔẽ a tsena, ade bido bikĩ badã asoli kola akũ kĩ benaanye foto banyane a ne kola a kame beyamena.

XXII Leme kĩ bati a naa awã a, betámɔ be, foesũ bimuniki beyabi be kĩ,

XXIII “Kĩ bonaa a, bebale kola a kpakplakpa ade bikĩ badã kola a akũ leme dzẽ ne onyukpẽ a pɛpɛpɛ a. Leme kĩ bubinya kola a bati a kame odima lelãa koe kame.”

XXIV Kĩ asoli kola akũ ɔdãmenane ɔnɔkɔẽ mo basɔfɔnɔkɔẽ a nu kale kũ a, akũ dzuli be ade bekakona letsa kĩ leya ne foto banyane a akũ a.

XXV Ade odi yabi be kĩ, “Bati a kĩ mipi mido ne kola kame a, deĩ ne asoli kola kame ade belamena bati fɔtsa katsa ne awã a.”

XXVI Ne awã a Asoli Kola odãmenane onokoẽ mo ye bati yidza benakpã be beyamena. Ne kĩ bivila kĩ bati aano be boe sũ ni, betãkpã be ne ohe kame.

XXVII Kĩ bekpã foto banyane a beyamena a, befõ bedza ne omaĩ banokoẽ a ane kame.

Ade Ososonokoẽ Flee a via be kĩ,

XXVIII “Botãbi mi kĩ mitabuki mile kadima ne Yesu dĩ akũ a? Leme migbamena foletsã kĩ flee ne Yerusalem, ade miawe kĩ miakoa ye wuda soto kavele a mite ne boe akũ a.”

XXIX Awã na Petro mo foto banyane bebã a kpa mbuaye kĩ, “Kene kĩ boabu Baguma, nné batidziwa.

XXX Yesu a kĩ mifõ bebõa ne asendua akũ miko ye a, boe bawanyo Baguma dzela ye etomena kanokpa, edzi nkpã.

XXXI Baguma kpa ye kadzikõnokoẽ ne ye somona, ade ekena ye Okpãne mo Otene, ayekĩ Israelfo aana osi bedani be towole kame lokoa bena be titikpa kakakate.

XXXII Ade boe mo Hũhũ Kpalawa a, kĩ enye Baguma futetsã kĩ ekpa bikĩ babu ye a, bonye foe akũ adansifo a.”

XXXIII Kĩ omaĩ banokoẽ a nu foletsã kĩ a, fofõ bena kalokpa paa ade bewe kĩ bako foto banyane a.

XXXIV Leme Farisifo banokoẽ a kame omoa kĩ bave Gamaliel sua be osi. Enye fotsã otsane ne Mose mbla akũ, ade bati a flee akoa obu baũ kakpa ye a. Eyidza edza ade ele kĩ befõ foto banyane a bekpã be osi sukuloo bekona foletsã a akũ.

XXXV Ade ke liti ebi be kī, “Nwaẽ Israelfo, midã kadã wĩ ne letsa kī miawe kī miakena ne bati kī akū a!

XXXVI Miate ane kī loko lidi kī leyatẽ a, onyole odi kī bave Teuda yakena ye akū kī oti titiliwu odi odu yanẽ. Bati nde oha ena tomo ye ne liti. Ade kī beko ye a bikī bitomo ye a flee pansam, ade ye folets a leme wo a.

XXXVII Ke liti, ne bati kakã loko a, Yuda, Galileani a yayidza, evẽle bati kodabu ebumo ye akū. Kī ye malo eyaku a bikī bitomo ye a flee yale, ade ye folets a leme wo a.

XXXVIII Foesũ lets a kī mabi mi nye kī mifone bati kī awe benaa. Nte be fots a kats a a mo bati fude fone ni, owi lelãabuna mo fowo.

XXXIX Leme nte Baguma sekẽ futo kō ni, bolãapuli busua foe osi. Nte mitãdã kadã wĩ ni, luwi lidi miamo kī Baguma awe akū buyidza bodza.”

Katsenakõ bati a te Gamaliel kale a.

XL Foesũ beve foto banyane a bimuniki beya ade bibo be a. Bisĩ be mbla kī betabuki bele kadima ne Yesu dĩ akū dadaada, ade befone be awe a.

XLI Kĩ bedzakū banaa a, bemó kawole pii kitonekĩ Baguma bu be nde bati kī befeta bekpa lubo kamō mo konyokado ne Yesu dĩ sũ.

XLII Ne fukĩ liti a, luwi daa bekats a fots a ne Asoli kola kame, mo bati toto kame, kade letsã ne Kale Wĩ akū kī Yesu nye Kristo a.

VI

Bate Badone a Pau Babumenane Evũkono.

^I Ke liti a, kī fōtsa bakōlene a lidede lamena kapo kabu a, odze yawo ne Yudafō a kī bale Tigriki mo Yudafō moawe a kayite. Grikifo a tsa kī nte besē funitsā ni, baákpa be bakunawa.

^{II} Ne foesū fōto banyane ewua-nviā a ve bate badone a flee bekpota ade bibi be kī, “Fotáfeta kī boakoa loko a kī boale Baguma foletsa bokena funitsā kasē loko.

^{III-IV} Foesū nwaē ame, midā mi kame minye banyole evūkonō kī binyina kadi, kī Hūhū Kpalēwa lēme yi be kame, loko bokoa adzuma kī budo ne be awe, ayekī boe moawe a bóana aya bokpa mpae kaboa mo Baguma foletsa a kale.”

^V Foletsa a de bati a flee kawole ade benye Stefano, oti kī edeī katekado, kī Hūhū Kpalēwa lēme te ye kame, Filipo, Prokoro, Nikanora, Timona, Parmena mo Nikolao, kī edani ekena Yudani. Eto Antiokia.

^{VI} Benye bati evūkonō a kī bepau a betsa fōto banyane a ade bebōa mpae ne be lolō, bite awe ne be akū a.

^{VII} Bati pii te Baguma kale wī a. Fōtsa bakōlene ne Yerusalem danē kapo ade Yudafō basōfo a pii lēme dani bete Yesu bido a.

Yudafō Omaī Banokōē a Pi Stefano.

^{VIII} Stefano kī Baguma kobē mo seme kale yi ye kame a, kēna awāwā mo nsentseleni fōtsa pii ne bati a kame.

^{IX} Yudafō a kī benye be ne awōba kame a kī bito Kirene mo Aleksandria bibumō bikī bito Kilikia mo Asia yidza ne Stefano akū, bekavele foletsa mo ye.

X Leme Baguma Hũhũ kpa Stefano nyansã mɔ kadikanyi paa foesũ nte ele kɔdzela ni, be kame odima lãpuli kate ye atsindze.

XI Foesũ bekena ɔmɔa mɔ badi kĩ bema fɔvã kĩ, “Bunu kĩ Stefano le fubusuotsa ne Mose mɔ Baguma akũ.”

XII Ye onukpẽ katsua kĩ fɔ bati a, banɔkɔẽ a, mɔ mbla batsane a na kalɔkpa paa, ade Yudafɔ mbla batsane a yapi Stefano benamena ɔmaĩ banɔkɔẽ katsenakɔ a.

XIII Bati a kĩ bitsua Stefano onukpẽ a yama fɔvã bele kĩ, “Oti kĩ ale kɔdzela katia Asɔli Kɔla Kpalɛwa mɔ Mose mbla a luwi nye luwi.

XIV Bunu leme kĩ ele kĩ Yesu Nazaretni a aaveli Asɔli kɔla kĩ lɔkɔa edani temanie flee a kĩ Mose yi ekpa boe a.”

XV Lɔkɔ a na kame bati a flee kĩ bena ne katsenakɔ a ke ane ne Stefano akũ ade bemó kĩ ye ane kame dani nde ode fɔtɔ ɔnyane ade aye a.

VII

Stefano De Letsã Ne Baguma Kale Wĩ a Akũ.

I Ade ɔsɔfɔnɔkɔẽ Flee a via Stefano kĩ, “Letsa a kĩ belamena kale ne nɔ akũ a ni, nuwĩ fɔane?”

II Stefano kpa mbuaye kĩ, “Nda ame mɔ nwãe ame, mitse katse wĩ! Fɔmɔ boe ɔwanyɔ Abraham aatu enadzi ne Haram tite akũ a, Baguma Kpalɛwa a nye ye akũ etsa ye ne Mesopotamia tite akũ.

III Ade awã ebi ye kĩ, ‘Yidza kafone nɔ katete bati mɔ tite a na kanaa tite a kĩ maatsa nɔ a akũ.’

IV “Foesũ edzakũ ne Kaldea tite akũ enadzi ne Haram kenawo lɔkɔ a kĩ ɔlega ku. Ade ke

Baguma kpã ye eyamena ne awã kĩ midzi nviã kĩ a.

^V Baguma tákpa Abraham tite kanyakõ seneta moa malo kĩ tenya ye tide. Leme ele eyi kĩ yaakoa tite a na ekpa ye tenya ye mo ye babi mo bawa tide, tito kĩ ne loko a na kame malo etama obi odima!

^{VI} Letsa a kĩ Baguma bi ye nye kĩ, ‘No bawa aanya banovõe ne tite bebã akũ, benya abawa bekena be tenya futeli oha ena kpõ.’

^{VII} Ebuki ele kĩ, ‘Maadze mo bati a kĩ be baasum a. Ke liti baadzakũ ne tite a akũ beyaasum yĩ ne awĩ kĩ.’

^{VIII} Ade ke Baguma kena lekpati katsua nde apam aye ne Abraham mo Ye Baguma kayite a. Ne foesũ kĩ Abraham ma Isak a etsua ye lekpati kĩ ete fuwi elẽ a. Isak leme ma Yakob, Yakob leme ma babi ewua-nviã kĩ benye Yudafõ bawanyo ewua-nviã a.

^{IX} “Yakob babi kĩ yoolẽ ane ne be owaẽ Yosef akũ ade bipi ye beno bekpa bati badi bekpã ye benamena Egipte tite akũ a. Leme Baguma dã ye akũ,

^X ade enye ye etomena ye lubo kamõ mo ayolohõ kame a. Baguma kpa ye nyansã mo konyakamõ baũ foesũ Egiptefõ Legã Farao we ye kale ade ekõa ye ekena ye tite mo legã toto a akũ odãmenane a.

^{XI} “Loko lidi kame ni, kole kpale ya ne Egipte mo Kanan tite flee akũ kĩ foyamena lubo kamõ beblebee kĩ boe bawanyo tãna funitsã.

^{XII} Ade kĩ Yakob nu kĩ fugbanõ na ne Egipte a, edo ye babi lotonyade a benaaya funitsã beyamena.

XIII Kĩ Yakob babi buki benaa awã leyade kĩ banaaya funitsã a, Yosef nyɛ ye akũ etsa bawaẽ, ade enye be lemɛ etsa Legã Farao a.

XIV Yosef bi be kĩ nte benaa ni, bekpã olɛga Yakob mo ye akũ bati flee a kĩ baana nde bati aduesoũ-elo beyamena ne Egipte.

XV Foesũ Yakob mo ye babi dzakũ benaa Egipte benadzi ne awã kenawo kĩ biku.

XVI Ke liti a, bekɔa be banokpa beyamena ne Sekem beyabila ne linike a kĩ Abraham ya mo sika etomena Hamor babi sekẽ a kame.

XVII “Kĩ lokɔ a kĩ Baguma sui mo Abraham wo oto kiyua a, Israelfo ne Egipte a ma besa beblebee.

XVIII Foyaya lemɛ kĩ legã voẽ Farao a kĩ enya Egipte akũ a tányi Yosef kolaa.

XIX Farao kĩ tsã tedake kame ekena boe bawanyo tenya, efõ benye be babi bakokɔa ne toto kame ayekĩ baaku.

XX “Ade lokɔ a na kame bema Mose a. Obisẽ kĩ kale kadã paa. Ne foesũ ye bamanɛ kola ye ne kola kame tideto elale.

XXI Kĩ benye ye ne be akũ a, Farao obitsole namo ye ebɔɛ, ade edɔɔla ye nde ye moawe semɛ kame obi a.

XXII Betsa ye Egiptefo kadikanyi mo be kadzi kame fokénatsa a flee, ade eyabo anɛ ekena oti a. Ena ovio ne kodzela kale mo fokénatsa pii kame.

XXIII “Kĩ Mose te futeli tena a, kakona wo ne ye kame kĩ enaasela ye bawaẽ Israelfo edã.

XXIV Kĩ ewo awã a, emó kĩ Egipteni odi lamena Israelni odi awoda kakena foesũ enabumɔ Israelni a, ade ebo Egipteni a ekɔ a.

XXV Mose kɔna kī bawae a aanu foe kayɔ kī Baguma lewe kī yatsā ye akū ete be leme betānu foe kayɔ lɔmɔ.

XXVI Kī kade nyina a, ebuki emó kī Israelfo bati nviā lamena kavū. Enaakpola lema a ade ebi be kī, ‘Midā, bawae mɔ bawae miane, nde sū miakena akū awɔda lɔmɔ?’

XXVII “Leme ekī ewe sowā a du Mose edzela ne ɔwē ade evia ye kī, ‘Fɔɔdabe tsela nɔ? Owei lekena nɔ boe akū ɔnyane mɔ foletsa ɔdzene?’

XXVIII Mbɔe awe kī ako yī nde ayekī ɔko Egipteni a kadzo a?’

XXIX Kī Mose nu foletsa kī a, libe wo ye paa, foesū elo enaa Midianfo tite akū, awā kī enadzi nde ɔnɔɔē aye, ema babinyole nviā.

XXX “Futeli tena liti a, ode foto ɔnyane odi nye ye akū etsa Mose ne tuwī mɔ fu kī tekatē ne kɔsa a kī kufuā Sinai ɔto a kame.

XXXI Kī Mose mó fukī a, fɔkena ye saa foesū efuā kī yanaadā letsa a kadā wī. Ade Baguma ve ye ebi ye kī,

XXXII ‘Yī nye nɔ bawanyɔ a Baguma, Abraham mɔ Isak mɔ Yakob Baguma.’ Mose katila blibli bli mɔ libe foesū etápuli ebuki edā awā kadā wī.

XXXIII “Ade Baguma bi ye kī, ‘Nye nɔ mpabua ne abɔa, kitonekī awā kī ɔdzē a ni, tite kpalewa tane.

XXXIV ɔnɔkɔali mmó yī bati a lubo kamɔ mɔ tenya a kī bakena be ne Egipte tite akū a. Nnu be kɔnyakabe foesū iya kī mayaanye be. Finyaakī ya, lokɔa ndo nɔ foto ne Egipte.’

XXXV “Ade Mose a kī bisī kī bivia kī, ‘Owei lekɔa nɔ edzela nde boe akū ɔnyane mɔ foletsa ɔdzene?’ Ade ye Mose kī a Baguma do kī

enaanya be akū, lōkōa enye be ne ɔhau kame fotsāmena ode foto ɔnyane a kī enye ye akū etsa ye ne tuwī a kī tekatē a kame a.

XXXVI Mose kpā bati a bēdzakū ne Egipte. Ekena awāwā fotsa pii ne Egipte mō Mpo Ngbā a abuwī mō kōsa kame ne be osi katsā futeli tena a flee kame.

XXXVII “Ade Mose kī mōape a libi Israelfo kī, ‘Baguma aanye onukpē ɔnyene odi nde ayekī enye yī a etomena mimōa a kame.’

XXXVIII Mose nye oti kī ena ne boe bawanyo a sekē ne lōko a kī Israelfo na ne kōsa kame a. Ade ye mō Baguma foto ɔnyane lemō kōdzela ne Sinai ɔto akū, ete Baguma nkpā kale a ema boe a.

XXXIX “Leme boe bawanyo tawe kī batse Mose, mbom bisī ye, ade bewē kī bamuniki benaa Egipte tite akū a.

XL Foesū bibi ɔwaē Aron kī, ‘Kena baviō kī baakpā boe, kakpa boe, kitonēkī bunyina letsa a kī leya ne Mose a kī ekpā boe etomena Egipte a akū.’

XLI Ade ke beme baviō nde ɔnantsue obi aye, bekaboa afolie kakpa ye a. Bemó kawole benya luwi bekpa letsa a kī be mōa bekōa awe bekena a.

XLII Ne fukī sū Baguma muniki ne be liti, efō bekasum suwa mō odeto mō fusibii, nde ayekī betsele ne Baguma onukpē banyene Ovoli a kame kī,

‘Israelfo, nné yī mikōa bayae mibōa afolie mikpa ne futeli tena a kī mina ne kōsa kame a.

XLIII Mbom Molok pata mō Romfa fusibii baviō a kī mikena a mikaboa afolie kakpa.

Foesũ maafõ bipili mi ndom bekpã mi benamena
mo lugo ne Babilonia liti flee.’

XLIV “Boe bawanyo na patampa kĩ ye kame
Baguma kanye akũ katsa be ne kosa a kame. Bike
patampa kĩ nde ayekĩ Baguma nye etsa Mose kĩ
ekena perepepe a.

XLV Patampa kĩ, kĩ boe bawanyo te bitomena
be balega sekẽ a na ne be awe, ne loko a kĩ Yosua
kpã be a, ade bete bati a kĩ Baguma blomena
ne be loto a tite a. Patampa kĩ na ne be kame
keyawo Legã Dawid loko.

XLVI Dawid fokenasata wo Baguma ane, ade evia
Baguma kĩ ekpa ye osi eke kadzikõ wĩ ekpa Yakob
Baguma a.

XLVII Lemε Salomo leyake kola a ekpa Baguma.

XLVIII “Lemε Baguma Kpale lãdzi ne fola kĩ
batidziwa ke a kame. Baguma onukpẽ onyene
le kĩ,

XLIX ‘Ode nye yĩ legãkpo,

ade tite lemε nye yĩ aboa katekõ a.

Kola koodabe odu miapuli mike mikpa yĩ,

mbõεε kadzikõ mo nlá?

L Nné yĩ moawe lekena fukĩ bame flee a?’ ”

LI Ade Stefano buki ebi be kĩ, “Bati kĩ mideĩ ato
osĩ miane! Misĩ kĩ miatse Baguma kale nde ayekĩ
mi balega kena a. Daa miayidza kadza ne Hũhũ
Kpalewa akũ.

LII Baguma onukpẽ onyene oodabe mo mi
bawanyo tatomo ye liti? Beko Baguma onukpẽ
banyene a kĩ bele biyi kĩ Oti a Kĩ Bepau kĩ ye akũ
kpale a aaya. Oti Kĩ Bepau kĩ malo, minye ye
mikpa beko ye.

LIII Ɔnoƙoali fɔane kī mi a kī mite Baguma mbla mitomɛna ye ode foto banyane sekē a, misī ye akū kakɛna.”

Bɛtalɛ Stefano Boe.

LIV Kī binu Stefano fɔletsɛ a kī ɛɛ nɛ be akū a, be tɔwɔɛ hulu, ade bɛkaba adɔ dzadzadza mɔ kalɔkpa a.

LV Lɛmɛ Stefano kī Hūhū Kpalɛwa yi ye kamɛ, dzɛla anɛ ɛdā ode koeɛ ade ɛmɔ Baguma kukūkpale a mɔ Yesu kī ɛdzɛ nɛ Baguma somona a.

LVI Ade ebi be kī, “Midā! Mamɔ kī odetɔ kamɛ binya ade Otidziwa Obi a dzɛ nɛ Baguma somona a!”

LVII Bati a bɔa fɔwɔla kɔɔba, bisua atɔ ade biwula atɛ bɛnapi ye a.

LVIII Bɛvɛɛ ye bɛnɛmɛna nɛ ɔmato a kamɛ ade bɛtalɛ ye boe a. Bati a kī bɛvɛɛ ye bɛnɛmɛna a nyɛ be tɛtadiɛ wulaa biyi nɛ opopo odi kī bave Saulo sekē.

LIX Kī bɛkatalɛ Stefano boe a, ɛbɔa mpae ɛɛ kī, “Boe Ɔlate Yesu, tɛ yī hūhū.”

LX Ade ke eke aduli ɛbɔa fɔwɔla kɔɔba ɛɛ kī, “Boe Ɔlate, tase be tɔkpa kī akū kɔtɔ!” Kī ɛɛ fukī eyua a, ade eku a.

VIII

I Lɔkɔ a kī bɛkɔ Stefano a, Saulo mɔ kawɔɛ nɛ ye wuda akū.

Saulo Tɔmɔ Batɛ Badonɛ a Liti.

Kito luwi a na, ade bido batɛ badonɛ a liti katomɛna awɛ nɛ Yerusalem a. Batɛ badonɛ a flee pansam bilo bɛnaa Yudea mɔ Samaria tite akū. Lɛmɛ foto banyane a kɔ kaho nɛ awā.

II Bikĩ bavila Baguma a kame badi boe Stefano onokpa a benabila, ade bibe ye paa a.

III Ade Saulo koo ete ne ye akũ mo osĩ mo osĩ kĩ yakoo bate badone a. Foesũ ekawo ne toto tidi nye tidi kame kapili batsole mo banyole flee kavele be kanaado ne kola kame.

Filipo De Letsa Ne Kale Wĩ a Akũ Ne Samaria.

IV Leme bate badone a kĩ bilo ne Yerusalem a tsã bimini bekale kale wĩ a ne Yesu akũ.

V Ade Filipo naa Samaria omato odi kame enabi bati a Kale Wĩ ne Kristo akũ a.

VI Bati pii tse ye foletsa a kĩ ele a ne awãwã fotsa a kĩ ekena bemó a sũ.

VII Eblomena hũhũ kpa etomena bati pii kame. Hũhũ kpa a kaboo fowola kooa nte banne ne bati a kame. Etsa bati kĩ biveliveli mo bikĩ bene lekpẽ leme.

VIII Ne fukĩ sũ Samaria omato a kame bati mo kawole paa!

IX Kanokone odãne odi kĩ bave Simon na ne Samaria omato a kame Ye kanokone kadã a kakena bati wãwã kĩ fofó yabu ye akũ kĩ oti mo kobẽ odi odu yane.

X Samariafo batsole mo banyole flee abu ye ne fukĩ sũ, ade bale ne ye akũ kĩ, “Ye nye Baguma kobẽ a kĩ bave Kobẽ Kpalede a.”

XI Ne ayekĩ ye kanokone kadã awo be ane sũ ni, bati atse ye oledo.

XII Leme finyaakĩ kũ, bete Filipo fotsa katsa ne Baguma legãkanya akũ a ne Yesu Kristo dĩ akũ bido. Ne foesũ batsole mo banyole pii te mui kawola amanie.

XIII Simon kũ leme te edo ade ete mui kawola amanie a. Etsã etomo Filipo bekamini ade Filipo

awãwã fotsa kpale a kī ekakena a fõ akū dzuli ye a!

XIV Kī foto banyane ne Yerusalem nu kī Samariafo te Baguma kale a bido a, bido Petro mo Yohanes kī benaasela be.

XV Kī biwo awã a, beboa mpae ne bate badone võe a loló kī bete Hūhū Kpalewa a.

XVI Tito kī bekena be mui kawola amanie a ne Yesu dī akū malo ni, betáte tō Hūhū Kpalewa a.

XVII Foesū Petro mo Yohanes te awe ne be akū ade bete Hūhū Kpalewa a.

XVIII Kī Simon mó kī awe foto banyane a ate ne bati akū fomó bate Hūhū Kpalewa a sū ni, ebɔe sika ekpa,

XIX ade ebi be kī, “Mikpa yī kobẽ kīi odu ayekī nte nte awe ne bati akū ni, baana Hūhū Kpalewa a.”

XX Ade Petro bi ye kī, “Mimó nɔ sika a flee míawɔ, kitonekī okona kī aapuli oya Baguma futetsa mo sika.

XXI Oláapuli okena adzuma kīi, kitonekī nɔ owole kame léwaa yededeede ne Baguma ane.

XXII Fone adzuni kpa a kī ewo ne nɔ kame a awe kaboa mpae kakpa boe Olate, osa yaakoa nɔ owole kame kakona kpa kī ete nɔ,

XXIII kitonekī mmó kī anengbã mo titikpa kakena nya nɔ kame kame!”

XXIV Ade Simon bi Petro mo Yohanes kī, “Mike boe Olate aduli mikpa yī ayekī kadumu fɔletsã kī mile kīi fudima lelaaya ne yī akū.”

XXV Kī Petro mo Yohanes le boe Olate kale wī a, bidi adansie leme ne ke akū ne Samaria biyua a, bimuniki benaa Yerusalem. Benatsã Samaria tukula pii kame bekade letsã ne Kale Wī a akū.

Filipo Lomena Mo Etiopia Onokoe Odi.

XXVI Ade boe Olate ode foto onyane odi yabi Filipino ki, "Yidza, kaka ne kayo, katsa kosa kame osi a ki eto Yerusalem enaa Gaza aku a."

XXVII Ade ke eyidza epi osi a. Ki yanaa a, enatselamena onyole odi ki yaya. Onyole ki nye Etiopia legatsole ki bave Kandake, sika aku fotsa odamenane onokoe. Onokoe ki naboa mpa ne Yerusalem.

XXVIII Emuniki yatsa, ade edzi ne ohilili ki baponko avele kame, ekaka Baguma Onukpe Onyene Yesaya ovoli a.

XXIX Ade Huhuh Kpalewa a bi Filipino ki, "Tsa kanaapi ohilili a."

XXX Foesu Filipino wula atse enaa ye seke ade enu ki onokoe a kaka Baguma Onukpe Onyene Yesaya ovoli a ki etsela a. Ade evia ye ki, "Anu foletsa a ki lamena kaka a kayo?"

XXXI Onokoe a kpa mbuaye ki, "Oowo, nde maakena nnu foe kayo nte odima tanye foe kame etsa yi?" Eke Filipino aduli ki ede ewo ne ohilili a kame edzi ne ye owe.

XXXII Foletsa a ki foe ekaka ne Katsela Kpalewa a kame nye ki,

"Bekpa ye nde kuveli aye banamena kakoko.

Edze dii nde kavelibi ne ke tetsa bakpeline
ane

ade ayea leme etabinya onukpe a.

XXXIII Ne ye aku kadola su, betadze bekpa ye
otebe

Owei aale kadi etomena ye babi mo bawa
aku,

Kitonekĩ bete ye nkpã ne ye awe ne katinya kame.”

XXXIV Ɔnokɔẽ a via Filipino kĩ, “Bi yĩ. Owei akũ fɔletsɔ onukpẽ ɔnyene a lamena kɔdzela kale, ye moa akũ mbɔɛɛ kĩ oti bebã?”

XXXV Filipino yi kayɔ etomena fɔletsɔ kĩ akũ, ade ekɔa fɔbebã pii ebu, ebi ye Kale Wĩ a ne Yesu akũ a.

XXXVI-XXXVII Kĩ banaa ne osi a benawo kako kadi kĩ mui dzẽ ne osi ɔwẽ. Fɔtsa akũ ɔdãmenane ɔnokɔẽ a bi Filipino kĩ, “Aádã mui badi ne awĩ! Litsa sũ nláapuli nte Baguma mui kawɔla amanie a?”

Ade Filipino bi ye kĩ, “Nte ɔte odo mo no ɔwɔle flee kɔ ni, aapuli ɔte”

XXXVIII Ɔnokɔẽ a bi ye kĩ, “Nte ndo kĩ Yesu Kristo nyé Baguma Obi a.” Ade awã efɔ ohilili a dza a. Biduma benawo ne mui a kame ade Filipino wɔla ye mui ne Yesu dĩ akũ a.

XXXIX Kĩ bene ne mui a kame a, Boe Ɔlate Hũhũ a bɔe Filipino edzakũmena, ade ɔnokɔẽ a tabuki emɔ ye a. Etɔasu ye osi enaa mo kawɔle.

XL Ke liti a, Filipino mo eyi ɔsũ kĩ eyane eta ne Asoto ɔmato kame. Etsã emini eto awã ekale Kale Wĩ a ne temato a kĩ tideĩ ne osi akũ a flee kenawo Kaisarea ɔmato a kame.

IX

Saulo Dani Ɔwɔle Kame.

^I Ne lɔko a na kame, Saulo kɔa kɔneyɔɔle etomo bate badone a liti kĩ yawɔla be.

Enaa Yudafɔ Ɔsɔfonokɔẽ Flee a sekẽ.

^{II} enavia kĩ bekpa ye otumi tuvoli, lɔkɔa enaa Yudafɔ fotsenakɔ ne Damasko, enaapili bikĩ betsẽ

ne boe ɔlate osi vɔẽ a akũ, batsole mɔ banyole flee, esuli be ɛyamena ne Yerusalem.

III Lɔkɔ a kɪ Saulo fuã Damasko ɔmato a eyua mɔ kakɔna kɪ a ni, deedimɔape ɔhaɪ odi mɔane eto ode etsua esinya ye.

IV Eka eto ade enu ɔledo odi kɪ, “Saulo, Saulo litsa sũ otomɔ yɪ liti?”

V Ade Saulo via kɪ, “Boe ɔlate, nɔ owei ane?”

ɔledo kɪ kpa mbuaye kɪ, “Yɪ nye Yesu a kɪ ye liti otomena a.

VI Yidza finyaakɪ kanaa ɔmato a kame, lɔkɔa baabi nɔ letsa a kɪ kene kɪ akena.”

VII Banyole a kɪ bemɔ Saulo betɛ a fɔ bedza lemɛ baámɔ letsa a kɪ de bale. Binu ɔledo a lemɛ betámɔ oti odima.

VIII Ade kɪ Saulo yidza ne tite ebinya banebi a, ebuki yaámɔ fɔkɔ. Foesũ bipi ye ne kɔkpɔ bekpã ye benamena Damasko ɔmato a kame.

IX Edzi fuwi elale kɪ yaámɔ fɔkɔ, yaánya, yaámɔa lemɛ.

X Ne lɔkɔ a na kame ɔte odone odi kɪ bave Anania na ne Damasko. Boe ɔlate nye ye akũ etsa ye eve ye kɪ, “Anania!”

Anania tuno ele kɪ, “Boe ɔlate, amɔ yɪ ne awɪ!”

XI Ade boe ɔlate bi ye kɪ, “Yidza katsã oblɔnu a kɪ bave ɔblɔnu Kpɪ a akũ, lɔkɔa nte owo Yuda toto kame ni, via Saulo kɪ eto Tarso a akũ.

XII Edeɪ ne awã elamena mpaɛ kabɔa, kitonekɪ ñnye ntsa ye emɔ ne hũhũ kame kɪ onyole odi kɪ bave Anania aayate awe ne ye akũ ebuki emɔ fɔkɔ.”

XIII Ade ke Anania kpa mbuaye kɪ, “Boe ɔlate, nnu foletsã pii ntomena oti kɪ akũ ne ayekɪ ekena nɔ bati awɔda ne Yerusalem a!

XIV Ade bunu kī ete otumi tuvoli etomena Basofonokōē sekē kī epili nō bate badone flee ne Damasko a.”

XV Lemε boe ɔlate bi ye kī, “Naa nō kō kanaakena ayekī mbi nō a, kitonekī mpau ye kī eyaanya yī ɔsumune ele kale wī a etsa bikī benyé Yudafō, fōgā, mō Israelfō flee.

XVI Ade yī mōawe a maanye lubo a kī yaamō ne yī sū a ntsa ye a.”

XVII Foesū Anania pi osi enawo ne toto a kī te kame Saulo na, ade ete awe ne ye akū ebi ye kī, “Nwaē Saulo, Boe ɔlate Yesu kī enye ye akū etsa nō ne osi a lido yī ne nō sekē kī buki kamō fōko, lōkōa Hūhū Kpalēwa ete nō kame.”

XVIII Deedimōape fōkena Saulo nde tupo letse ne ye ane tene teto, ade edo fōko kamō awe a. Eyidza ekpa osi bekena ye mui kawōla amanie.

XIX Ade kī enya eyua a, akū de ye ɔsī.

Saulo De Letsā Ne Kale Wī Akū Ne Damasko.

Saulo dzi ne bate badone a sekē ne Damasko fuwi fudi.

XX Ne fuwi a kame a, enaa Yudafō fotsenakō a, ade enale kōdzela etsa kī Yesu nye Baguma Obi a.

XXI Fōkena bati flee a kī binu ye fotsa katsa a saa, ade bivia be akū kī, “Nné oti kī tsē yakō bikī bēte Yesu bido a ne Yerusalem a mbōeε? Nné ye lemε leya ne awī mō botae kī yayaapili bate badone a ema basofonokōē a mbōeε?”

XXII Lemε Saulo fotsa katsa na kōbē ade ye fōletsa kame kanye kī Yesu nye Kristo a táfō Yudafō a kī bena ne Damasko a letemo ye atsindze a.

XXIII Fuwi fudi liti ni, Yudafɔ a natsena ade bipi adzuni kɔ̄ bako ye a.

XXIV Leme bati boe beyabi Saulo. Lenye mo suwa flee bekadzɔle omato a seebi a kɔ̄ bike bisinya a tunyukpɛ̄ ayekɔ̄ baana ye beko.

XXV Leme lenye moa kayite a, bikɔ̄ bitomo Saulo a boe ye bido ne otsetse kame betsamena seebi oke kame bekamena ye bedzela ne tite!

Saulo Naa Yerusalem.

XXVI Kɔ̄ Saulo naa Yerusalem a, ewe kɔ̄ yanaawo ne bate badone a kame ne awã. Leme be flee bivila ye kitonekɔ̄ betate bido kɔ̄ ote odone yanɛ.

XXVII Ade Barnaba bumɔ ye ekpã ye enamena foto banyane a sekɛ̄ a. Ebi be ayekɔ̄ Saulo mo boe ɔlate a ne loko a kɔ̄ yanaa Damasko, mo ayekɔ̄ boe ɔlate lemɔ ye kodzela leme a. Ebi be leme ayekɔ̄ Saulo le kodzela mo kobɛ̄ ne Yesu dɔ̄ akũ ne Damasko.

XXVIII Ade betɛ ye ena ne be kame a. Kito ke a, ena ne be kame, emini ne Yerusalem flee ekale Baguma foletsa a ne boe ɔlate dɔ̄ akũ mo kobɛ̄.

XXIX Ade Yudafɔ badi kɔ̄ bale Griki, kavele foletsa mo Saulo a, leme bewɛ kɔ̄ bako ye.

XXX Kɔ̄ bate badone a badi nu fukɔ̄ a bekpã Saulo benamena Kaisarea ade benye ye osi enaa ye oto Tarso a.

XXXI Foyaya kɔ̄ ne loko a na kame, bate badone a kɔ̄ bena ne Yudea, Galilea mo Samaria na ne lukudo kame. Ne Hũhũ Kpalewa kobɛ̄ akũ sũ ni, bena owɔle kado. Bepɔ bibu ade bekoɔ obu bekpã boe ɔlate a.

Petro Naa Lida Mo Yopa.

XXXII Petro mini εναα foko pii. Ne foe kame a, εnasela bate badone a ki bidei ne omato odi ki bave Lida kame.

XXXIII Awã na εmo onyole odi ki bave Ainea. Ade futeli elẽ flee ki eveliveli ki yaápuli eyidza ne okena akũ a.

XXXIV Ki Petro mo ye a, ebi ye ki, "Ainea! Yesu Kristo tsa no foso! Yidza kadza kabuta no okena." Deedimope Ainea yidza edza, ne akũ osi kame.

XXXV Bati a flee ki bidzi ne Lida mo Saron a, mo Ainea foesũ bekoa be akũ bekpã boe late.

XXXVI Ke liti a, otsole odi ki bave Tabita na ne Yopa. Ne Griki tide kame ni, bave ye Dorkas ki de kayo nye kayisie. Enye ote odone ki yakena tuwi daa, kabumena ahiãfo leme.

XXXVII Foso yaboa ye ade eku a. Foesũ ye bati wola ye mui bihihie ye bewola ne kola kame ne abansulu ode.

XXXVIII Yopa mo Lida kayite tavelẽ, foesũ ki bate badone a nu ki Petro na ne Lida a, bido bati nvia mo edo ne ye sekẽ ki, "We sowa kaya ne boe sekẽ."

XXXIX Ade ke Petro yidza emanẽ akũ etomo be a. Ki ewo awã a bekpã ye benamena kola ki koe kame bewola Dorkas a. Bakunawa batsole dza bisinya Petro ne awã bekabe ade betsa ye tetadie flee a ki Dorkas kapamu ne loko a ki edzi nkpã a.

XL Ade Petro nye be flee ne kola a kame, eke aduli εboa mpae a. Edani etselamo onokpa a ade ele ki, "Tabita! Yidza!" Awã na ebinya ane ade ki εmo Petro a, eyidza edzi.

XLI Ade Petro pi ye ne kokpo edzela ye a. Foesũ Petro ve bate badone mo bakunawa a, ade ekoa

ye nkpã ode edo ne be awε a.

^{XLII} Fɔletsɔ kɔ̃ gba ne Yopa flee ade bati pii tɛ boe ɔlate bido a.

^{XLIII} Ke liti a, Petro dzi ne Yopa fuwi pii ade εna ne Simon adi kɔ̃ yakɔa bayae tuvoli kapamu fɔtsa a sekẽ a.

X

Petro Naa Kornelio Sekẽ.

^I Lɔkɔ a na kamε, onyole odi kɔ̃ bave Kornelio na ne Kaisarea ɔmato a kamε. Enye Romafɔ kawũ ɔnɔne ɔnokɔẽ.

^{II} Enye oti wɔ̃, ade ye mɔ ye kola flee basum Baguma a. Oti kɔ̃ abumɔ Yudafɔ ahiãfɔ kɔ̃ futo ye ɔwɔle kamε, ade yabɔa mpaε luwi daa lemε a.

^{III} Luwi a, kɔ̃ kanaa olobe tɔdɔũ elale kamε a, εna hũhũ kamε kanyekatsa, εmó yededeede kɔ̃ ode fɔtɔ ɔnyane odi yabi ye kɔ̃, “Kornelio!”

^{IV} Kornelio dã ye koe mɔ libe ade evia ye kɔ̃, “Boe ɔlate, litsa fɔane?”

Ode fɔtɔ ɔnyane a bi ye kɔ̃, “Nɔ semε kale kakena mɔ mpaεbɔ a wo Baguma sekẽ.

^V Do bati benaa Yopa benaakpã onyole odi kɔ̃ bave Simon Petro beyamena.

^{VI} Edeĩ ne Simon kɔ̃ yakena bayae tuvoli akũ adzuma ne mpo abuĩ a sekẽ.”

^{VII} Kɔ̃ Baguma ode fɔtɔ ɔnyane a dzakũ a, Kornelio ve ye kola basumune nviã mɔ kawũ ɔnɔne mɔa kɔ̃ enye oti kpɔ̃ kɔ̃ yadzɔle ye akũ lemε.

^{VIII} Ebi be letsɔ a kɔ̃ leya a, ade edo be kɔ̃ benaa Yopa a.

IX Kĩ kade nyina a kĩa bekoḃa bafuã Yopa a, Petro de enaa letsã ode ne awã kĩa ese a, enaabḃa mpaḃe mo suwa toḃoũ ewua-nviã loko a. **X** Kḃe kako ye ade ewe litsedi kĩa yanya a. Lemḃe kĩa bekatḃo funitsã a, ena kanyekatsa.

XI Awã na emó kĩa odetó binya, ade emó kĩa bekayḃona litsedi nde lima kpale kĩa bipini de ne ato ena a. **XII** Bayae aholḃo aholḃo, boḃe mo kovolabi lemḃe na ne lima a kame.

XIII Ade ḃledo odi bi ye kĩa “Petro Yidza, ko, kaba!”

XIV Lemḃe Petro kpa mbuaye kĩa, “Oowo! Kuse! Boḃe ḃlate yĩ onukpḃḃe táta oyae sekena kĩa boḃe Yudafḃo boakesĩ a da!”

XV ḃledo a buki ele kĩa, “Letsa a kĩa Baguma kpale de akũ ni, tabu kĩa effĩ deĩ ne de akũ!”

XVI Ena kanyekatsa kĩĩ titi elale, ade bevele fotsa a benamena ode a.

XVII Loko a na kame foletsa kĩĩ kakena Petro basa basa, ade evia ye akũ kĩa, “Litsa fukĩĩ atsa?”

Ade ke kame a mo bati a kĩa Kornelio do foto a yawo omato a kame a. Kĩa bemó toto a kĩa bawe a, benadza ne te onyukpḃḃe,

XVIII ade bekavia katse awã kĩa Simon Petro dzi a.

XIX Petro buki edzimo lolo kame kakona ne kanyekatsa a kayḃo kanu akũ, ade Baguma Hũhũ a bi ye kĩa, “Bati elale ya belamena no kawḃe.

XX Yidza katselamo be. Tavila be katomena kanaa kitonekĩ yĩ lido be.”

XXI Ade Petro duma eka enabi be kĩa, “Yĩ nyḃe oti a kĩa milamena kawḃe a. Litsa sũ mitsḃḃe?”

XXII Bekpa ye mbuaye kĩa, “Kornelio kĩa enyḃe Romafḃo kawũ onḃone onokḃḃḃe lido boḃe foto. Enyḃe

oti kī edzi kpī, yasum Baguma, ade Yudafo flee akpa ye obu a. Baguma ode foto onyane odi bi ye kī edo bato ne no sekē, lokoā etse no onukpē kame foletsā.”

XXIII Foesū Petro kpa be kasekō ne ye sekē ade ete be nde ye banovōē aye a.

Kī kade nyina a, ye mo bate badone badi kī bito Yopa mo bato a bipi osi.

XXIV Luwi leyade a, benawo Kaisarea, awā kī Kornelio kpota ye toto kame bati mo bakoba badi bidzi bekadzole Petro kaya a.

XXV Kī Petro aawo ne toto a kame a, Kornelio natselamo ye, eke aduli ne ye aboa kayo ade ekena lolo a.

XXVI Leme Petro dzela ye ebi ye kī, “Yidza kadza! Yī malo otidziwa mane.”

XXVII Kī bekalomena a, Kornelio kpā ye ewomena ne awā kī bati nkae a kpota bidzi badzole be a.

XXVIII Ade Petro bi be kī, “Minyina yededeede kī boe Yudafo mbla tákpa yī osi kī nnaa odi bikī benyé Yudafo a sekē iye nkōa akū mboamo be. Leme Baguma nye etsa yī kī ntabu odima kī ye akū tákpaē.

XXIX Ne foesū kī bato a yave yī a, ntásī. Litsa sū odo bati kī beyaave yī?”

XXX Ade Kornelio bi ye kī, “Nviā fuwi elale, fōana nde tōdōū elale kame, nkaboa mpaē ne yī awā. Deedimōape onyole odi kī edeī ne tetadie owoe kī tata muamua kame ne eta ne yī ane kame,

XXXI-XXXII ade ebi yī kī, ‘Kornelio, Baguma nu no mpaēbo, eyi no seme kale kakena leme osū.

Do bati benaa Yopa benaakpã odi kī bave Simon Petro. Eyase ne Simon kī yakɔa bayae tuvoli kapamu fɔtsa ne mpo abuĩ a sekẽ.’

XXXIII Ade foesũ ndo batɔ ne nɔ sekẽ letaleta a, ade odi foe akũ ɔya mɔatse lɛmɛ a. Foesũ boe flee budzi ne awĩ ne Baguma anɛ kame kī yaaabi boe letsa a kī ebi nɔ kī bi boe a.”

Petro Kpale Baguma Kale Wĩ a Kame.

XXXIV Ade Petro bi ye kī, “Finyaakĩĩ mmó ãyi ɔsũ kī Baguma ládã bati anɛ.

XXXV Mbom oti kī edola ye akũ ekpa Baguma, yakena ne ye kawɛ akũ lɛmɛ ni, ade ye Baguma awɛ a.

XXXVI Mate kado kī minu kale a kī ɛma Israelfɔ kī fɔnyɛ lukudɔ Kale Wĩ a kī fɔtsẽ Yesu Kristo akũ a. Ade ye lɛmɛ nye katinya kame bati flee ɔlate a.

XXXVII Ade minyina kale kpale a kī fɔya ne Israelfɔ tite akũ, kī kiya kayɔ ne Galilea, kito loko a kī Yohanes de letsã ne mui kawola amaniɛ akũ a.

XXXVIII Minu lɛmɛ ayekĩ Baguma kɔa ye Hũhũ mɔ kobẽ eko ne Yesu kī eto Nazaret a akũ. Etsã emini ne kako nye kako ekakena tuwĩ, ade etsa bikĩ hũhũ kpa kaha be a, kitonekĩ Baguma tomo ye.

XXXIX “Boe bɔnyɛ adansifo bɔkpa fɔtsa a kī ɛkena ne Israelfɔ tite akũ mɔ Yerusalem a. Ade ke bekɔ ye ne ye kabɔa kamena ne asendua akũ a.

XL Lɛmɛ Baguma dzela ye eto kanokpa ne luwi lelalede akũ, ade efɔ ɛnyɛ ye akũ etsa bati a.

XLI Leme nné bati flee lomo ye, mbom boe a kī Baguma pau nde adansifo a lemó ye. Budo awe bonya, bomoa mo ye kī eyidza eto kanokpa liti a.

XLII Ade boe edo kī bonaale Kale Wī a ne kako nye kako, budi adansie leme kī Baguma kena Yesu batidziwa mo banokpa flee folets a odzene.

XLIII Baguma onukpē banyene flee le ne ye akū kī odi nye odi kī yaate ye edo ni, Baguma aakoa ye tokpa ete ye ne Yesu dī akū.”

Hūhū Kpalewa a Ka Eko Ne Bikī Benyé Yudafo a Leme Akū.

XLIV Ade kī Petro kale kodzela a, Hūhū Kpalewa a ka eko ne bati a flee kī bidzi batse ye folets a akū.

XLV Fokena Yudafo bate badone a kī bitomona Petro ne Yopa beyaa a saa, ne ayekī Baguma Hūhū Kpalewa a ka eko ne bikī benyé Yudafo leme a akū.

XLVI Kitonekī binu kī bekale kodzela ne tide aholo aholo kame ade bekamu Baguma Kpale a. Ade ke Petro le kī,

XLVII “Ayekī bati kī te Hūhū Kpalewa a nde ayekī boe malo bote a sū ni, bóapuli busī kī boákena be mui kawola amanie?”

XLVIII Foesū ekpa osi kī bekena be mui kawola amanie ne Yesu Kristo dī akū. Ke liti a, bewā ye kī edzi ne be sekē fote fuwi fudi.

XI

Petro Nye Folets a Kame Etsa Bate Badone a Ne Yerusalem.

I Owi tábuna mɔ foto banyane a mɔ bate badone bebã ne Yudea nu kî bikî benyé Yudafo a leme te Baguma Kale Wî a.

II Leme kî Petro muniki eya ne Yerusalem a, Yudafo a kî bena ne awã a tátuno mɔ ye, ade bibi ye kî,

III “Onakɔa nɔ akû otsekamɔ banɔvɔẽ kî bitómèna Yudafo fotsa katsa a, ade odo awe onyamɔ be malo a!”

IV Ade ke Petro nye foletsa kame etsa be kî,

V “Lɔkɔ a kî nna ne Yopa nkabɔa mpaɛ a, nna kanyekatsa. Ne foe kame a, mmó kî bekakena lima dzelewa baũ lidi kî bipini de ne ato ena, ade leka leyakpula ne yî owẽ a.

VI Bayae kumekume na ne lima kpale kî kame, bayae kî bideĩ abɔa ena, bikî betsẽ ne seme akû, mɔ kɔvɔlabi kî bɔába malo.

VII Ade nnu ɔledo odi ebi yî kî, ‘Petro! Yidza kako kaba!’

VIII “Leme nkpa mbuaye kî, ‘Oowo! Kuse! Boe ɔlate, yî onukpẽ táta oyae kî boe Yudafo bɔakesĩ a da.’

IX “ɔledo a buki ele kî, ‘Nte letsa a kî Baguma kpale de akû ni, tabu kî efĩ deĩ ne de akû.’

X Fotsa kî kená lomo titi elale flee. Ke liti a, bevele lima kpale kî mɔ bayae a flee benamena ode.

XI “Ade lɔkɔ a na kame pɛpɛpɛ mɔ batɔ elale a kî bito Kaisarea beyaakpã yî a wo tɔtɔ a kî te kame nse a.

XII Baguma Hũhũ a bi yî kî ntasĩ, mbom ntomo be bonaa. Bate badone evũ a kî bito Yopa a, tomo yî bonawo oti a kî ye lido batɔ a tɔtɔ kame.

XIII Ye malo ebi boe ayekĩ Baguma foto onyane nye ye akũ etsa ye, ebi ye kĩ, 'Naawe odi kado ye ne Yopa enaave onyole odi kĩ bave Simon Petro.

XIV Yaabi nɔ ayekĩ mimɔ nɔ tɔtɔ kame bati flee miana kate.'

XV "Ke liti a, ĩyi kayɔ mɔ be Baguma folets a kabi. Hũhũ Kpalɛwa a ka eko ne be akũ nde ayekĩ eko ne boe flee akũ ne kayɔkayi a.

XVI Ade ke nte anɛ ne lets a kĩ boe ɔlate le eyi kĩ, 'Nuwĩnuwĩ, Yohanes kɔa mui ewɔla bati mui, leme Baguma aakɔa Hũhũ Kpalɛwa ewɔla mi mui.'

XVII Ade kĩ Baguma lekpa bikĩ benyɛ Yudafo a futetsa kĩ nde ayekĩ ekpa boe kĩ botɛ boe ɔlate Yesu Kristo budo sũ ni, yĩ nye oweĩ kĩ masua Baguma osi!"

XVIII Kĩ binu folets a kĩ a befɔ atsindze kate ade bimu Baguma bele kĩ, "Ɔnɔkɔali, Baguma binya osi ekpa bati bebã leme kĩ bedani towɔle kame lokɔa bena nkpã kĩ ela kawũna a!"

Bate Badone Ne Antiokia Pɔ Bibu.

XIX Ne lokɔ a na kame kĩ fukĩ bame lamena kaya a, bate badone a kĩ bilo tenya kakena ne Stefano wuda sũ a, lo benaa Foenike, Kipro mɔ Antiokia temato a kame. Bimini bele Baguma kale a bekpa Yudafo odi.

XX Leme bate badone bebã a kĩ bito Kipro mɔ Kirene naa Antiokia benabi Grikifo Baguma kale a ne boe ɔlate Yesu akũ.

XXI Ne kĩ boe ɔlate kobẽ na ne be kame sũ bati pii te bido.

XXII Kĩ bate badone ne Yerusalem nu lets a kĩ leya ne Antiokia a, bido Barnaba kĩ enaa awã.

XXIII Kĩ ewo awã a, emó ayekĩ Baguma bumo be a, kawole de ye paa, ade ekpa be kode kĩ bekwa be towole flee bite ne boe Olate akũ a.

XXIV Barnaba nye oti wĩ, edeĩ katekado ade Hũhũ Kpalewa a leme te ye kame. Futo ye akũ sũ ni, bati pii te boe Olate bido.

XXV Ke liti a, Barnaba naa Tarso kĩ yanaawe Saulo ne awã a.

XXVI Kĩ emo ye a, ekpã ye benaa Antiokia. Bena ne awã kateli moa flee, bekatsena bati pii katsa be fotsa. Ade Antiokia mo benya loto beve bate badone a kĩ Kristofa a.

XXVII Ne loko a na kame ni, Baguma onukpẽ banyene badi to Yerusalem beya ne Antiokia a.

XXVIII Ade Agabo kĩ enye be kame omoa yidza edza ne be katsenako, ade ne Baguma Hũhũ kobẽ onukpẽ ni, ele eyi kĩ kole kpale aane ne katinya flee kame. Fukĩ yaya ne loko a kĩ Klaudio nya Romafa Legãnokõ a.

XXIX Ne foesũ bate badone a yake otse kĩ baate fotsa fudi bekwa bemena be bawaẽ ne Yudea. Be kame odi nye odi te ayekĩ yaapuli.

XXX Kĩ bekpota fotsa kĩ a, bekwa foe bekpa Barnaba mo Saulo kĩ bekwa bema bate badone banokoẽ a ne Yudea.

XII

Herodes Kena Foto Banyane a Tenya.

I Ne loko a na kame, Legã Herodes pi bate badone a badi kĩ beko be.

II Efõ beko Yakobo kĩ enye Yohanes owaẽ a mo lepame.

III Kĩ emo kĩ kawole de Yudafu a sũ ni, efũ bipi Petro lemε. Ekena foe ne Abodoo Kĩ Etáyila Fuwi Kanya a kame.

IV Bekoa ye bido ne kola kame, awã kĩ sodzafu ena ena na ne kutsu ena kame kavemena akũ kadzole ye akũ. Herodes nhihie nye kĩ yaakoa ye ekpa kanade a bedzemu ye nte benya Wuda Katẽ Luwi a biyua.

V Foesũ sodzafu a kadzole ye akũ kadzole wĩ ne kola a kame. Lemε bate badone a kaboa mpaε ne ye lolu kakpa Baguma mo osĩ mo osĩ.

Baguma Nye Petro Ne Abãã Kola Kame.

VI Lenye a kĩ ke kade kanyina kame Herodes aakoa Petro ekpa bati a, Petro waa tida ne sodzafu nviã kayite. Bido ye nkosonkoso nviã ade sodzafu bebã dzẽ ne opunu liti badzole kola akũ a.

VII Deedimopape ohaĩ odi moane ne kola a kame. Ade ke ode Baguma foto onyane odi ne edza ne Petro owẽ a. Ebua Petro ne lobotεε enyina ye, ade ebi ye kĩ, “Yidza moatse!” Letaletu nkosonkoso a ne ne ye akpo eto ne tite.

VIII Ade ode foto onyane a bi ye kĩ, “Boε no tetadie, kado no mpabua lemε.” Petro kena foe lomo, ade ode foto onyane a buki εle kĩ, “Boε no atadie kpale katsa akũ katomo yĩ.”

IX Foesũ Petro tomo ye bene ne kola a kame. Etányi nte letsa a kĩ ode foto onyane a kakena a nye onokoli, mbom ekona kĩ koda kame foane.

X Betẽ kawũ banone katsu katonyade mo kayade a kĩ badzole tunyukpẽ akũ a. Kĩ biwo fobotsae onyukpẽ a kĩ babinya kawo ne omato

kame a, onyukpě a mɔawe binya ne ye akũ akũ ade betě a. Kĩ benaa lotɔ sukuloo a, Baguma ode foto ɔnyane a dzakũ efone ye.

XI Kĩ ane kame kpale Petro a, eyanyi letsa a kĩ leya ne ye akũ, ade ebi ye akũ kĩ, “Finyaakĩ, mmó kĩ ɔnɔkɔali fɔane. Boe ɔlate do ye ode foto ɔnyane kĩ eyaanye yĩ etomena Herodes awe kame mɔ letsa a kĩ Yudafo hihie kĩ baakena yĩ a kame!”

XII Kĩ emɔ letsa a kĩ leya ne ye akũ a, edzakũ enaa Maria kĩ enye Yohanes Marko ɔma awã. Bati pii tsena ne awã bekabɔa mpae.

XIII Ade kĩ Petro dza ekabɔa kanya opunu a, katsolebi abawa kĩ bave Roda yabinya kɔla a.

XIV Kĩ eyi Petro odo ɔsũ a, kawɔle de ye paa, foesũ etábinya opunu a, mbom ewula atse enakpa bati a kanyi kĩ Petro dzě ne opunu liti.

XV Bati a táte bido foesũ bibi ye kĩ, “Kamɔ aamɔ mbɔee?” Leme kĩ edzemena kale kĩ nuwĩ fɔane sũ ni, bibi be akũ kĩ, “ɔsa fɔanya ye Baguma ode foto ɔnyane.”

XVI Lokɔa na flee Petro dzemɔ opunu a kabɔa. Kĩ bibinya opunu bemó ye a, akũ dzuli be.

XVII Ete be awe kĩ bekena dī, ade ebi be ayekĩ boe ɔlate nye ye etomena kɔla a kame a. Ebi be kĩ, “Mibi Yakobo mɔ bate badone nkae a letsa a kĩ leya a.” Ke liti a, edzakũ ne awã enaa kako bebã.

XVIII Kĩ kade nyina, kukũtila mɔ ɔtutũ kpale wo ne sodzafɔ a kame ne kawakõ a, ade bekavia be akũ kĩ, “Ndia koũ Petro tsã?”

XIX Kĩ Herodes wε Petro kayela evia a, efɔ̃ bipi sodzafɔ a bivia be onukpɛ̃ kame tuwuli. Ekɔ̃ be kɔtɔ efɔ̃ beko be.

Ke liti a, Herodes dzakũ ne Yudea enaa Kaisarea, enadzi ne awã fuwi fudi.

Legã Herodes Ku.

XX Lɔko a na kame Herodes na kalokpa ne Tirofo mo Sidomfo akũ. Foesũ bekena omɔa beya ne ye sekẽ. Benya loto benamɔ Blasto, kĩ enye Herodes toto akũ odãmenane, kĩ eke Herodes aduli ekpa be. Bewe kĩ temato nviã a tekena omɔa mo Herodes, kitonekĩ ye tite akũ bana funitsã katomena.

XXI Ne luwi a kĩ Herodes yi ekpa be akũ a, edo ye fogãtsa edzi ne ye legãkpo akũ, ade ekabi omaĩ a folets a.

XXII Ne ye kodzela kawũna kame a, bati a mu ye mo fowola bele kĩ, “Fukĩ kɔ̃ nné otidziwa lamena kodzela kale. Baguma Kpale lamɔ kodzela kale!”

XXIII Deedimɔape ode foto onyane yabɔa Herodes emuni, kitonekĩ etákpa Baguma obu. Ewo batse beba ye kame kame, ade ke eku a.

XXIV Ne lɔko a na kame Baguma kale a gba ne fokɔ pii, ade bate badone a lɛme po bibu a.

XXV Kĩ Barnaba mo Saulo yua be adzuma a kĩ bido be a, bedzakũ ne Yerusalem ade bekpã Yohanes Marko bibumɔ be akũ a.

XIII

Bɛpau Barnaba Mo Saulo Bido Be Fɔtɔ.

¹ Baguma onukpɛ̃ banyene mo fɔtsa batsane badi na ne bate badone a kame ne Antiokia. Ade be nye Barnaba mo Simeon kĩ bave Oti Jowa,

Lukio kī eto Kirene tite akū, Manahen kī bemo Legā Herodes bedoola ne be tibišē kame, mo Saulo.

II Kī bēna ne awā bekamu boe ɔlate, bekasui onukpē leme a, Hūhū Kpalewa bi be kī, “Minye Barnaba mo Saulo miyi lite lokoa bēnaakena adzuma a kī foesū nve be a.”

III Ne foesū bisui onukpē ebōa mpaε, bite awe ne be akū ade benye be osi a.

Barnaba Mo Saulo Naa Kipro.

IV Kī Hūhū Kpalewa lido be sū ni, bēnaa ɔmato a kī bave Seleukia kame. Awā na bidzi okolo binyina bēnaa Kipro tite kī mui tsua bisinya te a akū.

V Kī biwo Salami ɔmato kame a, bēnale Baguma Kale Wī ne Yudafō fotsenakō. Yohanes Marko leme tomō be nde be obumenane aye.

VI Kī betsā mpo akū benawo Pafō ɔmato a kame a, betselamō Yudani odi kī yaveli toota. Bave ye kī Yesuobi, ade ebōe ye akū kī enye onukpē onyene a.

VII ɔwane kī mo tite a akū odāne kī bave Sergio Paulo nye bakoba. Abāā onokōē kī tsua linebi. Ene Barnaba mo Saulo bēnaa ye awā kitonekī ewe kī yatse Baguma foletsa a.

VIII Leme kī bēnaa awā a, ɔwane a kī babuki kave Elima ne Griki tide kame a, te atsindze mo be. Ewe kī yadani onokōē a adzuni ne letsa a kī Saulo mo Barnaba le a akū.

IX-X Leme Hūhū Kpalewa a kobē te Saulo kī babuki kave Paulo kame ade eke ane ne ɔwane a akū fεε ele kī, “Nō Abonsam obi! ɔnye okesīne okpa tuwī tidi nye tidi kakena. Tedake mo tokpa

yi no kame flee. Luwi daa aboa mbodi kī adani boe ɔlate onokɔali kale a liti mo loto!

XI Dã, boe ɔlate aavele no soto finyaakĩ. Yaafõ oku anɛ, ade ɔláabuki omó suwa kenaawo loko lidi a.”

Letaleta Elima anɛ kame ke ɔtũ, ade ke ebuki yaámɔ foko a. Ekatale foko kī yawɛ odi kī epi ye ne kɔkɔ.

XII Kī abãã onokɔẽ kī mó letsa a kī leya a, ete edo kitonɛkī fotsa katsa ne boe ɔlate kale wī a akū kena ye wāwā paa.

Barnaba Mo Paulo Naa Antiokia Ne Pisidia.

XIII Ke liti a, Paulo mo bikī bitomɔ ye a wo ne okolo kame bito Pafɔ benaa Perge omato a kī edeĩ ne Pamfilia tite kame. Ade awã mo Yohanes Marko dzakū efone be emuniki enaa Yerusalem a.

XIV Kī bito Perge a, beyawo Antiokia kī edeĩ ne Pisidia. Ne Kaweya Luwi akū a ni, benaa Yudafɔ katsenakõ a benadzi ne bati a kame.

XV Ade kī bekã foletsa ne Mose mbla, mo Baguma onukpẽ banyene tuvoli kame biyua a, katsenakõ banokɔẽ a bi be kī, “Nwaẽ amɛ, nte mideĩ kadi kī míale mido boe kobẽ ni, osi waa, mile faa.”

XVI Ade Paulo yidza edza ete be awe ele kī, “Nwaẽ Israelfɔ mo mi a kī minyé Israelfɔ leme miasum Baguma a, mitse katse wī!

XVII Israelfɔ Baguma lepau boe bawanyɔ, ade ekena be omaĩ kpale ne loko a kī benya banovɔẽ ne Egipte a. Ye moawe lenye be etomena Egipte tesate kame mo ye kobẽ.

XVIII Ade edãmena be akū futeli tena flee ne loko a kī bena ne kosa kame a.

XIX Εwola fude evũkɔnɔ bati ne Kanan tite akũ, ade ekɔa te ekpa Israelfɔ kĩ tenya be adzapadiɛ a.

XX Fukĩ flee ya ne ndɛ futeli oha ɛna mɔ aduenum kame.

“Ke liti a, Baguma kpa be foletsɛ badzɛnɛ benya be akũ flee keyawo Baguma Onukpɛ ɔnyɛnɛ Samuel akũ.

XXI Bivia ye kĩ edzina legã ekpa be, ade Baguma pau Saulo, kĩ ɛnyɛ Kis obi ekpa be a. Eto Benyamin kasinu a kame, ade ɛnya legã futeli tena flee a.

XXII Lemɛ Baguma dzɛla ye ne lukpo a akũ, ade ekɔa Dawid ekɛna legã a. Ade letsɛ a kĩ Baguma le ne ye akũ nyɛ kĩ, ‘Yese obi Dawid nyɛ oti kĩ yĩ ɔwɔlɛ awɛ, kitonɛkĩ yaakɛna ne yĩ kawɛ akũ.’

XXIII “Ade Dawid kasinu a kame Baguma nyɛ ɔtɛnɛ a kĩ ɛnyɛ Yesu ekpa Israelfɔ ndɛ ayekĩ ɛlɛ eyi a.

XXIV Fɔmɔ Yesu aayi ye adzuma kayɔ a, Yohanes mui ɔwɔlanɛ a de letsã ebi bati Israelfɔ flee kĩ bedani tɔwɔlɛ kame lɔkɔa bɛtɛ mui kawɔla amanɛ.

XXV Kĩ Yohanes aawũna ye adzuma kakɛna a, evia bati a kĩ, ‘Mikɔna kĩ yĩ nyɛ Oti a Kĩ Bɛbɔa Tɔdɔ a mbɔɛɛ? Oowo! Lemɛ etomɛna yĩ ne liti yaya, ade ntáfɛta kĩ mawũnya mpabua ne ye abɔa malo a.’

XXVI “Nwaɛ amɛ Israelfɔ, Abraham babi mɔ bawa, mɔ mi a kĩ minyɛ Yudaɔ leme miasum Baguma, bɛkɔa katɛ foletsɛ kĩ bɛma boe flee.

XXVII Ne ayekĩ bikĩ bideĩ ne Yerusalem mɔ be banɔkɔɛ a tányi kĩ ye nyɛ ɔtɛnɛ, ñye binu Baguma onukpɛ banyɛnɛ foletsɛ a kĩ bakã ne Kaweya

Luwi lidi nye lidi akū kayo sū ni, foletsa a ya ne foe kame lomo, ade beko ye koto a.

XXVIII Tito kī betámo tókpa tidima ne ye akū malo ni, beko ye koto ade befō Pilato kpa osi beko ye a.

XXIX Ade kī bekena letsa nye letsa biyua nde ayekī Katsela Kpalawa a le eyi ne ye akū a, benye ye ne asendua akū benabila ne linike kame.

XXX Leme Baguma dzela ye etomena kanokpa ebuki edzi nkpā.

XXXI Ne fuwi pii na kame ni, enye ye akū etsa bikī bemō ye betsā bito Galilea benaa Yerusalem. Ade be nye ye adansifo bekpa Israelfo finyaakī a.

XXXII-XXXIII “Finyaakī bokoa Kale Wī a boama mi, kī Baguma folets a kī ele eyi ne boe bawanyo loko a ya ne foe kame ne boe loko. Baguma fō Yesu yidza edzi nkpā nde ayekī Dawid tsele ne onō oyade a kame kī,

‘Nō nye yī obi.

Nviā kī nkena nō Olega.’

XXXIV Ade lets a kī Baguma le eyi ne ye kadzela katomena kanokpa nye kī ye sukena lelávō ne linike kame da. Baguma le kī,

‘Maakoa nhila kpalawa a kī nle ñyi nkpa Dawid a nkpa nō.’

XXXV Ebuki ele ne Dawid onō bebā kame kī,

‘Oláafō nō oti kpalawa a levō ne linike kame.’

XXXVI “Kī Dawid kena ne Baguma fowetsa akū loko a kī edzi nkpā eyua a, eku bebōe ye bibila ne ye bawanyo owē, ade evō ne linike kame leme a.

XXXVII Leme oti a kī Baguma dzela etomena kanokpa a sukena távõ ne linike kame.

XXXVIII “Nwaẽ ame, bowe kī minyi kī fotsẽ Yesu akū mo bide letsã ne Baguma tokpa kakokate a bekpa mi.

XXXIX Odi nye odi kī yaate Yesu edo ni, Baguma aaboe ye kī enya otobe. Ade fukĩ Mose mbla a tãpuli ekena a.

XL Foesũ midã kadã wĩ ayekĩ Baguma onukpẽ banyene foletsa a kī bele biyi a lelaaya ne mi akũ.

XLI Kitonekĩ Baguma le kī,

‘Midã mi a kī miadi kale a nsekuo!

Fokena mi saa lokoa miwo.

Kitonekĩ letsa a kī makena nviã kĩ a nte odi nye foe kayo etsa mi malo, miláate foe mido!’ ”

XLII Kĩ Paulo mo Barnaba adzakũ ne katsenakõ a, bati a bi be kī bibuki beya ne Kaweya Luwi a kī laayaa akũ, lokoa beyaaabi be foletsa a bibu.

XLIII Kĩ bepansam ne katsenakõ a, Yudafõ pii mo bikĩ bedani bekena Yudafõ bavila Baguma leme a, tomõ Paulo mo Barnaba. Fõto banyane a de be kī bedza pintii ne Baguma konyakamo a kī edeĩ ekpa be a sũ.

XLIV Ne Kaweya Luwi leyade akũ a, kite sukuloo omato a flee yaboa obũ ne katsenakõ a kī batse boe Olate kale a.

XLV Kĩ Yudafõ banokõẽ a mó bati lidede kĩ odu ne katsenakõ a, ane beele be. Bevele foletsa mo Paulo ne letsa a kī de ele a akũ ade bivũna ye a.

XLVI Leme Paulo mo Barnaba le kodzela mo kobẽ kī, “Kene kī bonya lotõ bubu mi Yudafõ Baguma kale kĩ. Leme kī misĩ ke kī mitákpõla

mikpa nkpã kī elã kawūna a sū ni, bɔkɔa ke bɔama bikī benyé Yudafo a.

XLVII Kitonekī ade ɔledo kī Baguma kpa boe kī, 'Nkɛna nɔ ndɛ ɔsedza nkpa bikī benyé Yudafo a ayekī katinya kame bati flee aana katɛ.' "

XLVIII Kī bikī benyé Yudafo a nu foletsã kī a, kawɔle de be, ade bimu boe ɔlate kalɛ a. Ade bikī Baguma pau kī bɛna nkpã kī elã kawūna a, dani bɛkɛna batɛ badonɛ a.

XLIX Baguma Kalɛ a gba nɛ tite a na flee akū.

L Lemɛ Yudafo a fɔ batsole badi kī obu deī nɛ be akū kī basum Baguma lemɛ, mɔ ɔmatɔ banɔkɔɛ a biyidza bedza nɛ Paulo mɔ Barnaba akū, ade beblɔmena be nɛ be kayite a.

LI Ade kī Paulo mɔ Barnaba anɛ nɛ ɔmatɔ a kame a, bɛkpa be abɔa kudu biko ɔmatɔ a bɛkɔa batsã kī bisī be. Ke liti a, bedzakū bɛnaa Ikonio.

LII Kawɔle de batɛ badonɛ nɛ Antiokia ade Hūhū Kpalɛwa a lemɛ yi be kame paa a.

XIV

Paulo Mɔ Barnaba Naa Ikonio.

I Kī biwo Ikonio a, Paulo mɔ Barnaba naa Yudafo katsɛnakɔ. Ayekī bele kalɛ wī a fɔ Yudafo mɔ Grikifo pii tɛ bido.

II Ade Yudafo a kī betáte boe ɔlate kalɛ wī kī bido a kɔa ɔdze bido nɛ bikī benyé Yudafo a mɔ Paulo mɔ Barnaba kayite.

III Lemɛ foto banyanɛ kī kahɔ nɛ ɔmatɔ a kame lokɔ gɛlɛlɛ, bele kalɛ boe ɔlate akū mɔ kɔbɛ. Ade enye ye kawɛ etsã efɔ bɛkɛna awāwā mɔ nsentsɛleni fɔtsã pii a.

IV Foyaya kī bati ne ɔmato a kame sē ne kutsu nviã kame, badi tomo Yudafɔ a ade badi lemɛ tomo fɔto banyane a.

V-VI Ne lɔko a kame a, bamatɔne a badi, Yudafɔ mo be banɔkɔē a flee yidza kī bayaaha be, benɔ be boe. Kī fɔto banyane a nu foe a bilo benaa Likaonia temato a kī tenye Litra mo Derbe mo tikī tideĩ ne kayite a kame.

VII Ade benale Kale Wī a ne awã a.

Paulo Mo Barnaba Kena Adzuma Ne Litra Mo Derbe.

VIII Kī biwo Litra a bemó onyole odi kī eveliveli. Kito ne ye lemawi etápuli eyidza etsã da.

IX Edzi ne awã ekatse foletsã a kī Paulo kale a. Kī Paulo mo eyi ɔsũ kī oti kīĩ te edo kī baapuli betsa ye sũ ni,

X edã ɔsɔne a koe ade ele kɔɔba kī, “Yidza kadza ɔkpale!” Onyole kīĩ ta eyidza ade edo kato katē awe a.

XI Kī bati a kī bedzē ne awã batse kale a mó letsã a kī Paulo kena a, bebɔa fɔwɔla ne Likaonia tide kame kī, “Baviõ banɛ, beka beya nde batidziwa aye ne boe kayite!”

XII Foesũ bite Barnaba dī kī Zeus. Bite Paulo lemɛ kī Herme, kitonekī ade ye ledza ekale kodzela a.

XIII Adeke Zeus oviõlate a kī ye kuviõla kpale dza ne ɔmato ɔbaē a, nakpã banantsue ebɔe flawasi leka lemɛ eyamena ne ɔmato a kobã onyukpē kī bayaabɔa afɔlie bekpa fɔto banyane a.

XIV Kī Paulo mo Barnaba nu letsã kī bati a we kī bakena a, beyele be akũ tetadiɛ. Foesũ biwula atse biwo ne bati a kame, bebɔa fɔwɔla kī,

XV “Nda aμε, nde sũ miakena fukĩĩ odu? Boe malo batidziwa boane nde mi aye. Boya ne awĩ kĩ bokoa kale wĩ a boma mi. Mifõ fotsa a kĩ folá kayo kakena lokoa midani mimu Baguma kĩ edzi nkpā a. Ade ye lekena tite mo ode, mpo mo fotsa a kĩ fudeĩ ne foe kame a flee a!

XVI Kokoε a enye ane ne batidziwa flee akũ εfõ bekakena letsa a kĩ bawe a.

XVII Leme ebuki yanye ye fokelatsa katsa boe kĩ foatsa kĩ nuwĩ edzi nkpā. Loko nye loko fotsa deĩ kĩ foakai boe ye tudzuma wĩ a. Yakpa boe oni loko nye loko, fudutsa ne loko wĩ akũ, funitsā mo kawole leme.”

XVIII Tito kĩ bele foletsa kĩĩ lomo malo ni, fona osĩ fomō bati a fõ afolie kaboa kakpa be.

XIX Ade Yudafō badi to Antiokia ne Pisidia, mo Ikonio beyadani bati a adzuni a. Befõ betale Paulo boe bevele ye benemena ne omato a kame ne kĩ bekona kĩ eku sũ.

XX Leme kĩ bate badone a yatsena ne ye akũ a, eyidza edza ade emuniki enaa omato a kame a. Kĩ kade nyina a, bemō Barnaba bedzakũ benaa Derbe.

Paulo Mo Barnaba Muniki Bena Antiokia Ne Siria Tite Akũ.

XXI Paulo mo Barnaba de letsā ne Kale Wĩ a akũ ne Derbe, ade bena bate badone pii ne awā a. Bimuniki bito awā benaa Listra, Ikonio mo Antiokia ne Pisidia.

XXII Awā na bede bate badone a, bido be kobē leme kĩ bidi onokoli ne be katekado kame. Ade bibi be leme kĩ, “Kene kĩ bōtsā lubo kamo pii kame fomō boawo ne Baguma legākanyakō a kame.”

XXIII Ade ke Paulo mɔ Barnaba pau lotɔ banyanɛ bekpa asoli adi nye adi a. Betsã mpaɛbo mɔ onukpɛ̃ kasui kamɛ bekɔa be bido nɛ boe ɔlate a kɔ̃ bɛtɛ bido a awɛ.

XXIV Ade kɔ̃ bimini nɛ Pisidia tɛmatɔ kamɛ biyua a, bɛdani bɛnaa Pamfilia tite kamɛ.

XXV Bɛlɛ kalɛ wɔ̃ a nɛ Perge fɔmɔ bɛtɛ bɛnaa Atalia.

XXVI Ade awã binyina mpo bɛnaa Antiokia, awã kɔ̃ bɛnya lotɔ bekɔa be bido nɛ Baguma awɛ kamɛ nɛ adzuma a kɔ̃ bɛkena biyua finyaa a.

XXVII Kɔ̃ biwo Antiokia a, bɛkpɔta batɛ badonɛ a flee nɛ awã, bɛbɔa be osi akũ amandɛ. Ade bibi be fɔtsa flee a kɔ̃ Baguma kɛna ɛtsãmena be akũ mɔ ayekɔ̃ ebinya katekado osi ɛkpa bikɔ̃ bɛnyɛ Yudafo a.

XXVIII Bidzi nɛ batɛ badonɛ nɛ Antiokia sɛkɛ owi buna kɔlaa.

XV

Fɔtɔ Banyanɛ a Mɔ Banɔkɔɛ̃ a Tsɛna Nɛ Yerusalem.

^I Kɔ̃ Paulo mɔ Barnaba na nɛ Antiokia a, bati badi to Yudea bɛyatsa batɛ badonɛ nɛ awã fɔtsa kɔ̃, “Miláana katɛ mbɔɛntɛ bitsua mi lekpati nɛ Mose mbla a onukpɛ̃.”

^{II} Lemɛ Paulo mɔ Barnaba vɛlɛ foe mɔ be mɔ osɔ̃ mɔ osɔ̃. Nɛ foesũ bɛnyɛ batɛ badonɛ a badi kɔ̃ bito Antiokia kɔ̃ bitomɔ be bɛnaa Yerusalem lokɔa bɛmɔ fɔtɔ banyanɛ mɔ banɔkɔɛ̃ a kɔ̃ bideɔ̃ nɛ Yerusalem a bɛwɛ fɔlɛtsa kɔ̃ kamɛ.

^{III} Foesũ batɛ badonɛ a yi be osi. Bɛnatsã Foenike mɔ Samaria bɛsɛla batɛ badonɛ a kɔ̃ bideɔ̃ nɛ awã, ade bibi be ayekɔ̃ bikɔ̃ bɛnyɛ Yudafo

a kɔa be akū bekpa Baguma a. Fɔletsɔ kīi de be kawɔle paa.

IV Kī biwo Yerusalem a, bate badone a, fɔtɔ banyane a mɔ banɔkɔɛ a flee tɛ be mɔ kawɔle. Paulo mɔ Barnaba bɔa be amandie ne fɔtsa a kī Baguma kena etsāmena be akū a flee.

V Leme Farisifo bate badone badi yidza bedza ade bele kī, “Kene kī bate badone a kī benyé Yudafɔ a bitsua fɔkpati lɔkɔa bekena ne Mose mbla a akū.”

VI Ne fukīi sū banɔkɔɛ a mɔ fɔtɔ banyane a tsena bekɔna fɔletsɔ a akū.

VII Kī besa foe kame fee a, Petro yidza edza ade ele kī, “Nwaɛ ame, miawe minyina kī lɔkɔ lidi Baguma pau yī etomena mi kame kī nnaabi bikī benyé Yudafɔ a Kale Wī a, ayekī be malo baanu ke betɛ bido leme.

VIII Ade Baguma kī enyina otidziwa kakɔna a nye ye kawɛ etsa ne kī ekpa be Hūhū Kpalɛwa ndɛ ayekī ekpa boe malo a.

IX Etátsa ntsitsemu adima ne bomó be kayite, kitonekī etɛ be ne ayekī betɛ bido sū, ade ekɔa be tɔkpa ete be ndɛ boe aye a.

X Finyaakīi, ndɛ sū bɔaso Baguma bɔdā? Nde sū bɔkɔa fɔletsɔ a kī bomó boe bawanyɔ bɔtápuli bɔlɔ a bɔate ne bate badone kīi akū?

XI Oowo! Nde ayekī bɔte budo kī boe a flee bɔna katɛ fɔtsā boe ɔlate Yesu konyakamɔ kame a, ade ayea be malo bɛna katɛ a.”

XII Ade ke be flee bekena dīi, bitse Paulo mɔ Barnaba amandie kabɔa ne ayekī Baguma tsā be akū ekɛna awāwā fɔtsa ekpa bikī benyé Yudafɔ a.

XIII Kĩ beboa amandie biyua a, Yakobo leme yidza edza ade ele kĩ, “Nwaẽ ame, mitse!

XIV Simon Petro bi boe ayekĩ Baguma nya loto enye ye kawe etsa bikĩ benyẽ Yudafo a, ade epau be badi kĩ benya ye bade a.

XV Ade Baguma onukpẽ banyene foletsa a kĩ bele biyi a ketimo fukĩ pẽpẽpẽ nde ayekĩ katsela kpalawa foletsa a le kĩ,

XVI ‘Ne fukĩ liti ni, maamuniki ñya.

Maayalola Dawid legākanyakõ a kadzela, ade maalola fotsa a kĩ fubu kade ne awã kake a, lokoa awã libuki kedza pintii.

XVII Ade bati nkae a aaya ne yĩ sekẽ, mo bikĩ benyẽ Yudafo a kĩ nve kĩ benya yĩ bade a aatomõ yĩ liti.

XVIII Ade aye boe ðlate le eyi ane kãkãe kĩ yaakena a.

XIX “Foesũ ne yĩ, Yakobo, kakona onukpẽ ni, ketane kĩ boaha bikĩ benyẽ Yudafo a kĩ bekõa be akũ bakpa Baguma a.

XX Mbom mifõ bõtsela ovoli bõma be kĩ befõ fukĩ bame nde bayae kĩ bekõa beboa afolie bekpa baviõ kaba, befõ litsolewe mo linyolewe, befõ oyae kĩ betãtsua ye somõ kaba mo babõane kanya.

XXI Kitonekĩ kito ane kãkãe a bakã Mose mbla a kĩ etsele eyi a ne Kaweya Luwi lidi nye lidi akũ ne Yudafo katsenakõ ade bade letsã ne ye foletsa akũ ne omato nye omato kame a.”

Betsela Ovoli Bema Bikĩ Benyẽ Yudafo Bate Badone a.

XXII Ade ke foto banyane, banokõẽ mo bate badone a flee kena onukpẽ moa kĩ benye be kame

badi bibumɔ Paulo mɔ Barnaba benaa Antiokia a. Bepau bati nviã kĩ batɛ badonɛ a akpa be obu paa. Ade be nyɛ Yuda kĩ bibuki bave Barnaba mɔ Sila a.

XXIII Ovoli a kĩ benɛɛ banamɛna a kamɛ foletsɛ nyɛ kĩ,

Ovoli kĩ to boe fɔtɔ banyanɛ, banɔkɔɛ, mɔ batɛ badonɛ a kĩ bideĩ nɛ Yerusalem sɛkɛ. Bɔawɔna mi, boe bawaɛ kĩ minyɛ Yudafo a kĩ mito Antiokia, Siria mɔ Kilikia.

XXIV Bunu kĩ batɛ badonɛ badi to boe kamɛ nɛ awĩ beyabi mi foletsɛ fudi kĩ fɔha mi fudo ɔtutũ lemɛ nɛ mi kamɛ. Lemɛ nnɛ boe lido be.

XXV-XXVI Nɛ foesũ bɔtsa fɔlɔ buke otse kĩ bɔado batɔ nviã nɛ mi sɛkɛ. Baatomɔ boe bawaɛ nviã Barnaba mɔ Paulo, kĩ bekɔa be nkpã bekpa boe ɔlate Yesu Kristo ɔsum a.

XXVII Budo Yuda mɔ Sila kĩ be mɔa awɛ bibi mi foletsɛ a kĩ foe bɔtsɛlɛ a.

XXVIII Kitonekĩ Hũhũ Kpalɛwa a mɔ boe mɔawɛ a bɔmɔ buyi ɔsũ kĩ ketánɛ kĩ bɔakɔa fɔlɔtsa kpale bɔlɔla mi keba tɛbla sĩwa kĩ.

XXIX Ade te nyɛ kĩ mitanya funitsã kĩ bekɔa bebɔa afɔliɛ bekpa baviɔ, mitanya babɔanɛ, mitaba ɔyɛ kĩ betátsua ye sɔmɔ, mipi mi akũ nɛ linyolewɛ mɔ litsolewɛ kamɛ. Nte mipi mi akũ limii ni, katinya kamɛ aale kekpa mi.

Midzi nɛ lukudɔ kamɛ.

XXX Foesũ benyɛ batɔ kĩ osi benaa Antiokia. Benakpɔta batɛ badonɛ a flee nɛ be katsɛnakɔ a, ade bekɔa ovoli a bekpa be a.

XXXI Kawɔlɛ de bati a nɛ foletsɛ a kĩ bekã nɛ ovoli a kamɛ a sũ.

XXXII Yuda mɔ Sila kĩ benyɛ Baguma onukpɛ banyɛnɛ nyɛ foletsɛ pii kayɔ bɛtsa be nɛ lokɔ

gelele kame, bido be kobē leme.

XXXIII Bidzi ne be sekē bete fuwi fudi, ade bate badone a nye be osi ne lukudo kame ki bimuniki benaa Yerusalem a.

XXXIV Leme Sila ko we ki yakaho ne awa.

XXXV Paulo mo Barnaba dzi ne Antiokia suku-
loo. Bemō bati bebā pii betsa fotsa ade bekade
letsā ne boe Olate kale a akū a.

Paulo Mo Barnaba Sē Tisi.

XXXVI Ne fuwi fudi liti ni, Paulo bi Barnaba ki,
“Fō bumuniki bonaasela boe bawaē ne temato a
ki bōtsā te kame bude letsā ne boe Olate kale a
akū a, lōkōa bōdā ni nde bidzi.”

XXXVII Barnaba tuno ade ewe ki bakpā Yohanes
Marko bibumo be akū a.

XXXVIII Leme Paulo tātuno kolaa kitoneki, ki
benaa Pamfilia a, Yohanes Marko dzakū efone be
ne awa ade etabumo be biyua adzuma a.

XXXIX Bati nviā ki vele foletsa a mo osi mo
osi ade fofō beyale a. Barnaba kpā Marko ade
binyina mpo benaa Kipro a.

XL Paulo leme kpā Sila ade bate badone a kōa
be bido ne boe Olate awe ki emō be kōnya fomō
bedzakū a.

XLI Etsā Siria mo Kilikia tite kame ekado tesoli
ne awa a kobē.

XVI

Timoteo Tomo Paulo Mo Sila.

¹ Ade Paulo dzakū enaa omato odi ki bave
Derbe, ade etē enaa Listra leme a. Ade awa
enamō ote odone odi ki bave Timoteo a. Oma
nye Yudani ki ete Kristo edo. Leme olega ko nye
Grikini.

II Bate badone flee a kī bideĩ ne Litra mo Ikonio boa Timoteo dī wī.

III Ade ye Paulo we kī yakpā enamena a, foesū etsua ye lekpati, kitonekī Yudafo a kī bideĩ ne kayite a na nyina kī ɔlega nye Grikini.

IV Ade kī bedzakū a, betsā bimini ne temato a kame, bibi be tebla a kī foto banyane mo banokōē ne Yerusalem ke otse ne te akū a. Bede be kī bekena ne te akū.

V Foesū luwi daa bati a kapo ade be katekado leme na ɔsī kibu a.

Paulo Na Kanyekatsa Ne Troa.

VI Ke liti a, betsā Frigia mo Galatia tite a kame, kitonekī Hūhū Kpalewa a tákpa be osi kī benaade letsā kale wī a akū ne Asia tite akū.

VII Kī biwo Misia tite ɔbaē a, bewe kī bawo ne Bitinia tite kame, leme Yesu Hūhū a tákpa be osi.

VIII Foesū bimuniki betsā Misia benawo Troa ɔmato a kī ewaa ne mpo abuí a kame.

IX Ke lenye a, Paulo na kanyekatsa ne koda kame. Ne koda a kame a, emo onyole odi kī eto Makedonia, edza elamena ye aduli kake kī, “Nyina mpo kaya ne Makedonia kayaabumɔ boe!”

X Kī Paulo na kanyekatsa kī sū ni, bomanε akū bupi Makedonia osi, kitonekī foatsa kī Baguma leve boe kī bōnaade letsā ne Kale Wī a akū ne awā.

Lidia Dani Ɔwɔle Kame Ne Filipi.

XI Ade ke budzi ne ɔkolo kame ne Troa bunyina kpī bōnaa Samotrake a. Kī kade nyina a, buwo Neapoli.

XII Kĩ buto awã a, bɔnawo Filipi kĩ enye Makedonia ɔmato kpale flee a kame. Awã lemɛ nye tite kĩ Romafɔ adãmena te akũ. Budzi ne awã fuwi fudi.

XIII Ne Kaweya Luwi akũ a, bɔne ne ɔmato a kame bɔnaa ɔwo abuĩ, awã kĩ bɔkɔna kĩ Yudafɔ atsena kabɔa mpae. Ade budzi ne awã bɔkatsa batsole a kĩ bekpɔta ne awã Baguma kale a.

XIV Bave be kame ɔmoa kĩ eto Tiatira kĩ Lidia. Yano tilima ngbã, ade enye oti kĩ yasum Baguma yededeede a. Ade loko a kĩ ena ne awã ekatse boe a, Baguma binya ye ɔwɔle kĩ ete foletsa a kĩ Paulo kale a edo.

XV Ade kĩ ye mo ye toto kame bati flee bete mui kawɔla amanie a, eke boe aduli kĩ, “Nte mituno kĩ nte boe ɔlate ndo paa kɔ ni, miyaadzi ne yĩ toto kame” Edza ne boe akũ flee kenawo kĩ butuno bɔnaa ye sekẽ.

Bido Paulo Mo Sila Ne Kɔla.

XVI Luwi moa lidi kĩ bɔanaa mpae kabɔakɔ a, bɔtselamo oyitsɔ abawa adi kĩ hũhũ kpa deĩ ne ye kame, foafɔ yapuli kadã kanokɔne. Ne foesũ yakena sika baũ kakpa ye balate.

XVII Oyitsɔ kĩ tomo boe mo Paulo mo fowɔla kabɔa kĩ, “Baguma Kpale basumune bati kĩ ane, ade beya ne awĩ kĩ bayaatsa mi nkpã kana osi a!”

XVIII Fukĩ na nkɔsu fuwi pii. Ade kĩ fuwo Paulo odo a, edani ebi hũhũ a kĩ etomo oyitsɔ a kĩ, “Ne Yesu Kristo dĩ akũ, mabi no kĩ né ne oti a kame!” Letaleta hũhũ kpa a né ne ye kame.

XIX Kĩ ye balate a mó kĩ osi a kĩ ye akũ batsã kana sika yela be a, bipi Paulo mo Sila bema foletsa badzene banokɔẽ a ne kɔya.

XX Bele ne koya kī, “Bati kī nye Yudafo kī beyaabula boe omato a kade.

XXI Batsa bati fotsa kī boe nde Romafō bōláapuli bote foe.”

XXII Ade bati kōdabu a yidza bedza bisinya Paulo mō Sila, bido be katsootsoo awe a.

Fōletsa badzene a fō beyele tetadie ne be akū, ade bekpa kōbē kī bibo be mō kutse a.

XXIII Kī bibo be kabo kpa biyua a, benado be ne kola, ade bibi ekī yadāmena bikī bewaa kola akū a kī ebale Paulo mō Sila kabale wī.

XXIV Kī bibi ye lomō sū ni, enado be ne kame flee a, ade ebōa be agba a.

XXV Lenye kayite a, kī Paulo mō Sila kabōa mpae mō tōnō kasā kakpa Baguma a, kolabawane nkae a katse be.

XXVI Ade deedimōape tite kuna mō osī mō osī ade kola a flee kuna kōnake a. Letaleta kola tupunu a flee binya ade nkōsonkōsō a wolo ne kolabawane a flee akū teto a.

XXVII Kī kolabawane akū odāmenane a nyinya a, emō kī kola a tunyukpē flee waa luto. Ekona kī kolabawane a ne bilo sū ni, ebōle lepame enye kī yatsōe ye akū ekō.

XXVIII Lemē Paulo bōa fowola kōba kī, “Takena nō akū letsama. Boe a flee budeī ne awī!”

XXIX Kōla bawane akū odāmenane a fō bema ye osedza ade ne kukūtila kame ewula atse enato ne Paulo mō Sila abōa kame.

XXX Ade ke enye be ne kola a kame, evia be kī, “Nda ame, litsa kene kī nkēna nna kate?”

XXXI Bibi ye kī, “Te boe Ōlate Yesu kado lokōa mimō nō toto kame bati flee míana kate.”

XXXII Ade ke benaa benade letsã ne boe ɔlate kale akũ bekpa ye toto kame bati a flee a.

XXXIII Lenye a na, ekpã be enasu be fokpa, ade ye mo ye toto kame bati bete mui kawola amanie a.

XXXIV Ekpã Paulo mo Sila enamena ye awã, ade ekpa be funitsã benya a. Ye mo ye toto kame bati a flee bemó kawole paa kitonekĩ bete Baguma bido.

XXXV Kĩ kade nyina a, omato a kame foletsa badzene do foto banyane benabi kolabawane akũ odãmenane a kĩ, “Fone bati a awe benaa.”

XXXVI Kola bawane akũ odãmenane a bi Paulo mo Sila kĩ, “Foletsa badzene a bo nfone mi awe midzakũ. Foesũ minaa faa ne lukudo kame.”

XXXVII Lemε Paulo bi bato a kĩ, “Bibo boe ne kanade ne loko kĩ betádzemo boe beko boe koto, ade bido boe ne kola kame a, tito kĩ Romafó boane. Ade finyaa kã bawe kĩ bedzakũ ne kabela kame? Oowo! Ke kã nviã ne awĩ! Fõ be moawe a beyaanye boe!”

XXXVIII Ade ke foto banyane a muniki benabi foletsa badzene a oledo a. Kĩ binu kĩ Paulo mo Sila nye Romafó a, libe wo be paa.

XXXIX Foesũ benaa be sekẽ benakpa be seme boee, ade benye be ne kola a kame a. Bike be aduli kĩ bedzakũ ne omato a kame benaa kako bebã.

XL Paulo mo Sila dzakũ benaa Lidia awã. Ade awã benamo bate badone bebã a. Bido be kobẽ bibu ade bedzakũ a.

XVII

Paulo Mo Sila Naa Tesalonika.

I Paulo mo Sila tsã bito Amfipoli mo Apolonia beyawo Tesalonika, awã kī Yudafo katsenakō kadi na.

II Nde ayekī Paulo awe kakena a, enaa Yudafo katsenakō a Kaweya Fuwi elale etomō akū, enye foletsa kayo etsa bati a.

III Enye lubo a kī bele biyi kī Kristo aayamō, mo ayekī yaabuki eyidza edzi nkpā etsa. Ebi be kī, “Oti a kī ye akū foletsa nlamō mi kabi a nye Yesu Kristo a.”

IV Foletsa a kī foe kayo enye etsa ne awī fō bati a badi dani be adzuni, ade bete bido bitomō Paulo mo Sila a. Ade aye a ne omato a kame, Grikifo pii kī bipi be akū ne Baguma kavila kame, mo batsole pii kī obu deī ne be akū leme dani towole kame bitomō Baguma.

V Leme ane beele Yudafo banokoē a, ade ke benawe patapaafō ne omato a kame bibumō be akū bido otutū ne omato a kame a. Beboā obū bekena dede benawo ne Yason toto kame kī bapi Paulo mo Sila benamena omato a katsenakō.

VI Kī betamō be sū ni, bevele Yason mo bate badone badi benamena katsenakō a. Awã na bekaboa fowola kī, “Bati badi tsēmō otutū kado ne kako nye kako, ade bekoa foe beyamena ne awī kī leme a.

VII Ade Yason leme te be edo ne ye toto kame a. Bati kī yidza bedza ne Legānokoē Kaisare tebla akū. Ade batsa kī onyole odi kī have Yesu nye Legā a.”

VIII Kī kodabu a mo omato a kame banokoē nu foletsa kī a foha be paa.

IX Banokoē a fō Yason mo ye bade a se be akū liti kadza koto ade befone be awe a.

Paulo Mɔ Sila Dzakũ Bɛnaa Beroia.

^X Kĩ kade sila kɛdɔ pɛ, batɛ badonɛ a kpã Paulo mɔ Sila bilo bɛnaa Beroia. Kĩ biwo awã a, bɛnaa Yudafɔ katsɛnakɔ a.

^{XI} Beroia bati a tsua linebi beba bikĩ nɛ Tesalonika a. Biyi ato bitse kale a. Luwi nyɛ luwi bɛkasa Katsɛlɛ Kpalɛwa a kamɛ fɔlɛtsa kadã nɛ lɛtsa a kĩ Paulo kabi be a nyɛ ɔnɔkɔali.

^{XII} Foesũ be kamɛ bati pii tɛ bido. Grikifɔ batsole pii kĩ obu dɛĩ nɛ be akũ mɔ banyole pii lɛmɛ tɛ bido.

^{XIII} Lɛmɛ kĩ Yudafɔ a kĩ bideĩ nɛ Tesalonika nu kĩ Paulo ya ɛlamɛna Baguma kale a katsa nɛ Beroia, bɛnaa awã bɛnado ɔtutũ nɛ bati a kamɛ.

^{XIV} Batɛ badonɛ a kĩ bideĩ nɛ awã a kpã Paulo mɔatɛ mɔatɛ bɛnamɛna mpo abuĩ. Lɛmɛ Sila mɔ Timoteo kɔ kahɔ nɛ Beroia.

^{XV} Bikĩ biyi Paulo osi a naa flee bɛnawo Atene. Ade awã bimuniki a, ade Paulo kpa ɔlɛdo kĩ bibi Sila mɔ Timoteo kĩ beya nɛ ye sɛkɛ mɔatɛ.

Paulo Na Nɛ Atene.

^{XVI} Kĩ Paulo na nɛ Atene ɛkadzɔlɛ Sila mɔ Timoteo a, ɛtɛ kalɔɛ nɛ ayekĩ ɛmɔ kĩ ɔmato a kamɛ flee yi mɔ baviɔ kasum.

^{XVII} Foesũ ɛnanyɛ fɔlɛtsa kamɛ ɛtsa Yudafɔ a mɔ bikĩ bɛnyɛ Yudafɔ a kĩ basum Baguma a, mɔ bikĩ batɛ nɛ kɔya luwi daa a.

^{XVIII} Bati kutsu kudi kĩ bɛnyɛ Epikurofɔ mɔ Stoafɔ kĩ bideĩ katinya kamɛ kadikanyi kavele fɔlɛtsa mɔ Paulo. Badi via kĩ, “Litsa fɔlɛtsa koũ oti kĩ wɛ kĩ yalɛ?”

Bati bebã lɛmɛ kpa mbuayɛ kĩ, “Fɔadã ndɛ kade bebã baviɔ akũ fɔlɛtsa ɛlamɛna kale.” Bɛlɛ

foe lomɔ kitonekĩ binu kĩ Paulo de letsã ne Yesu mɔ bati kayidza kato kanɔkpa akũ.

XIX Ne foesũ bekpã ye benemena be omato a banɔkɔẽ katsenakɔ ne Areopago, ade bibi ye kĩ, “Boawe kĩ boanu foletsa vɔẽ a kĩ olamena katsa a kayɔ.

XX Ne kĩ foletsa a kĩ olamena kale a kame tákpale boe sũ ni, boawe butse foe kame.”

XXI Atenefo mɔ banɔvɔẽ a kĩ bideĩ ne awã awe be loko flee kakpa foletsa vɔẽ katse mɔ foe akũ kolomena.

XXII Ade Paulo yidza edza ne bati a ane kame ele kĩ, “Atenefo! Mmó kĩ ne letsa nye letsa kame ni, miapi mi osum kadunamɔ akũ paa.

XXIII Kitonekĩ kĩ ntsẽ ne omato kame ndã mi fɔtsa kumekume a kĩ miasum a ni, mmó kĩ betsele ne afolie kabɔa de lidi akũ kĩ, ‘Bɔkɔa bɔakpa Baguma a kĩ bunyina a.’ Baguma a kĩ minyina, leme miabɔa afolie kakpa ye a, ade ye akũ foletsa nlamena mi kabi finyaakĩ a.

XXIV “Baguma kĩ nye letsa nye letsa Olate, kĩ ebɔa tite mɔ ode mɔ fɔtsa flee a kĩ fudeĩ ne foe kame. Yaádzi ne kola a kĩ batidziwa ke mɔ awe a kame.

XXV Etási boe letsama kĩ bɔkɔa awe bɔkena a, kitonekĩ ye mɔawe akpa oti nkpã mɔ kaweya, mɔ letsa nye letsa kĩ lisí oti.

XXVI Enye fude fude bati a a flee etomena otidziwa mɔape kame kĩ bidzi ne tite akũ. Ye mɔawe liyi loko mɔ fudzikɔ tebẽ ekpa bati flee.

XXVII Baguma kena fukĩ ayekĩ boe batidziwa baawe ye liti osi bomó ye, tito kĩ eláa mɔ lugo ne boe sekẽ malo.

XXVIII Kitonekĩ nde ayekĩ mi tɔno bamene badi ale kĩ, 'Ade ye dzi fɔ budzi, bɔtsẽ budeĩ nkpã a.' Ade bele leme kĩ, 'Boe malo bɔnye ye kasinu a kame babi.'

XXIX "Ne kĩ bɔnye Baguma babi sũ ni, ketáfeta kĩ bɔakona kĩ Baguma kutitse la nde litsedi kĩ batidziwa kɔa awe beme mo sika ngbã, suwovoe ãye futse.

XXX Kito ane katinya kayɔkayi keyawo nviã kĩ a, Baguma távele bati sɔto kitonekĩ betányi ye sũ. Leme finyaakɔ̃ ekpa ɔledo kĩ bati flee ne kako nye kako bedani be tɔwɔle kame.

XXXI Kitonekĩ ehihie luwi eyi kĩ de akũ oti a kĩ epau a, aadzemo katinya kame flee ne ɔnokɔali kame. Kĩ yaakena fukĩ sũ ni, edzela Oti a Kĩ Baguma bɔa Tɔdɔ a etomena kanɔkpa ade ke enye ye etsa bati flee a!"

XXXII Kĩ binu kĩ Paulo le kɔdzela ne kayidza kato kanɔkpa akũ a, bati a badi di ye nsekuo, ade babebã leme le kĩ, "Bɔawe kĩ bɔabuki butse foletsa fudi ne oti kabu kayidza a akũ."

XXXIII Kĩ fɔya lomo a, Paulo dzakũ efone be.

XXXIV Leme bati a badi tomo ye bedani bekena bate badone. Be kame badi nye Dionisio, kĩ enye Areopago ɔnokɔẽ, mo otsole odi kĩ bave Damari, mo bati bebã.

XVIII

Paulo Naa Korinto.

I Fukĩ liti a, Paulo dzakũ ne Atene enaa Korinto.

II Ne awã a emɔ Yudani odi kĩ bave Akwila kĩ eto Ponto. Bemɔ ɔtsɔ Priskila bito Italia beya ne

awã owi tábuna, kitonekĩ legã a kĩ bave Klaudio si mbla kĩ Yudafo flee bene ne Roma. Paulo naa enamõ be,

III ade ena ne be sekẽ ekabumõ be adzuma, ne kĩ bemõ be bakena adzuma mõa sũ. Bekõa bayae tuvoli bekapam tilima fõla fõtsa nde ayekĩ Paulo lemẽ akena a.

IV Ne Kaweya Luwi lidi nye lidi akũ ni, Paulo kanaa Yudafo katsenakõ, kanaanye fõletsa kame katsa Yudafo mõ Grikifo, kĩ bedani tõwõle kame.

V Kĩ Sila mõ Timoteo to Makedonia beya a, Paulo na aya koũ ede letsã ne kale wĩ a akũ, ade edi adansie etsa Yudafo a kĩ Yesu nye Kristo a.

VI Lemẽ kĩ Yudafo a yidza bedza ne ye akũ bele fuvũnatsa ne ye akũ sũ ni, ekpa ye akũ eko be ele kĩ, “Nte miyela ni, mi mõawe aate foe sõtõ kavele. Yĩ akũ kpale, ntáku kõtõ. Kito finyaakĩ kanaa ni, maanaa bikĩ benyẽ Yudafo a sekẽ nnaabi be kale wĩ kũ.”

VII Kĩ edzakũ ne be sekẽ a, enadzi ne onyole odi kĩ enye Yudani kĩ bave Tito Yusto tõtõ kame. Enye oti kĩ yasum Baguma ade ye awã lemẽ fuãmõ Yudafo katsenakõ a.

VIII Katsenakõ onõkõẽ a kĩ bave Krispo mõ ye akũ bati flee te boe Òlate bido ade bete mui kawõla amaniẽ a. Ade ayea bekena Korintofõ pii a kĩ bete bido a mui kawõla amaniẽ lemẽ a.

IX Luwi a lenye ni, Paulo na kanyekatsa, ade boe Òlate bi ye kĩ, “Tavila. Tafõ kale wĩ a kale.

X Ntomõ nõ, odima lelápuli ekena nõ letsakpa lidima, kitonekĩ bati pii kĩ benye yĩ bade lemẽ deĩ ne omato kũ kame.”

XI Foesũ Paulo dzi ne awã kateli mõa mõ seke ekatsa bati Baguma kale a.

^{XII} Leme loko a kī beyadzina Galio nde Roma abāã onokoẽ ne Akaia tite akū a, Yudafɔ badi tsa folo biyidza bedza ne Paulo akū, bipi ye benamena foletsa kadzekõ.

^{XIII} Ade ke bibi onokoẽ a kī, “Obi kī lamena bati adzuni kadani kī bisum Baguma ne osi kī etia boe mbla akū.”

^{XIV} Leme kī Paulo we kī yanye ye akū onukpẽ pe, Galio bi Yudafɔ a kī, “Yudafɔ mitse! Nte mi kale kī miyamena kī mɔ mfumsu baũ adi yane kõ ni, kufe maana owole ntse mi.

^{XV} Leme kī fonye foletsa kame kanye ne buĩ mɔ mi temanie akū sũ ni, mi mɔawe minaasa foe kame mimane foe. Fonye foletsa kī madzi ndze.”

^{XVI} Foesũ eblomena be enemena ne ye foletsakadzekõ a.

^{XVII} Ade bati kodabu a napi Sostene kī enye Yudafɔ katsenakõ onokoẽ a bibo ne foletsa kadzekõ kola kame a. Leme Galio tákpeti be kolaa.

Paulo Muniki Enaa Antiokia.

^{XVIII} Paulo dzi ne Korinto fuwi beblebee. Ke liti a, ekla bate badone a ade bemɔ Akwila mɔ Priskila binyina mpo benaa Siria a. Fomɔ Paulo aadzakū ne Kenkrea a, efõ bekpa ye lolɔ tsolitsoli ne fubo a kī elo ne Yudafɔ amanie osi sũ.

^{XIX} Kī biwo Efeso a, edzakū efone Priskila mɔ Akwila ne awã. Edzakū enaa Yudafɔ katsenakõ a enanye foletsa kame mɔ Yudafɔ a kī bena ne awã a.

^{XX} Bati a ke ye aduli kī edzi ne be sekẽ sukuloo a, leme etátuno.

^{XXI} Ne foesũ kī yadzakū a, ebi be kī, “Nte fonye Baguma kawɛ ni, owi lelábuna mɔ maabuki ãya

ne mi sekẽ." Ade ke ewo ne okolo kame edzakũ ne Efeso a.

^{XXII} Kĩ ewo Kaisarea a, enaa Yerusalem enawõna bate badone a, ade ebuki etẽ enaa Antiokia a.

^{XXIII} Edzi ne awã sukuloo etsã emini ne Galatia mo Frigia tite a kame, ekado bate badone a kebẽ.

Apolo Naa Efeso.

^{XXIV} Ne lokoa na kame ni, Yudani odi ya ne Efeso. Bave ye Apolo ade bema ye ne Aleksandria a. Enye oti kĩ enyina kodzela kale ade enyina Katselẽ Kpalẽwa a kame foletsã leme a.

^{XXV} Tito kĩ betsa ye fotsã ne boe Olate kale wĩ a akũ, yale kodzela mo kobẽ ne Yesu akũ malo ni, Yohanes mui kawola amanie akũ foletsã odi enyina.

^{XXVI} Ekale kale mo kobẽ ne katsenakõ a. Kĩ Priskila mo Akwila tse ye foletsã a, bekpã ye benamena be awã ade benanye Baguma osi a betsa ye yededeede a.

^{XXVII} Kĩ Apolo yake otse kĩ yaanaa Akaia, bate badone ne Efeso a yado ye kobẽ. Betselẽ ovoli bekpã bikĩ ne Akaia kĩ bete ye atuu. Kĩ ewo awã a ebumo bati pii a kĩ bedani towole kame ne Baguma konyakamo sũ.

^{XXVIII} Ade ke enya Yudafo a akũ ne foletsã kavele kame a, kitonekĩ enye Katselẽ Kpalẽwa a kame foletsã etsã yededeede kĩ Yesu nye Oti a kĩ Bẽbaa todõ a.

XIX

Paulo Naa Efeso.

^I Kĩ Apolo na ne Korinto a, Paulo tsã aboa, etsã fuyite fuyite a enane ne Efeso. Awã naa, emo bate badone badi.

^{II} Ade evia be kī, “Kĩ mite mido a ni, mite Hūhū Kpalēwa a?”

Ade ke bekpa mbuaye kī “Oowo! Litsa nye Hūhū Kpalēwa a? Botánu tō foe akū letsama.”

^{III} Ebuki evia be kī, “Litsa mui kawola amanie mite?”

Ade bibi ye kī, “Yohanes mui kawola amanie a kī ke akū ede letsã a.”

^{IV} Paulo nye foe kayo etsa be kī, “Yohanes kena bati mui kawola amanie kī bedani towole kame. Ade ebi be kī bete oti a kī yaaya ne ye Yohanes liti a bido. Ade oti a nye Yesu a.”

^V Kĩ binu foletsa kī a, befō Paulo kena be mui kawola amanie ne boe Jlate Yesu dī akū.

^{VI} Ade kī Paulo te awe ne be akū a, Hūhū Kpalēwa a ka eyate be flee kame ade bele kodzela ne tide aholo aholo kame a, bele Baguma kale a leme a.

^{VII} Be lidede aawo nde banyole ewua-nviã.

^{VIII} Paulo kanaa katsenakō a ne tideto elale kame, ekabi bati kale wī a mo owole kado. Enye foletsa kame etsa be, eboa mbodi kī yavele be adzuni eyamena ne Baguma legākanya a akū a.

^{IX} Leme bati a badi na ato osī, betátse kale wī a, ade bele tuwuli kpa ne boe Jlate Osi Wī a akū ne bati a flee ane kame a. Foesū Paulo dzakū ne be sekē, ade ekpā bikī bete bido a enamena Tirano kadzikō. Ade awã ekatsa be fotsa luwi nye luwi a.

^X Ekoa futeli nviã etsa be fotsa lomō, ade Yudafō mo Helafō a kī bidei ne Asia kame kame a leme nu boe Jlate kale a.

Skeva Babinyole Evũkɔɔ Wɛ Kɔbẽ.

XI Baguma kpa Paulo kɔbẽ ekɛna awãwã fɔtsa pii.

XII Ntɛ bɛkɔa ye tuduku mɔ tɛtadiɛ malo bɛtamɔ basɔnɛ ni, bana akũ ɔsi, ade fɔablɔmena hũhũ kpa katɔmena bikĩ edeĩ nɛ be kame a kame a.

XIII Ade Yudafɔ bawane badi tsẽ nɛ fɔko kĩ be malo bablɔmena hũhũ kpa. Bɛkɔna kĩ baapuli bɛkɔa Yesu dĩ bɛblɔmena hũhũ a. Bibi hũhũ kpa a kĩ, “Mablɔmena mi nɛ Yesu a kĩ ye fɔletsɔ Paulo tsẽ yalɛ a dĩ akũ!”

XIV Bikĩ bɛkɛna fukĩ nyɛ bawañnyole evũkɔɔ kĩ bɛnyɛ Skeva, Yudafɔ Ɔsɔfɔnɔkɔẽ Flee babi.

XV Lemɛ kĩ bɛnabi hũhũ kpa adi tuwuli kĩ a, ebi be kĩ, “Ĩnyina Yesu, ĩnyina Paulo malo. Lemɛ mi kɔ, ĩnyina mi! Bawei miane?”

XVI Ade oti a kĩ ye kame hũhũ a deĩ a wo nɛ be akũ ebo be a! Bilomɔ mɔ ɔdzɔ mɔ akũ fɔkpa bɛnɛ nɛ toto a kame.

XVII Fɔletsɔ a kĩ fɔya a gba nɛ Efeso, ade Yudafɔ mɔ bikĩ bɛnyɛ Yudafɔ flee nu foe a. Nɛ foesũ libe wo bati paa, ade boe Ɔlate Yesu dĩ buki lide nɛ ode libu a.

XVIII Bati pii kĩ bɛdani tɔwɔlɛ kame a, nɛ bɛya nɛ kanade bɛyanye be tɔkpa bɛtsa.

XIX Bikĩ bɛnyɛ bawane ĩye madzikifɔ a lemɛ lo be fuwa, fɔbɛ mɔ foe akũ tuvoli bɛyamɛna bipila nɛ kanade. Tuvoli a kɔya aawo ndɛ sika owo mpim aduenum.

XX Fɔtsã ɔsi kĩ akũ boe Ɔlate kalɛ a gba mɔ kɔbẽ, ketɛ awã lemɛ flee.

Ɔtutũ Ya Nɛ Efeso.

XXI Ne fukĩ liti a Hũhũ Kpalɛwa a fõ Paulo kena adzuni kĩ yanatsã Makedonia mo Akaia enaa Yerusalem. Paulo le kĩ, “Nte nto awã ni, kene kĩ ntẽ nnaadã Roma lama.”

XXII Edo ye babumenane nviã Timoteo mo Erasto kĩ benya loto bena Makedonia, ade ye moa edzi ne Asia kame kame fe a.

XXIII Ne lokɔ a na kame ni, ɔdze kpale odi ya ne Efeso kĩ fotsẽ Kristo kate kado osi a akũ sũ.

XXIV Fukĩ yi kayo futo odi kĩ bave Demetrio kĩ yakoa sika ovoe katu Artemis asoli kola akũ fotsa a. Bemɔ ye adzuma bakenanane a bano foe kakpa bikĩ bayaaboa afolie kakpa baviõ a. Adzuma kĩ akpa be nfaso baũ paa.

XXV Luwi a, Demetrio ve sika fotsa batune a flee ekpota ade ebi be kĩ, “Nwaẽ ame, minyina kĩ boe akũ kana to adzuma kĩ kame.

XXVI Ade mi moawe minu, mimó yededeede ayekĩ Paulo do boe adzuma kĩ konyoã a. Epuli ebula bati a adzuni kade kĩ baviõ fotsa kĩ boatu a lenene, nné ne Efeso odi fukĩ lamena kaya, mbom ne Asia tite a flee akũ.

XXVII Lemé nné boe adzuma odi aabu kade! Boe baviõ kpale Artemis dĩ mo obu flee lemé aawo ne Asia mo katinya kame flee!”

XXVIII Kĩ binu Demetrio foletsã kĩ a kalokpa wo be mo osĩ mo osĩ ade bido fowola kaboa awɛ kooaba kĩ, “Boe Oma Artemis nye Efesofɔ baviõ kpale!”

XXIX Fowola kĩ te omato a kame flee. Ne foesũ omato a boa obũ ade bipi Paulo batomenane nviã a kĩ be nye Gaio mo Aristarko kĩ bito Makedonia, benamena omato a katsenakõ a.

XXX Paulo leme we kufe kī yanaa awã, leme bate badone bebã sua ye osi.

XXXI Kayite a na banokõ kī benye Paulo bakoba leme do loto ne ye sekẽ, bike ye aduli kī etasuma katsenakõ a.

XXXII Lokõ a na ni, katsenakõ a flee kena yoo. Bati a badi lamena letsa moa kale, babebã lamena letsa bebã kale, ade be pii leme ti binyina letsa a kī de sũ beyatsena ne awã a.

XXXIII Ade Yudafõ a vele Aleksandro beyadzela ne loto kī eyaanye letsa kī de lya a onukpẽ. Ade Aleksandro dzela akpõ ne ode ete be awe kī befõ ebi be kadi.

XXXIV Kī bati a mo biyi osũ kī Yudani yane sũ ni, bibuki bebõa fowõla, fote nde ndõhuile nviã. Bekale kī, “Boe Oma Artemis nye Efesofõ baviõ kpale!”

XXXV Owi tábuna fomõ abãã onokõõ odi puli eyadina bati a ade ebi be kī, “Nwaẽ ame Efesofõ, mi kame odi nye odi nyina kī Efeso nye Artemis, baviõ kpale a kadzikõ, ade ke de kpalewa a kī lito ode laka a leme deĩ ne boe sekẽ a.

XXXVI Odima lelápuli ele kī fõletsã kī lenyé onokõali, foesũ mina owõle lokõa mitakena letsama mo kalõkpa.

XXXVII Kitonekī bati a kī mipi miyamena ne awĩ a táye Artemis kiviõla fõtsã fudima iye bele fõletsã kpa fudima bitia boe baviõ a.

XXXVIII Leme nte Demetrio mo ye adzuma bakenane a deĩ kale mo odi kõ ni, fõletsã badzene deĩ. Ade budeĩ fuwi kī foe akũ badze fõletsã, kī baapuli bekõa betsa letsã kī litia be a benamena awã.

XXXIX Leme nte foletsa bebã mineε kō ni, mifō bokoa foe bonaayi ne foletsa badzene a anε bedze ne mbla onukpē.

XL Kitonekī nviã otutū kī kō kena nde kayidza kadza ne abãã akū kī baapuli bebōε foletsa ne boe akū. Ade nte banokōē a via boe kadi ni, boláapuli bonyε foe onukpē. Baavele boe soto.”

XLI Kī ελε fukī eyua, enye be flee a osi, ade bepansam a.

XX

Paulo Naa Makedonia Mō Akaia.

I Kī otutū a onukpē dō a, Paulo ve bate badone a ekpota. Kī ena kadi ebi be, edo be kobē leme eyua a, evia osi edzakū enaa Makedonia.

II Paulo tsã kame kame na flee ebi bati boe Jlate foletsa pii ekado be kobē, ekoa eyawo Akaia.

III Edzi ne awã tideto elale. Loko a kī ekamane akū kī yadzakū enaa Siria tite akū, eyamō kī Yudafō a sui ne ye akū. Ne foesū eke otse kī yabuki edani etsã Makedonia kame a.

IV Bemō bati pii letsã benaa. Ade be nye Sopater, Piro obi kī eto Beroia, Aristarko mō Sekundo kī bito Tesalonika. Babebã nye Gaio kī eto Derbe, Tihiko mō Trofimo kī bito Asia, mō Timoteo.

V Benya boe loto benadzole boe ne Troa omato a kame.

VI Kī bonya Yudafō Abodoo kī Etáyila Fuwi a buyua a, budzi okolo ne Filipi ade bunyina bonaa be sekē ne Troa a. Buwo awã ne fuwi elo liti, ade budzi ne awã fuwi evūkono a.

Paulo Naa Troa Nkaε.

^{VII} Ne ekwansieda luwi letonyade akū a, bōtsena kī bōa nya boe ɔlate funitsā a. Ne kī Paulo aadzakū nte kade nyina sū ni, εε kōdzela flee kenawo lenye kayite.

^{VIII} Betena tēsēdza ne abansulu kōla a kamε.

^{IX} Kī Paulo le kōdzela gēlēεε sū tida bōε Eutiko, opopo kī ede edzi ne nfansili. Eto abansulu kōla kōlalēde a eyatō ne tite. Bikī benabōε ye a mō kī eku.

^X Lemε kī Paulo ka εnaa a, ekena akū eboomu ye, ade ebi be kī, “Mitavila! Edeī nkpā!”

^{XI} Ade be flee bibuki bide benaa abansulu ode a benanya boe ɔlate funitsā a. Paulo buki εlemō be kōdzela flee kenawo odenyinawi ade εdzakū a.

^{XII} Ne kī letsama tākēna opopo a sū ni, bekpā ye benamēna kōla, ade ɔwōε ka edzi be a.

Paulo To Troa Enaa Mileto.

^{XIII} Paulo tsā abōa εnaa Aso a. Lemε boe a kī butomō ye a budzi ɔkolo bōnya ye lōtō kī bōanatselamō akū ne awā, lōkōa bōbōε ye nde ayekī εtsa a.

^{XIV} Kī eyamō boe ne Aso a, boe flee bōdzakū bonaa Mitilene.

^{XV} Odenyinawi a buwo Kio ntintiso. Luwi leyade akū ni bonawo Samo, ade ne luwi lelade a buwo Mileto a.

^{XVI} Paulo fō bōtē Efeso, kitonekī εtāwe kī yabula lōkō pii kade ne Asia tite akū. Eke otse lemε kī nte fōana ye sōwa ni, yaana ne Yerusalem ne Pentekoste luwi a akū.

Paulo Kla Efeso Bate Badone Banōkōē a.

XVII Leme kī buwo Mileto a Paulo do batɔ ne Efeso bate badone banokɔẽ a sekẽ kī beyaatselamo ye ne awã.

XVIII Ade kī beyaa a, ebi be kī, “Nwaẽ ame, mi a flee minyina ayekī ndzi ne mi sekẽ, kito loko a kī ñya ne Asia tite akū a keyawo nviã kī a.

XIX Mimó ayekī ndola yī akū nsum Boe ɔlate, tito kī nna ne lubo kamo mo kabe kame, ne ayekī Yudafɔ we kī bako yī sū.

XX Leme minyina kī ntákola mi onokɔali a. Fɔtsa a flee kī ñnyina ne boe ɔlate akū a, ade foe ntsa mi a. Ntsa foe ne kanade flee ane mo mi toto kame.

XXI Ade kako nye kako kī ntsã mmini ni, nde Yudafɔ mo Helafɔ flee mo osĩ mo osĩ kī bedani be towɔle kame beya ne Baguma sekẽ, lokoã bete boe ɔlate Yesu bido.

XXII “Finyaakī manaa Yerusalem ne Hūhū Kpalɛwa kawɛ onukpẽ, ne kī ñnyina letsa kī laaya ne yī akū ne awã a.

XXIII Leme ne omato odi nye odi kame kī ntsã ni, Hūhū Kpalɛwa a fɔ ñnyi kī maawa kola ne lubo kamo kame.

XXIV Yī nkpã lɛla nfaso adima, nte ntápuli nkɛna letsa a kī boe ɔlate Yesu do yī kī nkɛna a. Letsa kī edo yī kī nkɛna nye kī nkaabi bati Baguma Kalɛ Wī a, mo ayekī edeĩ seme kalɛ ekpa boe.

XXV “Finyaakī ñnyina kī mi a flee kī minu kī ntsa mi fɔtsa ne Baguma legākanyakɔ akū, bómó mi bɔlaabuki bómó akū dadaada.

XXVI Ne foesū mabi mi paa nviã kī, kī nte odi yɛla ye nkpã ni, nné yī nfumusu fɔane.

XXVII Kitonekĩ ne ɔnɔkoali kame ni, ntákola mi letsama ne Baguma legākanyakõ a akũ.

XXVIII Ne foesũ mina ne kukũmanε kame. Hũhũ Kpalεwa a lepau mi ndε loto banyanε kĩ mipi ye babi a kĩ edo mi ne awε a kapi wĩ. Mipi be kapi wĩ, kitonekĩ Baguma kɔa ye Ōbi babɔanε eko ne tite enye be.

XXIX Ade ãnyina yededeede kĩ nte ndzakũ ni, bati kpa aayawo ne mi kame lokɔa beyale mi ndε ayekĩ kulikiĩ awo ne baveli kame a.

XXX Ne mi moa awε kame malo ni, bavãlevã aane, lokɔa bekpã bate badone pii betsãmena fɔvã fɔtsa katsa a osi akũ.

XXXI Foesũ midã kadã wĩ, lokɔa mite anε ayekĩ nkɔa anε mo babe ntsa mi fɔtsa lenye mo suwa flee ne futeli elale a kĩ nna ne mi kame a.

XXXII “Finyaakĩĩ, nkɔa mi mado ne Baguma awε kĩ εdãmena mi akũ mo ye fɔlets a kĩ fɔabumena bati a, fudo mi katekado kɔbẽ ayekĩ fɔakena mi ode fɔtsa banyanε ndε bikĩ epau ekpa ye akũ a aye.

XXXIII Anε tábeεle yĩ ne odima sika ngbã ãye suwovoe ãye tilima akũ.

XXXIV Mi awε minyina kĩ yĩ awε kĩĩ nkɔa nkena adzuma ndãmena yĩ mo bikĩ bitomo yĩ a lemε akũ a.

XXXV Nkena fukĩĩ bame flee nnεε matsa mi ayekĩ mikena adzuma kɔɔba mibumena ahiãfo, ade mite anε ne lets a kĩ boe Ōlate Yesu le a kĩ, ‘Kakpa deĩ nhila kebẽ kate.’ ”

XXXVI Ade ke kĩ Paulo le kɔdzela eyua a, eke aduli ade bemɔ be flee bobɔa mpas a.

XXXVII Lokɔ a kĩ ekakla be a, bekɔa anε mo babe bekatu kaboomu ye.

XXXVIII Letsa a kī de lēfō biwo ɔblo kou a nye ayekī ele kī bemō be beláabuki bemō akū dadaada a. Biyi ye osi benawo ɔkolo a ɔwē ne ɔwo abuī.

XXI

Paulo Naa Yerusalem.

^I Kī bokla akū buyua a, budzi ɔkolo botsā kpī bunyina bōnaa Kos. Kī kade nyina a buwo Rodo ade botē bōnaa Patara a.

^{II} Awā naa budzi ɔkolo odi kī yanaa Foenike.

^{III} Bómó Kipro tite a ne loto, ade botsā te kayo kayo a bōnaduma ne Tiro, ne Siria tite akū, awā kī baanye fotsa flee a kī ɔkolo a nɔne a.

^{IV} Bómó bate badone badi ne awā, ade bōna ne be sekē ekwansieda mɔa a, kitonekī Hūhū Kpalēwa a tsā be akū bibi Paulo kī etanaa Yerusalem.

^V Kī boe kadzakū wo ɔto a, bate badone a mō batsō mō babi flee yi boe osi benawo mpo abuī. Awā na boe flee buke aduli bōbɔa mpaε.

^{VI} Kī bokla akū buyua a, buwo ne ɔkolo kame ade be malo bimuniki benaa fola a.

^{VII} Bōbɔε buto Tiro ade bōnadza ne Ptolemia a. Bōnawōna bate badone a kī bideī ne awā ade budzi ne be sekē luwi mɔa a.

^{VIII} Kī kade nyina a, bōdzakū ne awā bōnaa Kaisarea. Bōnase ne Filipo, Kale Wī a Letsā odene a awā. Enye babumenane evūkɔno a kī bepau ne Yerusalem a kame ɔmɔa.

^{IX} Edeī bayitsō ena kī bidzí fonyo, ade benye Baguma onukpē banyene leme a.

X Bɔna ne awã fuwi fudi ade foe kame a Baguma onukpẽ onyenɛ a kɔ bave Agabo to Yudea eya a.

XI Ade kɔ eya ne boe sekẽ a ebɔe Paulo owẽ a kɔ yakɔa kaboomu kate a esuli ye moa awe akpo mo abɔa, ade ele kɔ, “Hũhũ Kpalɛwa a bo ni, ade aye Yudafo ne Yerusalem aasuli owẽ kɔi ɔlate bekɔa ye bido ne bikɔ benyɛ Yudafo banokɔɛ a awe a.”

XII Kɔ boe flee bunu foletsɔ kɔi a, bɔmɔ bati a kɔ bideɔ ne awã flee a buke Paulo aduli kɔ etanaa Yerusalem.

XIII Lemɛ Paulo bi boe kɔ, “Litsɔ nye kabe a kɔ mikɔa miaveli yɔ akpo? Mmanɛ akũ nkpa nnɛ kɔ bisuli yɔ ne Yerusalem odi lemɛ kɔ maaku ne awã ne boe ɔlate Yesu sũ.”

XIV Kɔ bɔmɔ kɔ boláapuli bɔdani ye adzuni sũ ni, bɔfonɛ ye awe ade bɔle kɔ, “Boe ɔlate kawɛ keya ne foe kame.”

XV Fuwi fudi liti ni, bɔmanɛ akũ ade bɔdzakũ bɔnaa Yerusalem.

XVI Bate badonɛ badi to Kaisarea bitomɔ boe bɔnaa. Kɔ buwo awã a, bekpã boe bɔnase ne onokɔɛ odi kɔ bave Mnason awã. Eto Kipro ade enye bate badonɛ batɔnyade a kame omɔa a.

XVII Kɔ buwo Yerusalem a bate badonɛ a tɛ boe mo kawɔle.

Paulo Namɔ Yakobo.

XVIII Kɔ kade nyina a, Paulo kpã boe bɔnamɔ Yakobo mo bate badonɛ banokɔɛ flee a ne Yerusalem.

XIX Ade kɔ bɔnawɔnɔ akũ buyua a, Paulo bɔa be amandɛ ne letsɔ nye letsɔ a kɔ Baguma kena ne ye kamini ne bikɔ benyɛ Yudafo kame a akũ.

XX Kĩ bitse foletsa a biyua a, be flee bimu Baguma ade bibi ye kĩ, “Boe owaẽ, dã ayekĩ Yudafõ mpim mpim te bido, ade bipini Mose mbla a mo ɔsĩ mo ɔsĩ a.

XXI Bati badi bi be kĩ ɔtsa Yudafõ a kĩ bideĩ ne fude fude a kĩ betakena ne Mose mbla mo boe temanie a akũ, ade obuki ɔtsa kĩ betatsua be babi fokpati leme a.

XXII Baanu kokooko kĩ oya ne boe sekẽ. Ne fukĩ sũ litsa kene kĩ bokena finyaa?”

XXIII Ade ke bekpa ye adzuni kĩ “Budeĩ bati ena kĩ bido lideto.

XXIV Kpã be kanamena Yudafõ Asoli Kola kame kabumo be minye lolõ kakpa lideto a kase foe koto. Fukĩ aafõ odi nye odi lomo kĩ fovã bema bite ne no akũ, lokoa fotsa leme kĩ opini Mose mbla a kapini wĩ.

XXV Bate badone a kĩ benyẽ Yudafõ a kõ ni, botsele be ovoli bubu be kĩ betabuki benya fotsa kĩ bekõa bebõa afolie bekpa baviõ, befõ babõane kanya, betaba bayae kĩ betatsua be fomõ, lokoa befõ linyolewe mo litsolewe.”

XXVI Foesũ kĩ kade nyina a, Paulo kpã banyole a, ade bonakena lolõ kakpa tsoli tsoli amanie a. Ke liti a, enaa Yudafõ afolie kabõakõ a enakpa basõfõ kanyi ne fuwi a kĩ tolõ kakpa amanie a aawũna, mo futetsa a leme kĩ yaama be bekõa bebõa afolie a ne be lolõ.

Bipi Paulo Ne Yudafõ Asoli Kola a Kame.

XXVII Ade kĩ kite sukuloo lokõa fuwi evũkõno a aawo ɔto a, Yudafõ badi kĩ bito Asia kame a yamõ Paulo ne Asoli Kola a kame. Bido ɔtutũ ne bati a badi kame ade bipi Paulo a.

XXVIII Bekaboa fowola kale kī, “Israelfo miyaate mo boe tsoo! Ade oti kīi tsē yamini ne kako nye kako, yabi bati kī betakena ne boe Yudafo mbla aku a. Ye leme ekpā Grikifo eyawomena ne Asoli Kola a kame, kī foatsa kī ebula boe kako kpalewa kīi.”

XXIX Bele foe lomō kitonekī luwi a benya lotō bemó Paulo mo Trofimo kī eto Efeso a, kī betsē bamini ne Yerusalem. Ne foe sū bekona kī ekpā ye ewomena ne Asoli Kola a kame.

XXX Ne fowola kaboa a sū, akū nyene bati a flee ade biwula atse yoo benatsena ne Asoli Kola a kame. Badi vele Paulo benemena ade bebale tunyukpē flee a.

XXXI Lokō a kī bewē kī bako ye a, Romafō sodzafō onokōē odi nu kī Yerusalem omato a flee deī ne otutū kame mo fowola kaboa.

XXXII Deedimōape ekpā sodzafō badi benaa awā kī bekakena hūnyehūnyē a. Kī bati kīi mo sodzafō mo be onokōē a pe befō Paulo katuli.

XXXIII Awā naa, sodzafō onokōē a fō bipi Paulo ade bido ye nkōsonkōso nviā a. Ade evia etse oti a odu kī yane mo letsa a kī de ekena a.

XXXIV Bati a flee kanye tunyukpē futefute. Kī sodzafō onokōē a lanu letsama kayō potii etomena be sekē ne fowola mo osī a sū ni, efō bekōa Paulo benado ne kola a kame.

XXXV-XXXVI Kī bekōa bade kola onyukpē kadekō a, foya ne sodzafō a kame kī bebōe Paulo bedela ne ode ne bati kodabu a kalokpa a kī bena ne Paulo akū sū. Ade bitomō be mo fowola kpaa kaboa kī, “Mikō ye! Mikō ye!”

Paulo Pili Ye Lolō.

XXXVII Loko a kī bekōa ye bado ne kōla kame a, Paulo bi sodzafō ɔnokōẽ a kī. “Nwe kī malōmena mō nō sukuloo.”

Ade ke sodzafō ɔnokōẽ a via ye kī, “Yie! Ale Griki tide?”

XXXVIII Ade ebuki evia ye kī, “Ne nō nye Egipteni a kī loko lidi ekpā awudifō mpim ena biyidza bedza ne abāã akū, kī bilo benaa kōsa kame a?”

XXXIX Ade Paulo kpa mbuaye kī, “Yudani mane. Bema yī ne Tarso ne Kilikia tite akū. Ade ɔmato a na ni, nné ɔmato kabii yanε. Foesū make nō aduli fō nlemō bati kī kōdzela.”

XL Adeke ɔnokōẽ kī tunō kī Paulo elemō be kōdzela a. Paulo ne eyadza ne onyukpē kadekō a, ade ete awe ne bati kōdabu akū kī bekena dī a. Kī befō fōwōla kabōa a, elemō be kōdzela ne Yudafō tide kame kī,

XXII

I “Nda ame mō nwaẽ ame, agoo! Mifō ñnye yī onukpē kame fōletsā mitse.”

II Kī binu kī Yudafō tide kame ele kōdzela a, bekena fōwōla kabōa ne kayō bibu. Ade ke Paulo bi be kī,

III “Yudani mane ade bema yī ne Tarso, ne Kilikia tite akū a. Leme Yerusalem ne awī bedōola yī, nkole fōtsa ne Gamaliel kayō. Betsa yī boe bawanyō mbla a mō foe akū amanie a flee yededeede. Ade nkōa yī ɔwōle flee nkpa Baguma ndε ayekī mi malo miakena nviã kī a.

IV Kito loko a na, ntomō bate badone a kī betse osi vōẽ a liti, nwe kī beko be. Ade nkapi batsole mō banyole kado ne kōla a.

V Boe Ɔsofɔnokɔẽ Flee mo ɔmaĩ banɔkoẽ aapuli bidi adansie ne fukĩ male kĩĩ akũ, kitonekĩ bekatsɛle tuvoli kakpa yĩ kĩ nkɔa nkɛna fɔtsa kĩĩ bame. Ade lɔko a kĩ manaa Damasko a ni, bekpa yĩ tuvoli kĩ nkɔa mma Yudafo ne awã ndza ne foe akũ mpili bate badone a nsuli be nkɔa iyamena ne Yerusalem bevele be soto.

VI “Lɔko a kĩ ntsẽ manaa, kĩ kite sukuloo mawo Damasko, nde suwa tɔdɔũ ewua-nviã kame a ni, deedimɔape ɔhaĩ mo ɔsĩ odi to ode eka eko ne yĩ akũ!

VII Adeke nka ntɔ ne tite, ade nnu ɔledo odi kĩ ekavia yĩ kĩ, ‘Saulo, Saulo, nde sũ oyidza ɔdza ne yĩ akũ lomɔ?’

VIII “Ade nvia kĩ, ‘Boe Ɔlate, nɔ oweĩ ane?’

“Ebuki ebi yĩ kĩ, ‘Yĩ nye Yesu Nazaretni a kĩ ye akũ oyidza ɔdza a.’

IX Bati a kĩ bɔmo be tsẽ a mó ɔhaĩ a lemɛ betánu oti a kĩ bɔmo ye lekale kodzela a odo.

X “Ade nvia ye kĩ, ‘Boe Ɔlate, litsa kene kĩ nkɛna?’

“Ebi yĩ kĩ, ‘Yidza kanaa Damasko ɔmato a kame. Awã na maatsa nɔ letsa a kĩ nwe kĩ kɛna a.’

XI Ɔhaĩ kĩĩ ko yĩ ane foesũ bati a kĩ bɔmo be tsẽ a lipi yĩ ne kɔkpɔ bekpã yĩ bɔdzakũ bɔnawo Damasko ɔmato a kame.

XII “Onyole odi kĩ bave Anania na ne awã. Enye oti kĩ yavila Baguma ade yakɛna ne boe mbla lemɛ akũ yededeede a. Yudafo a kĩ bideĩ ne awã flee a akpa ye obu.

XIII Oti kĩĩ yadza ne yĩ ɔwẽ ade ebi yĩ kĩ, ‘Nwaẽ Saulo bu kamo fɔko!’ Lɔko a na kame pɛpɛpɛ yĩ ane kame kpale yededeede ade mmó ye a.

XIV “Ade ebi yī kī, ‘Boe bawanyo Baguma lepau no eyi kī nyi ye fowetsa, kamo ye Obi Kpalawa a kī Bepau a lokoa kanu ye kodzela leme.

XV Kene kī akoa oledo kī onamena kako nye kako, obi bati flee letsa a kī omó mo letsa kī onu a.

XVI Finyaakī litsa adzole? Yidza lokoa kate mui kawola amanie. Boa mpaε ne ye dī akū lokoa ekoa no titikpa ete no.’

Baguma Do Paulo Enaa Bikī Benyé Yudafɔ a Sekē.

XVII “Fukī liti a, mmuniki nnaa Yerusalem. Ade kī nna ne Asoli Kola kame nkaboa mpaε a, fokona nde tida aboe yī, ade nna kanyekatsa kadi a.

XVIII Ade awā na boe Olate bi yī kī, ‘We sowa kadzakū ne Yerusalem kitonekī awī bati lelátse no folets a kī aale ne yī akū a.’

XIX “Leme nkpa mbuaye kī, ‘Boe Olate, be flee binyina kī yī lekapili bikī betε no bido a ne Yudafɔ fotsenakō a kabo be.

XX Ade loko a kī bekako no odansini Stefano a, yī malo ntuno. Foesū benye be tetadie bekpa yī nle ade bekatalε ye boe a.’

XXI “Leme boe Olate bi yī kī, ‘Yidza kanaa, maado no mo lugo ne bikī benyé Yudafɔ a kame!’”

XXII Loko kī flee a, bati a dza dī bekatse ye kale a. Leme mo ye kale nkaε kawūna pe, be flee boboa fowola kooba kī, “Aa! Ketáfeta kī yadzi nkpā! Mikpā ye minamena minaako ye!”

XXIII Ne kī bena kalokpa paa sū ni, bebɔa fowola kooba ade bido be tetadie kayele, mo kudu kata ne owe kame awe a.

XXIV Ade ke kawũ banone onokoẽ a fõ bekpã ye biwomena ne kola kame kĩ benaabo ye lokoa binyi letsa a sũ kĩ Yudafõ a kpa biko ne ye akũ lomõ.

XXV Lokõ a kĩ bekasuli ye a, Paulo via kawũ banone onokoẽ odi kĩ edzẽ ne awã kĩ, "Osi waa kĩ babo Romani nte betádze ye fõletsã tõ?"

XXVI Onokoẽ kĩ naa be lotõ onyane a sekẽ ade evia ye kĩ, "Litsã akena ne awĩ a? Onyole kĩ boni Romani yane!"

XXVII Foesũ kawũ banone lotõ onyane a ya ne Paulo sekẽ ade evia ye kĩ, "Abo nde? Romani ane?"

Ade ke Paulo kpa mbuaye kĩ, "Romani mane!"

XXVIII Kawũ banone lotõ onyane a bi ye kĩ, "Yĩ malo Romani mane. Yĩ kõ nse kõtõ baũ fomõ ndani nkena Romani!"

Ade Paulo bi ye kĩ, "Yĩ kõ yĩ bamane flee nye Romafõ."

XXIX Ade ke kĩ bati a kĩ bedza kĩ babo ye bivia ye onukpẽ kame fõletsã nu kĩ Romani yane a, bevele akũ benaa liti. Kĩ be lotõ onyane a nyi kĩ Romani yane a, libe wo ye paa, kitonekĩ ye lekpa osi kĩ bisuli Paulo bibo ye.

Bekpã Paulo Beyadzela Ne Fõletsã Badzene Ane.

XXX Kĩ kade nyina, kawũ banone onokoẽ a we kĩ yanyi letsã a kĩ de sũ bebõ fõletsã ne Paulo akũ. Ene Yudafõ basofonokoẽ mõ be fõletsã badzene ekpõta. Efõ biwũnya towẽ ne Paulo akũ ade bekpã ye beyadzela ne be ane kame kĩ bawe ye fõletsã a kame a.

XXIII

^I Ade kī Paulo ko ane edā Yudafo foletsa badzene a kī bikoni dīi ne foletsa kadzekō a, ebi be kī, “Nwaē ame Israelfo, yī owole kame kpale ne ayekī ndzi nkpā ne Baguma ane keyawo nviā kīi a.”

^{II} Kī Anania, Yudafo Ɔsofoŋkoē Flee a kī ena ne awā nu ayekī Paulo kpa mbuaye a, ebi bikī bedza bifuāmō Paulo kī bebōa ye ne onukpē.

^{III} Ade awā mō Paulo bi ye kī, “Baguma leme aabale nō awe! Nō seebi kī bikputa se fōtsa owoe bedzela ane! Litsa foletsa oðzene ane? Mbla akū otsē adzemō yī, leme ade ye mōape a olamena kafum a, ne kī okpa kobē bebale yī oloto sū!”

^{IV} Ade ke bikī bedze ne Paulo owē a via ye kī, “Ɔsofoŋkoē Flee ovūna lomō?”

^V Paulo kpa mbuaye kī, “Nwaē ame, nte ĩnyi kī Ɔsofoŋkoē Flee yane ni, kufe ntádo ye onukpē lomō. Kitonekī Katsese Kpalewa a le kī, ‘Tale tuwuli kpa ne bikī banya mi akū a akū.’ ”

^{VI} Ade kī Paulo mō eyi osū kī bati a kī bekpota ne awā a be kame badi nye Zadukifo ade badi leme nye Farisifo a sū ni, ebōa fowola kooba kī, “Nwaē ame, Farisini mane! Farisifo leme lema yī! Nviā kīi badzemō yī kitonekī nte banokpa kabuki kayidza kadzi nkpā a ndo sū!”

^{VII} Kī Paulo sila ele foletsa kīi eyua pe, kavele ya ne Farisifo mō Zadukifo a kayite, ade besē be akū a.

^{VIII} Kitonekī Zadukifo ale kī banokpa lábuki kayidza, ode foto banyane leláa, ade hūhū leme leláa a. Leme Farisifo kō te fukīi bame flee bido.

^{IX} Ɔtutū kpale wo ne be kame. Farisifo mbla batsane a dza ne Paulo liti kī ye folets a

nye ɔnokɔali. Ade ke beɔɔa fɔwɔla kɔɔba kī, “Botámɔ letsa kpa lidima ne ye akū! Ɔsa hūhū adi ĩye ode fɔto ɔnyane odi alemɔ ye kɔdzela!”

X Fɔwɔla kabɔa a buki fude ne ode fubu. Ade bati a flee pini Paulo bekavele kadu kanamena kayamena a. Kī sodza ɔnokɔẽ a vila kī baavele ye bepããpãã sū ni, ebi ye sodzafɔ a kī beka benaate ye benaado ne kola.

XI Luwi a lenye a, boe Ɔlate yadza ne Paulo ɔwẽ ebi ye kī, “Paulo do ɔwɔle. Ayekī odi adansie ne yī akū ne Yerusalem ne awī a, ade ayea kene kī akena ne Roma lemɛ a.”

Yudafɔ Tsa Fɔlɔ Kī Bakɔ Paulo.

XII Kī kade nyina a, Yudafɔ badi lo fubo bekpa be akū kī nte betáko Paulo ni, beláanya ĩye bemɔa!

XIII Bati kī lidede aana nde be tena mɔ liti.

XIV Ade ke bibuki benaa basɔfɔnokɔẽ mɔ be lotɔ banyane sekẽ bibi be kī, “Bɔlɔ fubo kī bɔlaanya ĩye bɔmɔa kenaawo kī bɔkɔ Paulo.

XV Foesū mimɔ fɔletsá badzene a mibi sodzafɔ lotɔ ɔnyane a kī, ebuki ekɔa Paulo eyamena ne katsenakɔ ne awī. Mikena nde miawe kī miavia ye fɔletsá fudi mibu. Nte bekɔa ye bayamena ni, bóako ye ne osi.”

XVI Lemɛ Paulo ɔfanyole odi nu fɔletsá a flee kī bele a, ade ewula atse enaa kola kame, enabi Paulo letsá a kī de bele a.

XVII Ade ke Paulo ve sodzafɔ a kī bɛdza ne awā kame ɔmɔa ebi ye kī, “Kpã obisẽ kī minaa ɔnokɔẽ sekẽ. Enɛɛ kale mɔ ɔsī kī yaabi ye.”

XVIII Foesū sodzani a kpã kabisẽẽ a benaa be lotɔ ɔnyane a sekẽ, ade ebi ye kī, “Paulo a kī

bido ne kola kame ne awĩ a lewe yĩ ebi yĩ kĩ nkpa kabisẽẽ kĩ mma no, lokoa kibi no kale kadi.”

XX Ade sodzafɔ lotɔ onyane a pi kabisẽẽ a ne kɔkpɔ benaa ɔwẽ ade evia ye kĩ, “Litsa awe kĩ abi yĩ?”

XX Ade ke mo ebi ye kĩ, “Yudafɔ badi kena onukpẽ moa mo be banɔkɔẽ a kĩ bayaake no aduli lokoa kunya ɔkpã Paulo oyamena ne katsenakɔ, mo kakona kĩ bavia ye foletsa fudi.

XXI Leme tatse be kitonekĩ bati nde be tena bela ne osi badzɔle ye. Bati kĩ lo fubo kĩ mbɔente bekɔ Paulo fomɔ baata funitsã onukpẽ. Ne foesũ bemanɛ akũ benabela badzɔle no osi kakra. Benabela ne osi ɔwẽ kitonekĩ bete bido kĩ aatuno ɔkpa be.”

XXII Sodzafɔ lotɔ onyane a si ye mbla kĩ, “Tafɔ odima libuki enu letsa a kĩ oyabi yĩ ne awĩ a dadaada.” Ade ke enye ye osi edzakũ a.

Bekpã Paulo Bema Abã ɔnɔkɔẽ Felike.

XXIII Ade ke sodzafɔ lotɔ onyane a ve ye banɔkɔẽ nviã ade ebi be kĩ, “Miwe sodzafɔ oha nviã kĩ baanaa Kaisarea nviã lenye. Miwe bikĩ bale fɔtsɔe oha nviã, mo bikĩ badzi bapɔnko leme be bati aduesũ.

XXIV Miwe ɔpɔnko mikpa Paulo edzi ne ye akũ lokoa mikpã ye bɔee, mima abã ɔnɔkɔẽ Felike.”

XXV Ade ke etsɛle ovoli odi ekpa abã ɔnɔkɔẽ a kĩ,

XXVI Ovoli kĩ to yĩ Klaudio Lisia sekẽ. Mawõna no, boe Abã ɔnɔkɔẽ Felike.

XXVII Yudafɔ badi pi oti kĩ, ade bewɛ kĩ bako ye a. Leme kĩ bomo sodzafɔ buwo awã a,

nnu kī Romani yanε sū ni, nfō sodzafō a tε
ye nε be awε.

XXVIII Foesū nkpā ye ñyamena nε be fōletsā
kadzekō kī manyi letsa a kī ekena a.

XXIX Ñyamō kī letsa kī bebōε nε ye akū a nyε
Yudafō ɔsum mbla akū fōletsā kī fonyé fukī bado
ye nε kōla kamε ñye bekō ye.

XXX Adeke kī bibi yī kī belamō nhihie kakena
kī baakō ye sū ni, nkona kī makōa ye mma nō.
Mbi bikī bebōε kalε nε ye akū a ku kī bekōa ke
bema nō.

XXXI Foesū luwi a lenye a sodzafō a kpā Paulo
benawo Antipatre.

XXXII Kī kade nyina, sodzafō a kī betṣā abōa
a muniki benaa kōla kamε, ade befō bapōnkō
badzinε a kpā Paulo benamena Kaisarea a.

XXXIII Kī biwo awā a, bekōa Paulo mō ovoli a kī
benεε a bekpa abāā ɔnokōē a.

XXXIV Kī ekā ovoli a eyua a, evia Paulo amantam
a kī eto. Ade kī enyi kī Paulo to Kilikia a, ebi ye
kī,

XXXV “Maanaa nō fōletsā kīī kamε yededeede
nte bikī mimō be mina kalε a ya nε awī.” Ade ke
ekpa sodzafō a kī bedza nε awā a kōbē kī bekōa
Paulo bido nε kōla a kī Legā Herodes ke a kamε
lōkōa bekaadā ye akū.

XXIV

Yudafō Bε Fōletsā Nε Paulo Akū.

¹ Fuwi elo liti a, ɔsɔfɔnokōē Flee Anania,
Yudafō loto banyanε mō fōletsā ɔdzene kī bave

Tertulo naa Kaisarea. Beya ne Felike sekẽ kĩ bayaanye Paulo nfumusu betsa ye.

II Kĩ beve Paulo beyamena a, Tertulo yi Paulo onukpẽ katsua kĩ, “Boe ɔlate, ne no nyansã mo adzuni kĩ ɔne akpã boe sũ ni, bõna lukudo ne loko pii kame. Ade kavemena pii leme ya ne boe tite akũ a.

III Fukĩi nye fotsa kĩ fuwo boe Yudafo flee ane.

IV Bõake no aduli kĩ tse fõletsa a kĩ maabi no ne onyole kĩi akũ a.

V Kitonekĩ bõmó ye buyi ɔsũ kĩ ɔdze odone yane, ade etsẽ ne kako nye kako yadani Yudafo kakona ne katinya kame kĩ bekena fotsa basa bitia abãã a. Enye loto onyane ekpa Nazarefo katsu a.

VI Foe liti a bõmó leme kĩ etsẽ yakena fotsa kĩ fõado boe Yudafo Asõli Kola a effi, ade bupi ye a. Foesũ bõwe kĩ bõadzemo ye ne boe mbla onukpẽ.

VII Leme kawũ banone loto onyane Lisia kõa kõbẽ eyate ye ne boe awe.

VIII Nte ovia oti kĩi onukpẽ kame fõletsa ni, aapuli onyi fõletsa a kĩ bõbõe ne ye akũ a otomona ye sekẽ.”

IX Ade ke Yudafo a flee tuno mo onukpẽ moa bele kĩ fõletsa a kĩ Tertulo le a nye ɔnokõali.

Paulo Nye Onukpẽ Ne Felike Ane.

X Kĩ abãã ɔnokõẽ a ve Paulo kĩ ele kõdzela a, eyi kayo kĩ, “Boe ɔlega, ñnyina kĩ ne futeli pii kĩ fõtẽ kĩi kame ni, no adze Yudafo fõletsa. Ne foesũ kawole de yĩ kĩ maanye yĩ onukpẽ ne no ane.

XI Aanu kī fóana nde fuwi ewua-nviã kī ãya ne Yerusalem ãyaaboa afolie ne Yudafó Asóli Kóla a kame.

XII Ade odima támó kī bómó odi bókena ódze ãye ndo otutú ne Yudafó Asóli Kóla kame, be fotsenakó, ãye kakó kadi ne ómato a kame a.

XIII Ade bati kī kame odima lelápuli eke otse ne letsama akū potii kī foletsa a kī bele ne awí a ni, onókóali fóane.

XIV Leme letsa a kī de akū ntunó nye kī masum boe bawanyó Baguma, ade ntomena Osi a kī bale kī enyé osi wí a. Nte foletsa a kī betsele ne Mose mbla a mó Baguma onukpě banyene tuvoli a kame a ndo.

XV Ndeí kónete ne Baguma akū nde ayekí be malo bideí, kī Baguma aadzela bati wí mó bati kpa flee etomena kanókpa.

XVI Ne kónete kī sū ni, maboa mbodi paa kī yí ówóle kame ekpale yededeede ne Baguma mó batidziwa ane.

XVII “Ade futeli pii kī ndzakū ne Yerusalem a. Finyaakí ãyaate ahiãfó fotsa lókó mboa afolie nkpa Baguma.

XVIII Kí mayua loló kakpa amanie a, Yudafó badi yamó yí ne Asóli Kóla a kame. Nné bómó bati kī banye lema tsě. Ade ke ntádo ódze odima leme a.

XIX Yudafó a kī bito Asia tite akū a na ne awã, ade be kene kī beyaadza ne nó ane kame a, lókó nte bideí kale kadi ne yí akū ni, baale.

XX ãye afó bati a kī bidzi ne awí a bele koto a kī beko yí ne loko a kī Yudafó omaí foletsa badzene a dzemo yí a.

XXI Mbɔɛ nte kale moa a kī ndzela ɔledo nle kī, ‘Miadzemo yī nviā kī kitonekī nte banokpa kayidza kadzi nkpā a ndo.’ ”

XXII Ade Felike, oti kī enyina katekado osi vɔɛ kī paa a bi Yudafɔ a kī, “Midzɔɛ yī kēnaawo loko a kī Lisia aaya fomɔ maatsua fɔletsɔ kī kame.”

XXIII Adeke efɔ bekɔa Paulo benado ne kola a. Lemɛ ebi bikī badāmena ye akū a kī betakena ye tenya. Nte ye bakɔba badi ya ne ye sekē ni, bekpa be osi loko bekena letsɔ a kī yawɛ a bekpa ye.

Paulo Nye Fɔletsɔ Kame Etsa Felike Mɔ Drusila.

XXIV Ne fuwi fudi liti ni, Felike mɔ ɔtsɔ Drusila kī enye Yudani ya. Efɔ benye Paulo beyamena ade ebi be kale ne Yesu Kristo katekado fɔletsɔ akū a.

XXV Kī ekanye fɔletsɔ kame ne kadzi wī, akū kapi, mɔ Baguma kadze a kī kaaya ne kunya kame a akū ni, libe wo Felike paa. Adeke Felike bi ye kī, “Yidza kanaa tɔ. Nte nna loko wī ni, maafɔ beve no.”

XXVI Ne kī ekona kī Paulo aakpa ye litsedi sū ni, yado bave ye moatse moatse bemɔ ye balomena.

XXVII Ne futeli nviā liti a, benye Felike ade bekɔa Porkio Festo beyamena ne ye kadzakɔ a. Lemɛ kī Felike we kī Yudafɔ a bewɛ ye kale sū ni, efɔ Paulo buki ena ne kola ne awā.

XXV

Paulo Kɔa Ye Fɔletsɔ Ema Legā Kaisare Anɛ.

¹ Kī Festo yawo kayite a kī yanya lonokoɛ a, ke fuwi elale liti a, eto Kaisarea enaa Yerusalem.

II Ne awã naa, basofonokõẽ a mo Yudafõ banokõẽ a yabi ye fõletsã a kã bebõe ne Paulo akũ. Ade ke bike ye aduli kã,

III emõ be konya efõ bekõa ye beyamena ne Yerusalem. Be kasui nye kã baadzi ye osi lokõa nte yatẽ a beko ye.

IV Lemẽ Festo bi be kã, "Paulo waa kõla ne Kaisare. Yĩ malo maamuniki naa awã ne fuwi lukũ kame.

V Foesũ mifõ mi banokõẽ a beya ne awã beyaanye ye nfumusu a betsa."

VI Ne fuwi elẽ ãye foe ewua liti ni, Festo muniki enaa Kaisare, ade ke luwi leyade a ebe Paulo fõletsã a.

VII Ade ke kã Paulo yawo fõletsã kadzekõ a, Yudafõ a kã bito Yerusalem a yadza bisinya ye. Bitsua fõletsã pii bite ne ye akũ lemẽ fudima tãpi ye.

VIII Paulo nye onukpẽ ele kã, "Ntáfum Yudafõ mbla ãye Yudafõ Asõli Kõla a ãye Legãnokõẽ Kaisare."

IX Ne kã Festo awe kã Yudafõ a bewẽ ye kale sũ ni, evia Paulo kã, "Owe kã anaa Yerusalem lokõa ndze nõ fõletsã a ne awã mbõee?"

X Ade ke Paulo bi ye kã, "Oowo. Romafõ Legãnokõẽ fõletsã kadzekõ ndzẽ. Ade awĩ kefeta kã bedzemõ yĩ a. Onyina yededeede kã ntákena tokpa tidima ne Yudafõ akũ.

XI Nte nkena letsã a kã kenẽ kã beko yĩ ni, maatunõ kã beko yĩ. Lemẽ nte ntákena tokpa ni, ketáfeta kã nõ ãye oti bebã akõa yĩ edo ne bati kãĩ awe kame kã beko yĩ. Ne foesũ nkõa yĩ fõletsã makpa Legãnokõẽ Kaisare!"

XII Fukĩ liti a, Festo mo ye foletsá badzeme a tsa folo ade bibi ye kĩ, “Kĩ okoa no foletsá akpa Kaisare sũ ni, Kaisare sekẽ mo aanaa.”

Legã Agripa Mo Bernike Tse Paulo Foletsá.

XIII Fuwi fudi liti a, Legã Agripa mo Bernike ya ne Festo sekẽ ne Kaisare kĩ beyaawõna ye.

XIV Bidzi ne awã fuwi pii, ade Festo koa Paulo foletsá a ebi legã a kĩ, “Onyole odi waa kola ne awĩ kĩ Felike koa ye foletsá ekpa yĩ kĩ ndze.

XV Kĩ nnaa Yerusalem a, basofonokõẽ mo be banokõẽ a tsua ye onukpẽ bekpa yĩ ade bewe kĩ nko ye koto a.

XVI “Nfõ binyi kĩ Romafõ mbla tákpa osi kĩ beko oti fomõ baadzemo ye. Kene kĩ bekpa ye osi bemõ bikĩ bideĩ foletsá a bekpota ane mo ane fomõ bele foe.

XVII Foesũ kĩ beya ne awĩ a, ntátẽ ndzi ne kale kũ akũ. Kĩ kade sila kinyina a, nfõ bekpã oti kũ beyamena.

XVIII Leme foletsá a kĩ bele bitomena ye akũ a vemena ne fukĩ nkona kĩ baale a akũ.

XIX Foletsá a kĩ bele ne awĩ a to be kasum mo onyole odi kĩ bave Yesu kĩ eku, leme Paulo kõ tsẽ yale kĩ ebuki edzi nkpã akũ!

XX Fokena yĩ basaa ade ñnyina ayekĩ matsua foletsá a kame a. Foesũ nvia Paulo nte ewe kĩ nkõa ye nnamena Yerusalem lokoa enaanye ye akũ onukpẽ ne awã.

XXI Leme Paulo le kĩ ewe kĩ bekoa ye foletsá bekpa Legãnokõẽ Kaisare. Ade nfõ bimunikimo ye benado ne kola kenawo kĩ maakoa ye mma Kaisare a.”

XXII Ade ke Legã Agripa bi Festo kī “Yī mɔawe mawe kī matse ye onukpě kame fɔletsa a.”

Ade Festo bi ye kī, “Aatse ye kunya!”

Paulo Dza Ne Agripa Ane Kame.

XXIII Kī kade nyina a, Legã Agripa mɔ Bernike hehe akū mɔ fɔgãtsa, bene beya ne fɔletsa kadzekɔ a. Ade kawū banɔne banokɔẽ mɔ ɔmatɔ a kame banokɔẽ a tomɔ be beya a. Festo nye onukpě kī bekpã Paulo beyamena.

XXIV Ade Festo ɛ kī, “Legã Agripa mɔ mi a flee kī mikpɔta ne awī a, onyole kī nyɛ oti kī Yudafɔ ne Yerusalem mɔ Kaisare we kī beko!

XXV Leme ne yī kamɔ kame ni, etákena letsa a kī kene kī beko ye. Kī ye a leme ɛle kī ekɔa ye fɔletsa yakpa boe Legãnokɔẽ sū ni, yī malo ntásī.

XXVI Leme litsa koū maatsɛle nkɔa mmɛna yī ɔnokɔẽ a? Kitonekī ne ɔnokɔali kame ni, etákena nfumususu adima. Ade foesū nkɔa ye iyamena ne mi ane kame titiliwu nɔ Legã Agripa kī nte bodze ye fɔletsa ni lokɔa maana kadi ntsɛle ne ye akū mma ye.

XXVII Kitonekī fonéne kī bakɔa odi kī ewaa kɔla bema Legãnokɔẽ kī betámɔ tokpa a kī ekɛna a betsa.”

XXVI

Paulo Nye Ye Akū Onukpě Ne Agripa Ane.

I Ade ke Agripa bi Paulo kī, “Osi waa kī apuli ɔle kodzela.”

Foesū Paulo dɛla awe ade ɛle kī,

II “Boe ɔlate Agripa, nna lolɔ wī kī maanye yī akū onukpě ne fɔletsa a kī foesū Yudafɔ bɔe kale ne yī akū a akū, ne nɔ ane.

III Kitonekĩ onyina Yudafo tɛdze mo be temanie a flee kanyina wĩ. Foesũ na ɔwɔle katse yĩ fɔletsɔ.

IV “Yudafo flee nyina ayekĩ ndzi nkpã kito yĩ tibisẽ kame ne boe ɔto mo Yerusalem lemɛ.

V Ade nte baale ɔnokɔali ne yĩ akũ ni, baanyi kĩ ñnye Farisini kĩ mabu Yudafo mbla mo temanie a flee kaba mbla adi nye adi.

VI Finyaakĩ ndzẽ badzemo yĩ ne ayekĩ yĩ ane teĩ ne Baguma kale a kĩ ele eyi ekpa boe bawanyo a sũ.

VII Ade foesũ Yudafo futete ewua-nviã boɔ mbodi kĩ basum Baguma lenye mo suwa flee lokɔa bena kɔnete kĩĩ odu a. Boe ɔlate, ade fukĩ sũ Yudafo a boe fɔletsɔ ne yĩ akũ a.

VIII Nde sũ fudeĩ mi ɔsĩ kĩ miatɛ mido kĩ Baguma adzela banɔkpa?

IX “Lokɔ lidi kame ni, nkɔa nte ne yĩ akũ kĩ mayidza ndza ne bikĩ bitomo Yesu kĩ enye Nazaretni a akũ.

X Yudafo basɔfɔnokɔẽ a kpa yĩ kobẽ kĩ mpili bati kpalewa pii ndo ne kola kame ne Yerusalem. Ade ke nte bako be lemɛ matuno ne foe akũ a.

XI Ntomo be nkakena be tenya flee kenawo temato bebã kĩ tideĩ mo lugo a malo kame. Nfõ bevele be ɔto ne Yudafo fɔletsɔ kadzekõ flee, ndza ne be akũ kĩ bele fubusuotsa ne Yesu akũ.

Paulo Le Ayekĩ Edani Etomo Yesu.

XII “Ade kakɔna kĩĩ odu nneɛ manaa Damasko, mo kobẽ a kĩ basɔfɔnokɔẽ a kpa yĩ a.

XIII Boe ɔlate, kĩ ntsẽ ne osi manaa mo suwa ketee a, mmó ɔhaĩ odi kĩ ekpale eba suwa, kĩ emɔane eto ode eyako ne bomó bikĩ bɔtsẽ boanaa akũ.

XIV Kĩ boe flee boka boto a, nnu olodo odi ne Yudafɔ tide kame evia kĩ, 'Saulo, Saulo nde sũ otomo yĩ liti? Nte ota fu seneta ni, no moawe akũ opila.'

XV "Ade ke nvia ye kĩ, 'Boe Olate, no owei ane?'

"Olodo a kpa mbuaye kĩ, 'Yĩ nye Yesu a kĩ olamena ye kano mo osĩ mo osĩ a.

XVI Finyaakĩ yidza kadza! Ìnye yĩ akũ ntsa no kitonekĩ mawe kĩ nkɔa no nkɛna yĩ tudzuma okenane. Aabi katinya kame bati flee letsa kĩ omó ne awĩ, mo fotsa a kĩ maanye ntsa no a.

XVII Ade kako nye kako kĩ maado no ni, maadza ne no liti ne no awe bati mo kade bebã bati leme kame.

XVIII Ade aabinya be ane bene ne Abonsam otũ kobẽ kame beya ne ohaĩ mo Baguma kobẽ kame a. Baguma aakɔa be titikpa ete be lokɔa ekɛna be nde bati kĩ enye ekpa ye akũ, ne kĩ bete ye bido sũ.'

Paulo Le Ye Tudzuma Kakena Foletsa.

XIX "Foesũ, boe Olate Agripa, ntátu kanye katsa a kĩ mmó ntomena ode a atsɛɛ.

XX Ìyi kayo mo kale wĩ a kabi Damaskofɔ, Yerusalemfɔ, Yudafɔ mo bikĩ benyé Yudafɔ a kĩ bedani towole kame beya ne Baguma sekẽ, lokɔa bekaakɛna fotsa a kĩ foe aatsa kĩ bedani towole kame yededeede a.

XXI Ade fukĩ sũ Yudafɔ a yapi yĩ ne be Asoli Kɔla a kame kĩ ndza nkale foletsa kĩ, ade ke bewɛ kĩ bako yĩ a.

XXII Leme Baguma nye yĩ ne be awe kame. Foesũ mbuki ndzi nkpã ade nlamena foletsa kĩ kame kanye katsa mi banokɔẽ mo bati flee a.

Letsa a kī de nlamena kale ne awĩ a nye fukī Baguma onukpě banyene mo Mose le biyi kī fóaya ne foe kame a.

XXIII Ade foe nye kī Kristo aayamo lubo. Ade ye aanya oti otonyade kī yaayidza eto banokpa kame, loko eko oedza ema Yudafo mo bikī benyé Yudafo a flee a.”

XXIV Deedimape Festo bo a fowola ele kī, “Paulo, no lolo kame bu kade! No fotsa beblebee kakole fō no lolo kame bu kade!”

XXV Ade Paulo kpa mbuaye kī, “Boe Olate Festo, yī lolo kame tabu kade. Takoa foletsa kī okena kagulo. Kale wī paa nlamena kale.

XXVI Onokoli ni, Legā Agripa nyina foletsa kī male a. Foesū maapuli nle kodzela mo ye faa. Mate kado paa kī betakena fotsa kī ne kabela kame.

XXVII Nda Agripa, ote Baguma onukpě banyene a odo? İnyina kī ote be odo.”

XXVIII Ade Agripa bi Paulo kī, “Okona kī aapuli odani yī nken okristoni ne loko lukū kī kame?”

XXIX Ade ke Paulo kpa mbuaye kī, “Nte loko lukū iye loko geleele malo ni, maboa mpa nkpa Baguma kī, nviā kī mi a flee kī midei ne awĩ a, midani mikena nde ayekī nla. Leme betado mi nkosonkoso nde yī aye!”

XXX Ade legā, abāā onokōē mo Bernike mo bati a flee yidza a.

XXXI Kī biyidza a, benaa adzina ade bibi be akū kī, “Oti kī takena letsa kpa lidima kī bako ye iye bido ye ne kola.”

XXXII Ade Agripa bi Festo kī, “Nte obi kī etale kī ekōa ye fōletsā yama Legānokōē ni, kufe bōapuli bōfōne ye awe.”

XXVII

Bekpā Paulo Benamena Roma.

I Kī bike otse kī bōanaa Italia a, bekōa Paulo mō kōla bawane bebā bido ne Romafō sodzafō ɔnokōē kī bave Yulio awe kame. Ade ye adāmena sodzafō katsu a kī bave Legānokōē Sodzafō Katsu akū a.

II Ade ke budzi ɔkolo kī eto Adramitio yanaa tōkolo fōdzakō ne Asia kame a. Bōmō Makedoniani kī bave Aristarko lidzi ne ɔkolo a kame. Eto Tesalonika.

III Kī kade nyina a, bōnadza ne Sidon mpo abuī. Ade Yulio kpa Paulo osi kī enaa ɔmato kame enaamo ye bakōba, lokōa bekpa ye fōtsa a kī yaakōa etsā osi a.

IV Kī bōbōe ne awā a ne kī ɔwe kabōa katselamō boe a onukpē deī ɔsi sū ni, bōtsā Kipro kayō semake bōbela ɔwe a.

V Kī bōtē awā a, bōtsā Kilikia mō Pamfilia mpo abuī, ade bōnadza ne Mira ne Likia a.

VI Awī a sodzafō ɔnokōē a kī yakpā boe a mō ɔkolo odi kī eto Aleksandria yanaa Italia tite akū, ade ke ekōa boe flee edo ne ye kame a.

VII Osi a katsā kame na boe ɔsī ne fuwi pii kame fōmō bupuli buwo Knido ɔmato a kame. Kī ɔwe mō ɔsī kabōa sū ni, bōtāpuli bōtē bōnaa kpīī. Foesū kī buwo Salmone a, bōble bōtsā Kreta ɔmato a ɔloto, awā kī tite a sua ɔwe a kobē onukpē.

VIII Ɔsĩ kame bokɔa bɔtsã mpo abuĩ a bonawo kako a kĩ bave Tɔkɔlo Kadzakõ Wĩ a. Awã mo Lasea kayite lelá lugo.

IX Bubula fuwi kade, ade kĩ mui akũ katsã lemɛ na ɔsĩ sũ ni, Onukpẽ Kasui Lɔkɔ a tẽ. Ne fukĩĩ sũ Paulo kpa be kakɔna eɛ kĩ,

X “Nda amɛ, mmó ãyi ɔsũ kĩ boe mui anɛ osi katsã aawo ne mbetahu kame, kĩ fotsa pii mo bati malo aawɔ.”

XI Lemɛ kawũ banɔne ɔnɔkɔẽ kĩĩ te ɔkɔlo ɔtane mo ye ɔlate a kakɔna eba letsa kĩ Paulo ɛ a.

XII Ne kĩ tɔkɔlo kadzakõ a lenéne kadzi geɛɛɛ ne osili lɔkɔ sũ ni, osi batsãne a we kĩ bedzakũ ɔsa baawo Foenike. Baapuli bidzi ne awã ne osili lɔkɔ, kitonekĩ Foenike nye ɔmato ne Kreta tite akũ. Edeĩ tɔkɔlo fɔdzakõ kĩ futsua ɔwe onukpẽ ne suwa katomukõ a.

Ɔwe Mo Ɔsĩ Vũ Ne Mpo Akũ.

XIII Kĩ ɔwe bɔɛɛ do kabɔa kademena awe a, fɔkɛna ndɛ fɔalɛ fɔkpa osi a akũ kanaa. Foesũ bemanɛ akũ ade betsã Kreta mpo abuĩ a.

XIV Lemɛ owi tábuna mo ɔwe mo ɔsĩ odi vũ eto Kreta seba semake.

XV Ɛvũ etselamo ɔkɔlo a lotɔ foesũ betápuli bedani ɔkɔlo a anɛ betselamo mpo abuĩ. Ne foesũ befɔne ɔkɔlo a awe ade ɔwe a bɔa ye ekanamena a.

XVI Ke liti kɔlaa, bɔyana kablakõ kadi ne Kauda tite kĩ mui tsua bisinya te liti. Kɔbẽ kame fɔmo bupuli busuli boe ɔkɔlo kabii a budo ne ɔkpale a kĩ ye kame bɔna a kame.

XVII Kĩ bemanɛ ye biyua a, bokɔa tɔwẽ bisuli bɔtẽmena bupimo ɔkɔlo kpale a kitonekĩ bivila

kĩ ɔwe aabɔa ye enaabãã ne dã kame ne Libia mpo abuĩ. Foesũ bekena tilima ne ɔkolo titse a akũ. Ne fukĩĩ sũ ɔwe a kabɔa ye kanamena bɔɛɛ.

XVIII Kade nyina, leme kĩ ɔwe a táfɔ kavũ sũ ni, bido fɔtsa a kĩ ɔkolo a nɔne a kanye kawula ne mui kame awe.

XIX Ade ne luwi lelalede a, beyatale ɔkolo a akũ fɔtsa pii leme biwula.

XX ɔwe mo ɔsĩ kĩĩ vũ fuwi beblebee kĩ betámo suwa iye fusibii malo. Ade botáte budo kĩ bóana nkpã a.

XXI Kĩ bidzi fuwi beblebee kĩ betánya sũ ni, Paulo yidza edza ne be ane kame, ade ebi be kĩ, “Nwaẽ ame, nte mitse yĩ kale ni, kufe botábɔɛ ne Kreta, kufe fɔtsa kĩĩ bame flee taya ne boe akũ, bɔyela boe akũ fɔtsa.

XXII Finyaakĩĩ, make mi aduli kĩ mina ɔwɔle. Ade mabi mi yededeede kĩ ɔkolo kĩĩ aayela leme mi kame odima leláaku.

XXIII Kitonekĩ kadzo lenye ni, Baguma a kĩ ye ode manɛ, mo ekĩ masum a, ye ode foto ɔnyane yadza ne yĩ ɔwẽ.

XXIV Ade ke ebi yĩ kĩ, ‘Paulo, tabila. Kene kĩ akɔa nɔ kale oyi ne Kaisare ane kame! Ne Baguma kɔnyakamo sũ ni, nɔ mo bikĩ betsẽ osi a flee kame odima leláaku.’

XXV Foesũ, nwaẽ ame, mina ɔwɔle! Nte Baguma ndo kĩ letsa nye letsa aaya ne foe kame nde ayekĩ ele eyi a.

XXVI Leme ɔwe aabɔa boe enamena tite tidi kĩ mui tsua bisinya te a akũ.”

XXVII Ade ke ɔwe mo ɔsĩ kĩĩ kabɔa boe kanamena loto mo liti fuwi ewuana flee ne Adria

m̄po akũ a. Luwi luwuanade lenye a, boe okolo kame adzuma bakenane a kona kĩ bifuã tite tidi.

XXVIII Awã na bekona mui a kadzũ bedã, ade bemó kĩ foe kadzũ aana nde foneta oha m̄o foe teya. Ade kĩ benaa loto sukuloo a, bibuki bekona ade bemó kĩ mui a a kadzũ nye foneta aduekroũ a.

XXIX Ne kĩ bivila kĩ owe a aaboa okolo a enaasãmo boe kpale kpale sũ ni, bekoa fobotsae m̄o olome ena kĩ bido owe bipimo okolo a ne liti bido ne mui a kame. Fobotsae a nabãã ne mui oda fofõ okolo a dza. Ade ke bekadã ane kĩ kade wĩ kinyina a.

XXX Kĩ okolo a kame adzuma bakenane we kĩ balo sũ ni, bekona okolo kabii a, ne tedake kame kĩ banaakena fobotsae m̄o olome a ne okolo kpale a loto.

XXXI Leme Paulo bi sodzafõ a m̄o be loto onyane a kĩ, “Nte bati kũ flee tána ne okolo kũ kame kõ ni, miaku.”

XXXII Foesũ sodzafõ a tsua owe a kĩ epini okolo kabii a, ade eka ewo ne mui a kame a.

XXXIII Odenyinawi a, Paulo ke be flee aduli kĩ benya. Ebi be kĩ, “Ade nviã nye fuwi ewuana kĩ mi kame odima táta letsama onukpẽ a.

XXXIV Ne foesũ, make mi aduli, minya litsedi lokoa mina kobẽ ayekĩ miláaku. Kitonekĩ odima solo m̄oare malo leláakamu.”

XXXV Ade ke Paulo boe abodoo adi, ade kĩ eboa mpae ekpa Baguma ne be flee ane a, ebuli adi eba.

XXXVI Ade ke owole ka edzi odi nye odi bido kanya awe a.

XXXVII Bati a kĩ bena ne okolo a kame lidede nye oha nviã m̄o be aduesõ-evũ (276).

XXXVIII Kĩ bati a nya biwĩ a, benye funitsã mo fuvũ a flee ne okolo a kame biko ne mui kame ade okolo a né olome a.

Okolo a Yele.

XXXIX Kĩ fokó kpale a, okolo batane a támó awã mpo abuĩ a biyi osũ. Leme bemó kadzakõ kadi kĩ bekona kĩ awã aale bedza. Foesũ bewe kĩ nte fóale ni bata okolo a benamena awã.

XL Foesũ bikpeli fobotsae mo olome kĩ fupini okolo a towẽ bido ne mui kame, ade biwũnya otse a kĩ ye atsa okolo a osi a. Ke liti bedzela okolo a tilima ayekĩ owe aaboa ye enamena.

XLI Kĩ beyele banaa a, okolo a nabãã ne dã kame ade ye ane semake tábuki epuli ekuna akũ a. Owe mo osĩ a leme yabo ye ne liti semake a eyele ye foke foke.

XLII Sodzafo a ke otse kĩ bako kola bawane a flee ayekĩ beláato mui bilo.

XLIII Leme be lotó onyane we kĩ yate Paulo nkpã, foesũ etátuno bekona ne be kawe akũ. Ade ekpa kobě kĩ nte bikĩ baapuli bito mui ni, benya lotó bevenya biwo bito mui benaa mpo abuĩ.

XLIV Bati a kĩ bite a leme bebœe titse foke mo fotsa bebã kĩ fóapuli fotsãmo be ne mui ane lokoa biwo owó abuĩ. Ade aye bokona buwo owó abuĩ soũ a.

XXVIII

Paulo Kena Awãwã Fotsa Ne Malta.

¹ Ade kĩ bone ne mbetahu kame a, boyamo kĩ tite a kĩ mui tsua bisinya te a bave Malta.

II Bati ne tite kī akū a te boe mo kawole paa a. Ne kī oni kako osili leme na sū ni, bekpota fi kpale ne mpo abui a bekpa boe.

III Kī Paulo fila tuvotsei kī yako ne fi kame a, ne fi a owe obō sū koe kudi ne ne avo a kame koyadō ye kovane ne ye kokpo.

IV Kī awā bati a mo koe a kī kovane ne ye kokpo a, bibi akū kī, “Owudini oti kī ane. Ade foesū boe baviō lelāafō edzi nkpā a, tito kī elo ne wuda awe kame ne mpo kame malo.”

V Ade Paulo wunya koe a edo ne fi a kame a, leme letsama tákena ye.

VI Ade bati a dza bekadā ane kī yaawumi iye yaaka eto deedimape eku. Owi buna kī bedza bekadā, ade kī letsama tákena ye a, bedani be adzuni ne ye akū, ade bele kī, baguma adi yane.

VII Awā kī bonadza a, fuāmo Publio kī enye tite a legā. Onokoē kī leme te boe mo kawole ade edā boe akū fuwi elale flee a.

VIII Ne fuwi kī kame ni, Publio olega kaso atilili, ade ekayo koboa moatse moatse a. Paulo naa ye sekē, enaboa mpaē ete awe ne ye akū, ade esae a.

IX Kī binu foso katsa kī a, basone ne tite akū flee ne beya, ade Paulo tsa be a.

X Ne lekenana kī sū bekpa boe fotsa pii. Ade kī boe kadzakū wo eto a, bema boe fotsa a kī bóakoa bōtsā osi.

Betē Malta Bena Roma.

XI Botē tideto elale ne awā fomō bōdzakū. Kī bōdzakū a budzi okolo kī baye Nta Baviō kī eto Aleksandria eyadza ne kasekō a ne osili loko.

XII Kĩ bɔbɔe buto awã a, bɔnaa Sirakuse ɔmato a, ade bɔna ne awã fuwi elale a.

XIII Ade ke luwi leyade buto awã bunyina bɔnaa Regio a. Ɔwe wĩ odi bɔa boe ne liti, ade bɔyawo Puteoli a.

XIV Awã naa, bɔmó bate badone badi, ade bike boe aduli kĩ budzi ne be sekẽ ekwansieda mɔa. Ne ke liti a, buto awã bɔnaa Roma.

XV Kĩ boe bawãe a kĩ bideĩ ne Roma nu kĩ bɔaya a, bɛyatselamɔ boe ne awã kĩ bave Apia Kɔyaato a. Badi lɛme yatselamɔ boe ne Fusekõ Elale a. Kĩ Paulo mó be a, enye Baguma kɔle ade ke ebuki ena ɔwɔle kado a.

Paulo Wo Roma.

XVI Kĩ buwo Roma a, bekpa Paulo osi kĩ edzi ye akũ akũ ne awã kĩ ewe a, lɛme befõ sodzafɔ a kame ɔmɔa kadãmena ye akũ.

XVII Fuwi elale liti a, Paulo ve Yudafɔ banokõẽ a kĩ bideĩ ne awã a ekpota. Kĩ betsen a, ebi be kĩ, “Nwãe ame, bipi yĩ ne Yerusalem bekɔa bema Roma abãã kĩ edzemɔ yĩ, titɔ kĩ ntáfum odima, ñye nfum boe bawanyɔ amanie adima malo.

XVIII Romafɔ a dzemɔ yĩ, ade ke bewe kĩ bafone yĩ awe kufe a, kitonekĩ betámɔ lets a kĩ de akũ baadza beko yĩ wuda kɔto.

XIX Kĩ Yudafɔ a tátunɔ ne foe akũ sũ ni, foyasĩ kĩ nkɔa yĩ kale mma Legãnokõẽ Kaisare, titɔ kĩ ntábɔe foletsa ne yĩ kade bati akũ malo.

XX Ade fukĩ sũ nve mi a, kitonekĩ Oti a kĩ Bɛbɔa Tɔdɔ a, kĩ ye akũ Yudafɔ ate ane a, ade ye nte ndo sũ nkɔsonkɔso kĩ pini yĩ a.”

XXI Ade bibi ye kĩ, “Boe kõ bɔtãnu kadima butomɛna nɔ akũ. Ade bɔtãte ovoli ñye ɔledo kpa

odima ne nɔ akū butomena bikī bito Yudea beya ne awī a sekē a.

XXII Leme boawe kī boatse litsedi butomena letsa a kī de ɔte odo a akū. Kitonekī baále kale wī kadima ne katekado katsu a kī ke kame odeī a akū ne kako nye kako.”

XXIII Biyi luwi ade ke bati pii yatsena ne Paulo awā a. Awā naa, ebi be foletsa ne Baguma legākanyakō a akū. Ade etsa be fotsa ne Yesu akū etomena Mose mɔ Baguma onukpē banyene a tuvoli kame a. Ele kɔdzela kito ɔnɔne kenawo olobe.

XXIV Be kame badi te foletsa a bido, badi leme tâte bido.

XXV Foletsa kī dani kavele ne be kame, ade besē be akū a. Paulo bi be kī, “Hūhū Kpalɛwa le ɔnokɔali etsā Yesaya akū ebi boe bawanyo kī,

XXVI ‘Naa kanaabi Yudafo a kī,

“Míanu yī foletsa leme miláanu foe kayo,
míako ane midā leme miláamɔ foe miyi
osū.”

XXVII Kitonekī bati kī tɔwɔle deī osī,
ade be atɔ sī a,
ade bisua ane leme a.

Nte nné aye ni, kufe be ane aamɔ
ade be atɔ aanu, be adzuni kame leme
aakpale,

ade baadani beya ne yī sekē lɔkɔa ntsa be fɔsɔ.’
”

XXVIII-XXIX Paulo wūna kɔdzela kale mɔ be kī,
“Kene kī minyi kī, bekɔa Baguma bati nkpā kate
foletsa kī a bema bikī benyé Yudafo a leme. Be
ni, baate foe!”

XXX Paulo dzi ne awã futeli nviã ne kola kã ewã a kame. Ade awã ekate bati a flee kã bekaya ne ye sekẽ a.

XXXI Ekale Baguma legãkanyakõ akũ foletsã mo owole kame kobẽ flee kakpa be, etsa be fotsa etomena boe Olate Yesu Kristo akũ, ade odima tásua ye osi a.

Baguma Apam Vɔɛ a Tɔwuli
Tɔwuli: Baguma Apam Vɔɛ a Tɔwuli New Testament
copyright © 2008 Wycliffe Bible Translators, Inc.

Language: (Tɔwuli)

Contributor: Wycliffe Bible Translators, Inc.

All rights reserved.

2020-12-01

PDF generated using Haiola and XeLaTeX on 28 Dec 2024 from source
files dated 29 Jan 2022

68df0193-2981-5275-8994-8f743fe01e5e